

**ЕЛЕНА КОЗЛОВА**

**ГÖГЫЛЯ-ВУГЫЛЯ**

**ПОВЕСЬТЪЯС  
ВИСЬТЪЯС**

Тайо книгаас — збыльыс да вöвлытöмторйыс, дзулькйöн пуысь öнйя олöмыс да важъя гусяторъясыс, челядълöн шог-тöждъясыс да найöс венöмыс. Кыдзи мукöддырйиыс сьöкыд лöсявны öттшöтшъяскöд да кутшöм бур, кор дйнад эмöсь ставсö гөгöрвоысь верстьöяс.

Е.Козловалöн гижöдъясын нывкаяс да зонкаяс зйльöны гөгöрвоны ас гөгöрса ыджыд мирсö да эскöны бурас.

# ГӨГЫЛЯ-ВУГЫЛЯ

*повесть-мойд*

## Сьöd кырныш

Колялы вöлі деливö, муткырасис сьöлöмыс — дöзмöма став вылас: мамыс вылö, мый оз кöсйы ньöбны электроннöй часi, кодöс вузалiсны сельпо лавкаын; велöдысь вылас, мый талун бара дневникас шняпкис «два»; Витя ёртыс вылö, мый весиг вадорас эз кöсйись лэчывны ськöд да содтöд на урокъяс дырйи мыйкö пыр вашкöдчис Юлякöд, а труд урок дырйи сiдз сибöдчис нывка дорас, мый юръясыс матысмисны, юрсиясыс öтлаасьлисны. Витя мыйкö висьтавлiс и висьтавлiс сылы, кинас и чуньнас петкöдлiс. Виджадöн Коля парта дорсянь пукалöны, да ставыс тыдалö. А ськöд со эз лэччы. Нöшта ёртөн шусьö...

Колялы быть колö вöлі ветлыны вадорас: воддзайсьсö вуграсьöм бöрын вугыр шатьяссö кольлiс бадь кустö, а вуграсьöмыс сэсся сы бöрын эз нин и ло. Колö катöдны гортас, оз öд тöвйыны сэтчö коль. Кыкнад ёртыскöд эськö ворсiгмоз лэччылiсны, а со эз мун. Поводдяыс мöдöд вежон нин букыша, зэрышталö да, тыдалö, повзис ньöдздöмысь. Кымөръясыс тыртöмаöсь енэжсö, вольсасьöмаöсь сикт весьтас, тайкö оз усьны, сэтшöм улынöсь. Асывнас на öд весиг шондi петалiс. А сэсся бөр кымөрнас туис енэжыс.

Воис бадь кустьяс дорö Коля, видзöдлiс: вугыр шатьясыс места вылынöсь. Некод абу вөрзёдлöма. Пуксис кустьяс дорас, мöдiс дзоргыны ва вылас. Ваыс пемыд, сьöда-лöза. Туруныс пемдöма жö, вижöдöма, оз нин гожöмын моз вежнас синтö чег. Колясянь водзынджык, веськыдвылас — пемыд козья вөр, а шуйгавылас — корья, арнад уна рöма. Шондиа дырйи кö эськö сярвидзис-ворсöдчис, пöртмасис югөрьяс улас вижагöрдөн, а кымöра луннад и сийö чусмöма, оз гажöд синтö.

Пукалiс Коля, дöзмöмөн мöвпалiс ёрт йывсьыс: «Мый эськö сылы тшöтш не лэчывны вöли вадорас. Ог пö вевьяв. А мыйла, весиг эз висьтав. Ачыс кö кытчöкö корас — Коля пырысьтöм-пыр мунö. Ставсö эновтас да. А ёртыс со абу сэтшöм. Мöдысь корлас на кытчöкö, сiдз жö шуа: ог вевьяв. А то вельмöма».

Гортас нин кöсийö вöли Коля мöдöдчыны да друг казялiс: бадь кусткöд орчöн быдмысь коз пу вылö шыён шевкнитчис-пуксис ыджыд сьöд лэбач. Виччысьтöмысла Коля чур-чермуни да чеччыштлiс места вывсьыс: татшöм лэбачсö, а тайö вöли кырныш, зонка матысяньыс медводдзаысь на аддзö. Мöдыс, дерт, татысь некодöс эз чайт, ачыс повзис да мыйкö весиг уськöдiс вомсьыс, мöдлiс шпорöдчыны-кыпöдчыны, но бөр пуксис да кутiс дзоргыны увлань — видзöдалiс, кытчö уси вомас ваянторйыс. Бадь пытшкас веськалöма, эз, буракö, тыдав. Сийö жговкнитiс увлань, лэбис-кытшовтiс бадь гөгöрыс öтчыд, мöдысь дай коймöдысь, муртса Коля юрö эз люкась — ичöт зонкасьыд оз пов — да бөр пуксис орчча коз вылö. Зонка вылö дзоргö лэбачыс, синьяснас сейöмөн сейö, ён сьöд нырнас клатшкö — скöралö.

— Кыш,— повзёдiс сийöс кинас шенасьöмөн Коля, но мöдыд оз и асьвартлы, жаль воштöмторйыс.

«Мый нө эськө сэтшөмсө уськөдіс? — мөвпаліс Коля. — Колө корсьлыны».

Но оз өд мөд корсьны отырышъя дзоргысь лэбач дырйиыс. Коля вугыр шатънас өвтчөмөн вөтліс сійөс.

Кырныш шеньштчис вына бордьяснас, вөчис кытш да вөлись лэбис пемыд вөрлань. Коля пырис бадь куст пиө, сюся гөгөр видзөдалө. Муас нинөм абу. Зонка вешталіс ув бөрся ув, но бара нинөм эз аддзы. Медбөрын пидзөсчанысьөмөн пырис бадь улас да увсянныс вывлань видзөдөмөн өти чаль вылысь казяліс өчки. Шай-паймуніс весиг: кытысь нө лэбачыслы тайө? Бауөн бөр петіс куст увсьыс, киас дыр бергөдлөмөн видзөдаліс шедөмторсө: тешкодь өчки, еджыд руа быттьө, йөв рөма.

## Чуймөданатор

«Хы! Өчки шусьө! Мыйкө сы пыр и тыдалас дай!» — мөвпыштіс Коля да пуктіс ныр вылас. Син гуранъяс сертиыс гөгыльясыс буретшөсь, и вугъясыс пельяс саяс, быттьө сылы вылө и вөчөма. Ставыс зэв бура тыдаліс: и ю, и баддыс, и матысса вөрыс, и мөдлапөв, и вадорса сьөрт. А со и кыр йылын асланыс сиктыс сярвидзө уна өшиньяснас. Мый нө еджыд руа кө өчкиыс, лөсьыда быдтор аддзан, быттьө ас синнад и видзөдан. Оз ыдждөд өчкиыс ни оз дзольдөд, и синмыд оз мудз.

Дыр дзөръяліс отарө-мөдарө Коля, но и гортлань өд колө мөдөдчыны. «А кытчө нө өчкисө коля? Аскөд босьта? Мый и вөчны?» — мөвпаліс детинка. Ичөтсянныс на сійөс велөдлісны: юасьтөг-висьтасьтөг йөзлысь нинөм босьтны оз

позь. Коркө өтчүд, вит-ө-квэйт арөса вөлі сэки Коля, өти керкадорса өг чукөрысь аддзис шыла: ёсь йыла, лөсьыднік воропа... Зэв туяна... Вайис гортас. А батысь бөр мөдөдіс: ну пө, сэтчө, кытысь босьтін. Эз өд гусяв, өг чукөрысь аддзис, сідзкө, кодкө шыбитөма, ковтөмтор. Батысь кыв вылө эз сетчы: ну пө, и ставыс! Бөрддзис Коля, но нуис да бөр шыбитіс өг чукөрө — кывзысис батысьлысь.

А өні? Мый вөчны? Эновтны өчкисө, бадь ув вылас бөр өшөдны да? Батысь велөдөм серти кө, колө кольны аддзөмторсө татчө. Но өд тайө абу кырнышыслөн, көть и сійө вомсьыс уськөдіс. Дерт, кодлыськө пышійөдіс жө. «Гашкө, асланым сиктсалөн на кодлөнкө. Татчө кө коля, некодлы оз шед, коді нө слөймас да кутас вадорса кутшөмкө куст пөвстысь өчки корсьны. Нуны аскөд? Йөзлысь асавны оз позь. Но и татчө он коль. Кырнышыслы нө мый сыысь? Дуригмоз, көнкө, лэбөдіс кодлыськө, — мөвпаліс зонка. — Колө сиктын юасьлыны, коді воштіс. Нуа гортө да бать кө аддзас — бөр татчө мөдөдас. Сөмын кок песөм сюрлө».

Коля, ныр вылас өчкиа, лажыньтчис вижөдөм нин турун вылас. Тешкодя өд луныс и заводитчис. Лөк өценка сюрөм бөрас сьөлөмнас дзык усьлі, а сэссия велөдысьыс, Валентина Васильевна, тшөктіс гижны сочинение гожөм йылысь. Казь-тыліс гожся кадсө, батыськөд вуграсьөмсө, вугыр шатьяссө төд вылас уськөдіс да сійөн и татчө лэчөмыс лои. А гижис сьөлөмсянныс, лов вылас весиг сайкаліс. Гашкө, велөдысьыс «пять» пуктас. Колөкө, өні сылысь тетрадьсө лыддьө. Мөвпыштіс тадз... И син водзас воис Валентина Васильевнаыслөн керка пытшкөсыс. Виччысьтөмысла Коля весиг видзаасис, но сылы некод эз вочавидз. Некутшөм тетрадь велөдысьыс эз лыддьы, а пельк да сөстөм инпөлас дзоридза

клеёнkaa пызан сайын пукаліс да шёнаа рокён вердіс ассьыс квайт арёса нывсё. Мёдыс дзиглясис — эз сёй. Юрсё дзёрөдөмысь павкъяліс вёсни еджыд юрсисё кутысь гөрд бантыс. «Со өд, учительницалысь весиг оз кывзысь!» — чабыртис кырымсё Коля. Вөрзёдіс юрсё — и син водзсьыс ставыс воши.

Со ю, бадь куст, коз, вөр... «Мый нө тайё мекөд лои? Каститчис кө-а?» — нинөм оз гөгөрво Коля.

Но аддзылөм рок тасьтисё казътыштіс да кынөм сю-малөмсё эз вермы венны. Гортас колө кайны. Мамыс, көнкө, сёйны виччысьё. Сөмын тадз мөвпыштіс и аддзис... мамсё. Лавкаысь. Сулалө сійё вузасян джадж дорас да киас бергөдлө... часі. Стөч сійёс, кутшөм колө вөлі Колялы. Кын-мис места вылас зонка, весиг лов шысё кутыштіс: ньөбас оз, ньөбас оз? Со матыстчис вузасьысь дорас, вештысис да суйис ньөбөмторсё зептас. Коля нимкодъысла чеччыштіліс — и ставыс син водзсьыс воши.

Со бара ю, вөр, асланыс сиктыс кыр йылын. «Мый нө мекөд лои?» — повзъыштіскодь весиг детинка. — Абу-ө тайё өчкиыс мыжа?» Вештіс син вывсьыс, казътыштіс мамсё — нинөм эз петкөдлы. Пысаліс өчкисё, бара уськөдіс төд вылас — со мунө мамыс руд жакета, сэтшөм жө юбкаа, арын новлан туфлиа, сьыліас көртыштөма вёсныдидик руд чышгъян. Вөрзёдыштіс юрсё зонка — ставыс син водзсьыс воши. Босьтіс өчкисё, мөвпыштіс мамсё — нинөм син водзас эз во. Öчкиасис, казътыштіс мамсё — бара мамыс син водзас: со пырис асланыс йөрө дзиръяті, бергөдчыліс, каличаліс, кайис джуджыд кильчө вылө да пырис гортас.

«Волшебной өчки! Ме ордын волшебной өчки!» — Коля нимкодъысла вылө-вылө чеччыштіліс; мамыс син водзсьыс

вошис. Зонка босьтіс кias чуймөданаторсө да шензьөмөн бергөдліс-видзөдаліс: нинөмөн быттьо оз и торъяв мукөд-сьыс, сөмын руа. А збыльтор-ө петкөдлө өчкиыс? Оз-ө ылөдлы? Колө быд ногыс видлавны сылысь вынсө, төдмавны гусяторъяссө. А өні — гортө. Медводз колө юавны мамыслысь: ньөбис-ө часісө?

Өні зонка эз нин майшась: босьтны либө кольны өчкисө. Оз өд эновт татчө, либө кодлыкө сет — сылы, Колялы, уси сэтшөм шудыс да, лэбачыс ачыс вайис сы дорө.

Сиктлань сійө лэбөмөн лэбис. Вугыр шатьяссө тай эз жө вунөд-а. Но кызди көть эз тэрмась Коля, а казяліс, мый сьөд кырнышыс сы бөрся ньөжйөникөн лэбө.

Тешкодь лэбач! И мый сылы колө? Мыйла кыйөдчө? Весиг шуштөм лои зонкалы: со өд, көсийө төдмавны, көні олө, гашкө, лёк вөчны көсийө. Вугыр шатьяснад өвтчөм бөрын тай эз жө сэсса матыстчыв-а.

## Тайө рытас

Кыкысь чеччыштөмөн и кайис кильчө вылас Коля, кызэсюрө чөвтис вуграсян көлуйсө посводзас, ачыс пырис керкаас.

Мамыс вежсьөма нин: гырысь дзоридзьяса халата, гөграліс инпөлас, дасьтіс ужын.

— Мам, часітө ньөбин? — пырөмөн тшөтш юалис Коля.

— Э-э-эг! — дэльөдчана видзөдласөн бергөдчис сійө пиланьыс.

— Эн ылөдчы! Ньөбин да! Петкөдлы!



— Некутшөм часі ме эг ньөб,— шуис мамыс да мудера нюммуніс.

— Ньөбин! Вот и ньөбин, ме өд төда!— нюммуніс жө Коля да ниртчыштчіс мамыслы пельпомас.

— Кодкө өд и висьталөма нин! Эг на өні көсйы сетны-а. Мися, видзөдла, кызди велөдчан четвертьтө помалан,— веськыд кинас сйө мелиа дзугьштгіс Колялысь чикыля юрсисө.

— Мамук, ме мөда «пять» вылө велөдчыны, вот аддзылан!

— Но, инось,— мамыс судзөдчыліс ен ув джаджйө да кыкис ичөтик съөд куд. Нель пельөса съөд циферблат вылас часі петкөдліс кад: 18.01. Личкис мөд кнопка, лои лун да төлысь 20.09 — көч, 20-өд лун.

— Атьө, мамук!— нимкодя нюмьөвтгіс да топөдчыліс мамыс дінө Коля.

— Новлы,— мамыс шылькнитіс юрөдыс зонкаөс.— Сөмын бура мөд велөдчыны. Чужан лун кежлад тайө козиныс мед лоас и...

— Велөдча, велөдча, мамук! Вот аддзылан.

Дерт, мөд лунө кө, Коля рыгывбыд эськө ворсөдчис часинас, сөысь личкыліс кнопка вылас: кад видзөдлас, сэсся лун да төлысь. Но талун сылөн вөлі донаджыктор — волшебной өчки.

Ужнайтөм бөрын зонкалөн мам-батыс, кызди и пыр, став гортса уджъяс бөрын пуксисны телевизор дорө, а сйө пырис пыді вежөсас, быттө урок велөдны.

Кутшөм сэн гортса удж! Велөдяс өмөй талун! Пөдлаліс өдзөссө да пуктіс сы дорө улөс. Мөдасны кө пырны — вевьялас дзевны өчкисө. Батьсыс поліс: мед эськө сйө оз жө аддзыв! Мый сылы — тшөктас нуны сэтчө, кытысь босьтіс. А Коля тайөс вөчны оз вермы, мед, колөкө, лоө мый

лоанаыс. Эз өд гусяв, а аддзис. Кырнышыслы эськө эз и сюр бадь пөвстсьыс. Да и мыйла сылы, лэбачыслы?

Зонка перйис зепсьыс аддзөмторсө, өчкиасис да сувтис рөмпөштан водзө. Öчкисө быттьө йөв пиө суйлөма, зонкалөн синъясыс сы пыр оз и тыдавыны, а ачыс видзөдө да ставсө бура аддзө. Зэв на и лөсьыд өчкинас: быттьө абу и Коля, а кутшөмкө бура велөдчысь шань детинка, кузьмөсов чужөма да съөд чыкыля юрсиа. Класс водзө кө аски сувтас өчкинас, дерт, ставөн сы вылө мөдасны дзоргыны. Мый бара шуасны-а? Мый кутасны юасьны. Öд ни өти морт на оз төд, мый тайө өчкиыс волшебнөй! Со часі ньөбөмсө мамыслысь аддзыліс — и — збыль өд вөлөма! «Мыйкө колө нөшта видзөдлыны, оз-ө пөръясь өчкиыс? — мөвпаліс Коля. — Мый нө эськө өні медводз видзөдлыны? Ассьыным классөс?» Мөвпыштис — и со син водзас воссис. Пемыд. Партаясыс муртса тыдалөны. Быттьө төдтөмин, некод абу да. Шуштөм и. «Ог, класс видзөдны сэсся ог кут. Бурджык, Витя өртөс видзөдла. Мый сийө өні гортас вөчө?»

Мый аддзис Коля, дзыкөдз шемөсмөдіс сийөс. Некодлы нин эськө оз висьтав син улас усьөмторсө, өд өртсө серам выв лэптасны. Сылөн Витяыс... Оз, оз висьтав. Медводз төдмалас, збыль-ө петкөдлө өчкиыс. Öтиысьсө тай, часі йывсьыс стөча висьталіс-а. Öні, буракө, ылөдлө. Витяыс оз вермы... Вылысь видзөдла. Да, со пукалө пызан сайын... Гөгрөс чужөмыс банйыштөма, небыд руд юрсиыс вевттьө рудіник, муртса төдчысь синкымьяссө. «Ветла, час, гортас...»

— Кытчө мөдін? — казяліс Колялысь пасьтасьөмсө мамыс.

— Котөртла Витяясө, юала, кутшөм задача колө решитны.

— Мыйла ачыл он төд гортса уджтө? Узин урок вылад али ывлаын велөдчин? — заводитис мамыс.

Коля эз кывзы, котөрөн петис.

Сиктыс налөн вөлі быттьө кык судтаа: кыр йылас — пурьсы, и горулас — пурьсы. На бердө визьён-визьён и пуксьөмаось йёзыс овмөсьяснас. Коляслөн керкаыс вөлі кыр йылас, сикт шөрас, а Витяслөн горулас, кывтыдладорас.

Зонка котөрөн лэччис кыр горув, быттьө мач быгыльтчис. Сэсса лов шысө лөньөдөм могьсы надзмөдис воськовьяссө. Йөрас эз дзирьятыс пыр, а чечыштис веськыда потшөс вомөныс да өдзөсас торкөдчытөг и пырис: збыль кө петкөдлө өчкиыс — суас.

Жырьяс пырөм бөрын Коля видзөдліс гөгөрбок. Витя пукаліс пызан сайын да лыддис книга. «Ылөдліс, сідзкө, өчкий, эз збыльтор петкөдлы, — майшасис Коля. — А часі ньөбөмсө тай нө аддзыліс?»

— Кутшөм задача сетисны? Менам абу гижсьөма, — нурбыльтис-юалис Коля, мед кызкө подулавны сөрөн воөмсө.

Витя пырис дневникысла пыді вежөсас, сәні кылө, мамыс водтөдис ичөт чойсө узьны, а Коля мышкыртчис да видзөдліс диван увсө, пызан ув, улөсьяс ув, но корсянторсө эз аддзы.

— Гижышт гортса уджтө... А мый нө эськө копрасян? — петигас казялөма Витя.

— Да-а, көмкотысь тай көртөдыс разьсьөма. Оз ков гижнысө, ог вунөд... — нурбыльтис.

Оз, дерт, аслас дневникас пасйөма да. Сідзи и петис ёртыс ордысь шөйөвошөмөн. Чужөмыс сотчис и: кыкысь ёртсө ылөдліс.

Гортас бара видзөдліс өчки пырыс Витя вылө: сійө лыддьысис.

## Коля шензьөдө ёртъяссө

Мөд луннас Коля школао муніс водз, чөвтис партаас портфельсө да петіс ывлао. Шондіа асыв. Төла. Кымөръясыс войбыднас кытчөкө уйкнитөмаоьс-пышйөмаоьс. Школа йөрын некод на эз вөв. Өткөн-өткөн муртса мөдісны матыстчавны челядь. Коля мөвпыштис Витя йылысь. Аддзис өчки пырыс: со петіс ёртыс гортсыс, лэччис кильчө содтыс. Сідзкө, регыд и сійө воас. А школа дорсянныс ас синнас кө видзөдны — оз тыдав Витялөн керкаыс.

Со локтө Юля. Классын медмича нылыс. Тадзи тай Колялы кажитчө-а. Гашкө, и оз сөмын сылы өтнаслы, а тшөтш и Витялы, мукөд зонкаяслы... Юля пукалө Коля партасянь виджадөн водзынджык. Урок дырйи зонка тшөкыда синсө чөвтывлө сы вылө, нимкодьясьө рудіник кузь көсаяснас, пель дорөдыс чыкыля юрсинас, а шондіа лунө кажитчө, мый югөръясыс ворсөдчөны сылөн юрси сиясөн. Но Юля некор синсө оз чөвтыв Колялань. А Витя ёртыскөд быд урок вашкөдчө.

Восьлалө Юля, да төлыс ворсө-дурьшталө кокныдик югыдруд кизявтөм плащ пөлаяснас, петкөдлө воча локтысьяслы кирпич рөма платтьөсө. Со нылыс школа дорө воис, Коля дінті мунө:

— Юля, — нем думышттөг-көсийтөг артмис Колялөн, — матыстчыв татчань, петкөдла мыйкө.

Нывка сувтыштис, быттьө джөмдіс, а сэсса ньөжйөникөн матыстчис зонка дорө, юалана видзөдліс сы вылө.

А синъясыс! Енэжсьыс на мичаджыкөсь. Татшөм мичсьыс Колялөн весиг здук кежлө лов шыыс тасасьліс.

— Юля, ме тэныд өтитор петкөдла, но тэ көсийысь, мый аскиөдз некодлы он висътав та йылысь.

— Но...

— Став мунас и ванас кӱсйысян?

— Да... Став мунас и ванас...

— Менам эм волшебной очки! — пӱся вашнитис нывлы пеляс.

— Эн ылӱдчы, — серӱктыштитис Юля.

— Збы-ы-ыль!

— Петкӱдлы!

— Со, — Коля мыччис аддзӱмторсӱ.

Нывка босьтитис киас, бергӱдлыштитис, видзӱдалис гӱгӱр, бӱр мыччис:

— Но, и мый тані волшебнойыс? Йӱв рӱма, руа очки. Та пыр, буракӱ, нинӱм оз и тыдав. Аддзӱмыд — дивӱтор, да нӱшта ӱд и волшебной пӱ!

— Ӑчкиась да мый йылысь кӱ мӱвпышт... Сійӱс и петкӱдлас.

— Ылӱдчан?

— Но видлы, видлы!

Юля кӱлалис ӱчкисӱ.

— И мый колӱ шуны? Лӱбӱд менӱ?..

— О-о-оз! Шу: кӱсья видзӱдлыны... И содты, мый збыль вылӱ кӱсьян.

— А-а. Кӱсья видзӱдлыны, коді мян классын.

Юлялӱн чуймӱмысла чужӱмыс нюжалис, вомыс калькмуни. Мӱдис висътавлыны: Надя да Катя... Сӱсся некод на абу... Но ӱд мян классным мӱдарлань ӱшиня, татысянь весиг оз тыдав?!

— Ме тай шули: волшебной. А ӱни вай татчӱ ӱчкисӱ, ачыд котӱртлы да видзӱдлы, збыль-ӱ оз петкӱдлы.

Юля портфельсö весиг вунöдiс — котöртiс. Здук мысти бöр воис, ышлoлaлö, чужöмыс бaнйыштöмa, ачыс шызьöмa:

— Збыль! Кыкөнöсь классын, сэсся некод абу. Вот тайö да!

Но тайö здукас челядь юр весьтö воис съод кырныш. Юля повзьöмысла чилöстiс, а Коля саймовтiс öчкисö питшöгас. Зонка синнас колльöдiс ылыстчысь лэбачöс: тайö кырнышыс сылы вöли тöдса.

— Вай нöшта мыйкö видзöдла,— корис Юля, сайка-лыштiс повзьылöм бöрас да.

Но Коля казялис Витя ёртыслысь матыстчöмсö да бöр дзебис öчкисö пинжак пыдi зептас.

— Бöрынджык сэсся. Кöсйысин видзны гусяторнымöс — видз!

— Но!— нывка босьтiс портфельсö, гажаа чеччалiгтыр котöртiс школаö.

— Чолöм,— матыстчис да шыасис Витя.

— Чолöм,— вочавидзис Коля.— Витя, висьтав, мыйла тэ мекöд тöрыт вадорас эн лэччыв? Ёртөн нöшта лыддьыссян!

— Да, сiдз,— нюркнитiс Витя,— эг вевъяв, гортын мыйсюрö колö вöли вöчыштны...

— Талун бара школа бöрад гортад котöртан?

— Дерт.

— А ме тöда тэнсьыд мыйсюрötö!

— Кыськö дай! Мый нö эськö?

— Ме кöсья, мед тэ ачyd висьталiн.

— Меным нинöм висьтавнысö.

— Он кö ачyd кöсйы, ме шуа. Тэ акaньөн ворсан!

— Мы-ы-ый?— Витя тшöкмунис, а сэсся чабыртiс кулакъяссö да уськöдчис Колялань.

— А шу, мый он!

— Ог! Тэ лосьодлан ме вылө!— дөзмөмөн дорйысьё  
Витя.

Мый эськө лои зонъяс костын — код тодас. Зыкө, дерт, воисны, косьё на, гашкө, но триньобтис звөнок, и ставөн ывла вылысь ува-аваён пырисны школаө. Коля да Витя котөртисны жö классаныс.

Кыдзи коть эз дөзмыв Витя ёртыс вылө, урок чөжнас дөзман руыс пакталіс да перемена дырйи сійö ачыс матыстчис Коля дінö.

— Ко-о-оль, петалам ывлаө, сёрнитыштам.

— Позьö,— лабутнöя вочавидзис ёртыс. Сійö öд эз көсйы лөгөдчыны, сылы сөмын колö вöлі тöдмавны, збыль-ö öчкиыс петкөдлө.

Сёрнисö Коля ачыс паніс:

— Вить, тэ меным збыльысь висьтав, мый тэ төрыт рытнас вöчин, а ме тэд сэтшөмтор петкөдла, мый тэ некор на некытысь эн кывлы ни эн аддзыв.

— Мыйөн нö төдан, гашкө, и аддзылі нин.

— Эн. Мый ме ордын — сэтшөмыс сэсся му вылас öдвакө кодлөнкө эм?

Эскис-ö, эз-ö ёртыс, но здук мөвпыштөм бөрын юалис:

— А мыйла тэныд колö төднысö, мый ме төрыт вöчи?

— Менам эм сэтшөмтор, коді ставсö му вывсьыс петкөдлө. Төрыт сы пыръя видзөдлі да тэнö аддзи: аканьöс вöлі пасьтөдан. Сійөн и волі тэ дорö, мед төдмавны, збыль-ö абу тайö, но сёрми: лыддысян нин вöлі.

— Ылөдчы ёнджыка! Аддзан дай!— эз эскы Витя.

— Көть мый шу, а эм менам!

— Абу! Ог и эскы!

— Заклад вай вартам. Талун школа бөрад мун гортад да вöч, мый көсьян. И гижав, кымын часын мый керин. А ме мөда видзөдны тэ бөрся, ставсө жө пасьяла, а сэсса гижөдьяснымос өткодялам. Ставсө висьтала, мый рыгнас вöчан!

— Ок, петөма висьталысь. А мый вылө вартам?

— Кывийö кө мыйөнкө вожалас, каднас торкся ли, ме тэныд ассьым выль часиөс сета. Меным мам тöрыг ньöбис. Киын новланаөс... Со.

— О-о! Часи!— шензьö Витя.— Но ме, либö, пöнарик кон вылас пукта. Сöмын мыйкө оз эскыссы, мый часитö сетан?

— Став мунас и ванас көсийся. Ворсся кө — сета.

Заклад вартисны. Кучкынысö ковмис Юляөс чукөстлыны. Витя, дерт, чуймис, мый Коля шуис выль часисö сетны да нöшта сэтшөм кокниа вöзйис. А мөдыс ньöти эз шогсьы. Сийö бура төдис, мый закладсö воас. А сидзкө и өчки йывсьыс чөв овны на лөö аскиөдз.

Тайö луннас урокьяс дырйи Юля некымынысь бергөдчылис Колялань, а бөрьяысьсö весиг, буракө, нюммунис. Быд видзөдлөмысь зонка гөрдөдлис да парталаньыс копыртлис юрсö.

## Коді ворссяс?

Школасьыс Витя быттьö шыш воис гортас. Видзөдалö, юрыс сöмын дзөрьялө өтарө-мөдарө, кытысянь эськө сы бөрся вермас кыйөдчыны Коля. Керка гөгөрысь, ни матысса пуйас вылысь ёртсö эз аддзы. Но пырис гортас да тупкалис



өшиньяссө, сэсся вөчис гортса уджсө, телевизор видзөдыштис. Сы бөрүн бара матыстчыліс өшинь дорас да дыркодь дзоргис ывлаө: Коля некөн эз тыдав.

«Сөрө. Вермас висьтавны, мый ме вөча, дерт нин. Ёна өд лөсьөдлыныыс ку-жө!» — дышөдіс сэсся аслыс кыйөдчыннысө, но өшиньяссыыс тупйөдьяссө эз босьтав. Зонкалөн урокьяссө вөчөма, и сийө мөдіс ворсны. А ворсанторйыс вөлі... Тө-рыт сийө ветліс почта вылө да ньөбис ыджыд плакат. Отарас серпасалөма дзоридзьяс, а мөдарыс — еджыд. Сыладорыс, еджыдыс, и коліс Витялы. Уна рөма фломастерьясөн серпасалис карта: юяс да шорьяс, вөрьяс да нюрьяс, веретяяс да сёньяс. И рисуйтис кык армия, кодьяс тышкасисны ас костаныс. Вөліны налөн и самолөтьяс, и танкьяс, и разведчикьяс, и связистьяс. Быттьө война йылысь кино вылын. А Витя вөлі сәні медся ыджыд командирнас. Сы тшөктөм серти лэбзылысны аэропортысь самолөтьяс, лыйсисны пушкаяс... Тайө ворсөмас и ылаліс Витя. Эз и казьявлы, кыдзи пуксис рыт. Зонка видзөдліс стенса часі вылас, пасйис кадсө.

— Но вот, ёртлөн часіыс аски лоө менам кыын! Мед висьтавлө, мый вөчи рытивбыднас.

А Колялы эз жө вөв гажтөм. Сийө быттьө ёртыс ордын, ськөд тшөтш ворсө. Дерт, ачыс оз вермы нинөм вөчны, а лои сөмын видзөдысьөн. И шензьө ас кежсьыс, кутшөм лөсьыд ворсөм воөма юрас Витялы. И мыйла сөмын сийөс эз кор, кыкнад эськө кутшөм гажаа ворсісны.

Асывнас Коля да Юля, быттьө сёрнитчөмаось, медводз воисны классө. Нюмъөвтисны ота-мөдыслы, и Коля кыв шутөг мыччис Юлялы өчкисө.

— Мый эськө видзөдлыны?

— Мый көсьян.

— Ассыйным керка, кодкө эм абу гортын? Ы-хы! Некоднин абу. А кызди олө детсадыын вокөй?— здук мыстиныв гораа серөктис: — Сөйөны... Воклөн чужөмыс рокнаслякөссөма... Со дөрөм соснас чышкис... Ставыс сэтшөм лөсьыда тыдалө. А позьө видзөдлыны... Москваысь Красной площадь?

— Меным юрө эз воы... Но, видзөдлы,— вочавидзис Коля.

— О-о, кутшөм мича! Быгтьө кино вылын, дзик орччөн — Кремль...

Классө пырисны водз локтысь нывкаяс, Катя да Надя, и Юля тэрмасьөмөн бөр мыччис өчкисө Колялы да вашнитис:

— Эг удит бурасө видзөдлыны...

— Эн көть некодлы висьтав,— корис Коля.

— Но,— көйысис нывка.

Витя локтис дзик медводдза урок водзвылас, да детинкаяс костын сёрниыс пансис сөмын перемена дырйиыс.

— Но мый?— юалис Витя.— Аддзылін, мый ме вөчи?

— Аддзылі, дерт.

— Мый?

— Школасьыд мунігмозыд дурпоп моз бергалін, видзөдалін, кытысянь ме верма кыйөдчыны, сэссия өшинь дорад дыр сулалін, ывла вывсө видзөдін, ог-ө кытысянькө кыйөдчы? Серам быдөн петалис: ме өд гортын вөлі, а тэ ас өшинь увсьыд менө синьяснад корсин. Сэссия ньөбөм бумага вылад рисуйтчин. Ворсны өтнад мөдін...

— Мыйысь?

— О, сэтшөм бур ворсөм юрад воөма... Вай кыкөн мөдам ворсны, тэ — лөз армиянас, а ме — вижнас. Но? Кыкнад өд гажаджык лоө.

Висьтавлө тадз Коля, а Витялөн кыв-ворыс воши, сэтшөма чуймис. Сэсса тай горөдіс жө:

— Кытысянь кыйөдчин?!

— Некытысянь. Шуи тай, мися, гортын вөлі...

— Нинөм ог гөгөрво. Ставыс сідзи и вөлі, быттьө мыш сайын сулалөмыд. Вай нөшта өти рыт кежлө нюжөдам закладтө. Аскиөдз.

— Көть мый дыра кежлө. Ставсө висьтала!— өні Коля тырвыйө нин эскис, мый волшебной өчкинас и збыльысь дзик ставсө аддзас.

Сийө рытө Витя аслыс места эз аддзы. Гортас локтөм бөрын медводз бара став өшиньсө тупкаліс, мед некөн весиг коластор эз коль. Сэсса босьтіс книгаяс, тетрадьяс да пөлатяс кайис, мед өшинь водзас не вуджрасьны. Куйліс пөлатяс, лыддьысис. Сэсса дышөдіс лыддьысьнысө да мөдіс нетшкыны тетрадьсьыс листьяссө, самолөтьяс вөчавны да лэдзавны найөс джоджө. Тетрадьыс помассис да быть ковмис лэччыны, да өд и мамыс регыд воас удж вылысь, пинялас гижтөм на кабаляөн ворсөмысь, тетрадьяссө тадз ног тшыкөдлөмысь-таргайтөмысь.

Лэччис пөлатьсьыс, чукөртис самолөтьяссө, бергөдльштис киас, но жаль лои шыбитнысө да пунктис книга джаджьяс...

Мөд луннас Коля бара ставсө висьталіс Витялы, весиг местасө, кытчө самолөтьяссө суйис, индіс. Ёртыс сэтчөдз чуймис, мый вочавидзнысө эз куж, кывзө вомсө паськөдөмөн да аслыс төдлытөг юрнас гоийөдлө.

— Төдысьө али мый велөдчан?— юаліс сөмын классө пыригас, а мөд урок помасьөм бөрын бара матыстчис да шуис: — Пырав, инө, рытнас, сета пөнарикөс...

Дузгөдчис, синваыс петмөн жаль. Пөнарикыс немецкөй, армиясьыс воча вокрыс вайліс. Проектор! Төдіс өд Коляыс, мый сійө вөчис кыкнан рытсө. Сідзкө, воис закладсө. Но кыдзи сійө төдмаліс? Ээв окота вөлі юавны, но эз. Оз өд мөд нюглясьны ёртыс водзын: висьтав да висьтав!

Юасьны кө мөдіс ёртыс, Коля, гашкө, и нырсө на лэпта-льштіс, эз висьтав, а эз юав да, аслыс окота лои ошійсьны. Чөв жө оліс, бөрынджык висьталас.

## Велөдтөм урок

Коймөд урокыс вөлі природоведение. Валентина Васильевна медводз и юаліс Коляөс, тшөктіс петны класс водзө, висьтав пө гортса уджтө. А Колялөн урокыс велөдтөм лои. Кытысь нин, рытывбыд кыйөдчигад!

Коля ньөжйөникөн сувтіс да виччысьтөмысла эз и төд, мый вөчны. Сэсса довгис дөска дорө. Төдіс — яналас. И друг сылы юрас мөвп воис: а өчкиыс эськө босьтас оз книгасьыс? Өд восьсөн со коли парта вылас.

Коля ньөжйөникөн перйис пинжак пыді зепсьыс өчкисө, пуктіс ныр вылас, крукыштіс пель саяс. Челядь акнитісны, өд найө некор на эз аддзывны Коляөс өчкиаөн. Да и өчкиыс кутшөмкө тешкодь.

Юрсө лэптіс да видзөдліс зонка вылө и велөдысь.

— Коля, мый нө, омөля аддзан? Өчкиасьөмыд тай...

Зонка яндысис ылөдлыны велөдысьсө да кыв шутөг сөмын гогнитіс юрнас.

— Но, висьтав гортса уджтө.

Коля эськө и видзөдө книгаас, да шыпасъясыс увлань юраоьсь. Босьтчыліс лыддьынысө, но сідзи мөдіс мыктавны, мый Валентина Васильевна дугөдіс сійөс.

Урокысь зонкалы пуктісны «два». Сылы зэв яндзим да немкө лои сьөлөм вылас. Медсясө, дерт, Юляысь. Мый вот өні нылыс думайтө сы йылысь-а? Дерт, дивитө, өчкинаас пө дурис да со гортса уджсө весиг абу велөдөма. Юрас Колялөн быдсяма мөвпьясыс жуисны: кызди эськө вөчны, мед өчкиыс мөдас сылы отсавны велөдчынысө. Юаласны кө аски уроксө, книгасө мөдарө бергөдны ковмас, мед лыддьынысө вермис.

Рыгнас Витя сетіс Колялы ассьыс пөнариксө, но любуйтчыны сійөн да өчкиөн видзөдчыны Колялы вөлі некор. Колө велөдны урокъяссө да локтан луннас «двасьыс» мынтөдчыны. Өд мамыс, төдлас кө, дөзмас да бөр корас часісө.

Кызди нө эськө өчки отсөгөн велөдчынысө заводитны? Волшебной, да оз өмөй отсав?

Рытывбыд сэсса книга-тетрадьөн и ноксис. Гижислыддьысис. Өчкиасьөмөн и велөдіс уроксө. Ылөджык пуктас книгасө да бара лыддьө. Мөд жыръяс петкөдліс — босьтө жө өчкиыс.

Мөд луннас Коля весиг кисө лэптіс урок вылын, да Валентина Васильевна сійөс и юаліс. Коля шарк бергөдіс книгасө, чеччис парта сайысь да зэв збодера восьлаліс класс водзө. Өчкиасис да мөдіс лыддьыны, сөмын сяркөдө. Таня, кодкөд сійө пукаліс өти парта сайын, бөр книгасө бергөдіс. Буракө, ас думсьыс, лөсьөдіс: увланыурасьөма да. Коля сэтшөма скөрмис, весиг гөрдөдліс да кырымсө чабыртліс. Но сэсса помаліс нин висьталөмсө, өд төрыт куимысь лыддьөмнад ставыс юрас бура пуксьөма. Валентина Васильевна ошкыштіс да «пять» пуктіс.

А Колялы нимкодъыс, шешгялө парта саяс. И Юля бара бергөдчыліс сыланьö да весиг нюмъөвтис: зонкаөс ошкыштіс тадзи.

Коля сэсся öдва урок помасьöмсö виччысис. Мыйöн зильöбтіс звöнок, петісны ывлаö, да ачыс матыстчис Витя дорö. Окота лои ошйысьны öчкинас.

— Көсья висътавны, кызди пöнариктö вои... Вешйылам, йöзсьыс бокö...

— Но, воин — и воин! Мый сэсся!

— Да тэ эн дузьяв, бөр сета!

— Оз туй али жугөдін нин? — гөгрöсмылісны ёртыслөн синьясыс.

— Бур пöнарикыд, эг жугөд ни. На, öчкиасьлы да видзöдлы,— мыччис Коля донаторсö ёртыслы.— Мый мөвпыштан, сйöс и аддзан.

...Витялөн шензьöмыслы помыс эз вöv. Юасьöмыслы и:

— Кытысь тайö тэныд? Татшöм дивö йывсьыс ме весиг эг кывлы.

— Но, öні гөгөрвоин, мый ме тэ бөрся эг шыш моз кыйкъяв, а гортсянь видзöді.

— Öні эска...— шуис ёртыс.

Урок костыд, дерт, эз тырмы. Мөд перемена дырйи бара Витя öчкиасьліс, ачыс ставнас шызьöма.

## Медся тöдчана морт

Сэсся Коля и мукөд челядьлы висъталіс. Мый сэки лои! Ставöн шызисны, корöны көть нин син пövнас видзöдлыны, öта-мöдыслысь кисьыс нетшкöны. Коля весиг повзис:

— Эн жугөдй, — öлөдö.

Урокъяс помасигкежлас став школаса велӧдчысьыс Коля гӧгӧр бергалісны: быдӧнлы окота мыйкӧ видзӧдлыны. А шумыс! А вензьӧмыс! Коді мый аддзылӧма — ӧта-мӧдыслы висьталӧны; коді абу на вевъялӧма видзӧдлынысӧ — оз эскы. Весиг Валентина Васильевна ӧчкиасьліс да ёна и шензис. Сэсса и мукӧд классъясысь велӧдчысьяс волісны. Коляӧс ӧдва гортас лэдзисны.

— Ми ордӧ ветлам,— корис сійӧ ӧртсӧ.— Пӧнариктӧ бӧр сета.

— Но,— шудаа нюмъӧвтис Витя.

Рытывбыд сэсса оліс Коляясын. Мыйсӧ сӧмын найӧ кыкнад эз видзӧдавын! Став вӧр-васӧ, пемӧсьяссӧ аддзылісны, ош гу пытшкӧссяныс видзӧдлісны. Америкаӧ волісны и Африкаӧ, джунглиӧ и океан пыдӧсӧ. Ӧтикыс видзӧдас-видзӧдас, а сэк кості мӧдыс мыйкӧ дум вылас уськӧдас да корас ӧчкисӧ. И тадзи вежласьӧмӧн сӧр рытӧдз пукалісны.

— Тайӧ телевизорсьыд на бур!— ошкис Витя.

Школаын Коля лои медся тӧдчана мортӧн. Быдӧн кӧсйис ськӧд ӧртасыны. Весиг гырысь классаяс! А ӧти урок бӧрын сы дорӧ матыстчис директорныс, Александр Григорьевич, да эскытӧма юаліс:

— Коля, кутшӧм ӧчкиӧн тэ став школасӧ шызьӧдін? Ноко, петкӧдлы меным.

Босьтіс киас, дыр бергӧдліс, пысаліс да дыркодъ мыйкӧ видзӧдаліс, сэсса бӧр пӧрчис:

— Эг кывлыв некор татшӧмтор йывсьыс. Ме босьтла аскӧд, а тэ урок бӧрад пырав ме дорӧ, бӧр сета.

Тадзи Коля медводдзаысь воис директорскӧйӧ. Челядь мыйлакӧ зэв ёна полісны сэтчӧ веськалӧмысь, а нинӧм повзьӧдчанаыс и абу. Александр Григорьевичыс вӧлӧма шань

мортөн. Юасис, кытысь өчкиыс сюри, да ёна и шензис: кодлысь нө пö кырнышыс пышйöдöма? Сэссия шуис, ог пö вермы физика законъяс серти висьтавны, мыйсяма тайö өчки, колö пö эськö учёнойяслы петкöдлыны да. Вöзйис арнас, каникул дырйи, карö катöдлыны.

И друг Колялы кажитчис, мый сылысь öнi мырддясны ошйысянторсö, нуасны карö да корсь сэссия сэтысь туй помсö. Чужöмыс ыпнитiс, вом доръясыс мöдiсны тiравны.

— Тайö менам өчкиыс... Менам!— ачыс эз тöдлы, кызди гөлöсыс нормис.— Карас катöданныд, да вошö кытчöкö.

Александр Григорьевич мöдiс сийöс бурöдны-такöдны:

— Эн пов, некод тэнсьыд донатортö мырдөн оз босьт. Ме öд сöмын кöсья тöдмавны, кытысь өчкиыслөн татшöм выныс? Но, ладнö, либö... Падъяла жö, мый кодкö вермас лючки висьтавны. Воштыны и збыль абу дыр,— шуис да бөр сетiс өчкисö Колялы.

## Кодi воштiс гöгыля-вугылясö

Коля и ёртыслы висьталiс сы ордын пукалiгөн: кор да кытысь сийö аддзис өчкисö. Витя сюся кывзiс сийöс, дыр чöв олис, мыйкö мөвпалiс, көрлөдлiс кымöссö, сэссия юалис:

— Кодлөн нө эськö өчкиыс? Ачыс öд кырнышыс оз новлы?

Коля лэптыштлiс пельпомъяссö: оз тöд да мый висьталас.

— Колö тöдмавны!— вöзйис Витя.

— Кыдзи?

— Öчкиыс ачыс отсалас. Пысав да тöд вылад уськөд воддза кöзяинсö,— велöдö Витя ёртсö.



— А збыль өд!— нюмъёвтис Коля да өчкиасис.

Син водзас воис дзоляник да дзескыд керка пытшкөс. Пу узыланін өти стен бокас, мөдарас — пу лабич, сьод пывсянын кодь гор — өдзөс дорас. Шөркодь тушаа пөрысь пөль пукаліс өшиньдорса лабич вылын да мыйкө някляліс. Чужөмыс вошөма дзор ус-тош пиас, сөмын ёсь сьод синъясыс вирдышглөны. Перйис вомсьыс някляланторсө, юкис шөри да мыччис орчча лабичын пукалысьлы, зэв жө пөрысь пөчлы. Мыйкө шуис, буракө, тшөктис тшөтш мутшкыны.

— О, Енмөй!— горөдсис Колялөн. Сійө дзөркнитис юрнас да повзёмпырысь видзөдліс ёртыс вылө.

— Мый, мый аддзылін?

— Ой, став мышкуөй көдзавліс!— лов шысө лөньөдөм бөрын гораа вашнитис Коля. Сійө тіралан кинас пөрччис өчкисө да пуктис пызан вылө.

— Мый? Мый аддзылін?— юасьө Витя.— Висьтав нин.

— Ичөтик зэв важ вөр керкаын дзор гөна пөль пукалө, мыйкө мутшкө. Буракө, сир. А ськөд орччөн — Ёма.

— Вөтасин? Хо-хо-хо!— сералө Витя.— Шуан жө: Ёма. Бытгьө енэж вылысь усьөмыд! Ёмаыслы сөмын вит арөсаяс эскөны! Хо-хо-хо! Он-ө нин көсйы шуны, мый вөрын олө Вөрса, ваын — Васа! Кызьөд нэм пом! Космосө лэбалөны, мукөд планетаяс нин кутшөмакө төдмалөма, а тэ — Ёма! А пөлыс, дерт, Вөрса? Сідз өд, — сералис ёртыс вылын Витя.— Вөр керкаын кө олөны пөрысь гозья, тэ ног, найө — Вөрса да Ёма?

Коля чөв оліс. Сылы забеднө лои, мый ёртыс оз эскы. Сэссия чөла чеччис, пуктис зептас өчкисө да нем шутөг петис керкасьыс.

«Мед сералё,— дөзмөмөн мөвпаліс Коля гортас довгиг-моз.— Нинөм эз аддзыв да! Колё эськө вөлі тшөктыны, мед ачыс видзөдліс. Мый эськө сэки шуис. Повзис эз? А збыльысь өд, мыйысь сэтшөмасө чегси?— асьсө нин дивитіс Коля.— Кымын мойд лыддьөма, кымын кино видзөдөма, а со повзи! Дерт, пөчыс и збыль мисьтөм, увлань өшөдчөм кузь ныра, лезь дзор юрсиа, шыла кодь ёсь сьөд синъяса. Кыдз тай чөвтліс видзөдлассө, кажитчис, мый дзик ме вылө видзөдліс, повзьөмла сьөлөмөй коклябөрөдз лэччыліс. А Витя со эз эскы. Сералё. Мед. Сідзкө, өчкиыс Вөрсаыслөн либө Ёмаыслөн, найөс со петкөдліс да!»

Коля весиг лөгасис ёртыс вылө, эз сьөлөмсянныс сёрнит ськөд, мый юалас тай, вочавидзас жө-а. Лун-мөд сэсса эз и өчкиасьлы, школаас йөзыслы петкөдлөм могысь сөмын новлөдліс, пыр на видзөдны көсйысьыс вөлі да. А рытнас аддзөмторсө гортасаяссьыс дзебасын видзис.

Өтчид Витя матыстчис Коля дорө да вөйысис:

— Ме талун вола тэ ордө. Видзөдлам Кремльысь Оружейной палата. Но? Миян өчкинад ставыс матысянь тыдалас.

— Волы,— корис Коля.

Рытнас кык ёрт бара өта-мөдыслы вежмөн видзөдалісны и Оружейной палата, и Эрмитажө волісны, важ сарлөн дворечас. Вежласисны өчкинас дөзмытөдзныс. Витя сэсса юаліс ёртыслысь:

— А пөльтө эсйөс эн нин аддзөдлы?

— Эг.

— Вай видзөдлам.

— Ачид, колөкө, а ме ог.

— Полан?— дэльөдчө Витя.

— Ог эськө пов, — вочавидзё Коля, — очки пырыд ме дорөдз, гашкө, оз жө судзөдчыны, но мыйлакө шуштөм.

— Збыль чайтан пөльсө Вөрсаөн али мый? — шензьө Витя.

Пуктіс сійө өчкисө ныр вылас да тшөктіс:

— Петкөдлы, өчкий, мый вөчө тэнад воддза көзяиныд?

И син водзас зонкалы воис пу наръя да пу лабича дзюляник керка пытшкөс. Дзор ус-тошкөн тырөм чужөма пөль пукалө ки пыдөс пасьта өшинь дорын да видзөдө ывлаө. Сэсса бергөдчө керка пытшкөслань да юрсө довкйөдлгмоз мыйкө шуалө. Витялы окота лои кывзыштны, мый нө висьталө пөльыс. И друг сійө кыліс дзуртан гөлөсөн лөвтөм:

— Кутшөм гажтөм! Öти нимкодълун и вөлі — гөгыля-вугыляй! Сизим му сайысь да сизим ва сайысь вайлісны, быдторсө вөлі петкөдлө, да со вошті, видзны козинсө эг куж. И кодлы сійө ковмис? Кула вот гажтөмысла!

Витя чечыштліс места вылас, өчкиыс уси, да пөльыс пыр и воши син водзсьыс.

— Коля, ме кывлі сылысь гөлөссө! Öчкиыд оз сөмын вөлөм петкөдлы, но сы отсөгөн позьө и кывзыны. Öчки крукыльяссө пель саяд сюркнялан да, дерт.

— И кылан? — шемөсмис Коля.

— На, кывзышт, — мыччис ёртыслы өчкисө Витя да содтіс: — Пөль, пөль и эм, ньөти абу повзьөдчысь кодь: дзор юрсиа, дзор тошка, сөмын некор нин абу шырсьылөма... Немся абу Вөрса. Шогсьө вот зэв ёна, кула пө гажтөмөйла. Сэтшөм пө бур гөгыля-вугыля вайлісны сизим му сайысь да сизим ва сайысь, а со вошті, кодлыкө ковмөма, гусялісны...

— Мый нө сійө гөгыля-вугыляыс? — шензьө Коля.

— Öчкисө, буракө, сідз шуө. Гөгыляыс — гөгрөс чөлань-

ясыс, а вугыляыс — пельяс саяс крукаланъясыс.

— Но, буракö, сідзи и эм, лөсялө,— сөглас сетіс Коля.—  
А тешкодъ кывйыс — гөгыля-вугыля. И мича. Вайлы, ме  
кывзышта.

Босьтіс сійö Витя кивысь öчкисö, пысаліс пельяс саяс да  
казытыштіс пöльöс, мед пö тшöтш и кыла, мый шуалö.

Син водзас пыр и воис пöльыс. И кывзыштіс Коля  
сылысь лыддьöдлөмөн шогалөмсö:

— Кутшөм жаль гөгыля-вугыляйöй!

Коля вештіс син водзэсыс öчкисö, и ставыс воши.

— Аддзылін? — юалö Витя.— Кывлін?

— Вывті нин тай ёна шогсьö, вошти пö гөгыля-вугыляöс.

Челядь гажтөммисны, пöльыслөн шогсьöмыс инмис.

— Нуны эськө вөр керкаас да сетны,— вöййö Витя.

— Тэныд кө сюри öчкиыс, тадз эськө эн шу! — дözмис  
Коля.— Да и кытчö на нуан? Тэ öд он тöд, көні пöльыс  
олö? Он öд бадъ увъяс бөр пысав, кытысь сюри.

— Оз позь. Сідзсö öд ми öшöдам да колям, а кодкө мöд  
босьтас. Ни пöльыслы, ни мянлы! — падъялö Витя.

Кыкнанныс чöv ланьтісны. Колялы жаль вöлі öчкиыс,  
думсыс дивитіс весиг Витяös: пыр мыйкө юрас воас сылы.  
Колö пö нуны пöльыслы öчкисö! Кутшөм йöй нö эськө бөр  
сетас татшөм бурторсö. Таладор югыдсыс кө сы пыр ставсö  
позьö видзöдны! А мөдарсянь кө, и пöльыс жаль: гажөдö,  
вөлөм, сійös гөгыля-вугыляыс. А Витя бара нин көрлөдлө  
кымөссö да тэрыба лапйөдлө син лапъяссö. Сідзкө, мый  
йылысь кө мөвпалö. Сэсса и шуис:

— Гортö муна, öні юрö немтор оз во. Аски сёрнитчам,  
мый вöчны...

## Гусятор эрдөдिसны

Колялөн шудыс помасис өти здукө, и сідз, кыздз зонка мөвпыштлыны ни чайтны эз куж.

Ужнайтом бөрын мам-батыс, кызди и пыр овлө, пуксисны телевизор дорө, а Коля пырис пытшкөс вежөсас гортса удж дасьтыны, да эз и кывлы нывкаяслысь пырөмсө. Вөсни гөлөснас тельгөдчыны мөдिसны, да вөлись петіс. Но вөлі сёр нин. Локтөмаось Витялөн ичөтджык чойыс да велөдысьлөн нывкаыс, юр вылас гөрд банта. Найө сулалісны зонкалөн мамыс дорын да дзайгисны-корисны:

— Мед Коляыд петкөдлас миянлы өчкисө. Тшөктөй, мед петкөдлас, ми тшөтш көсьям видзөдлыны,— дзайгө Витялөн Маша чойыс, вокыс кодь жө рудіник небыд юрсиа нывка.

— Мед Коляыд сетас миянлы недыр видзөдчыштны,— корө учительницалөн нывкаыс.

— Став школаыслы нин петкөдлөма, а миянлы эз на,— висьталө Маша.

Зонкалы лои сэтшөм окота петны да тодмышкавны нывкаясөс. Чабыртіс кабыръяссө, но гөгөрвоис, мый сөрмис: төдіс кө, мый локтасны, Коля эськө найөс кильчө вылөдзыс весиг эз лэдз, а өні со...

— Мый колө петкөдлынысө,— некыздз оз гөгөрво Колялөн мамыс.

— Волшебной өчкисө...

Тайө кывьяс бөрас и батыс чошкөдіс пельяссө, кывзысьө.

— Мед петкөдлас Коляыд?— муртса нин оз бөрд ичөт нывкаыс.

— Коля, петав!— чукөстіс батыс.— Мыйкө тай петкөдлыны корөны.

— Мы-ый?

— Волшебной очки!— нимкодя гордіс Маша.

«Онi бaть оз нин лэдзчысь меись»,— жугыля мөвпыштiс Коля.

— Мыйсяма очки? Вайлы, ноко, пей, татч!— стрөга корис бaтьыс.— Кытысь, кодлысь сийос вайин?

Позис эськө пыксьыны, абу пö нин менам некутшөм очки, бөр сеті, кодлысь босьтлі, но ылөдлыны бaтьсö некыдз оз позь. Быть ковмис сэсся пейыны дзебассыс волшебной очкисö да петкөдны.

Час чөж нывкаяс пыльсьялісны-сералісны, видзөдчисны очки пыр. А сэсся и мамыс да бaтьыс...

Кортөм гөстяс, кодъяс тадз эрдөдісны Коляос бaть-мам водзас, мунигас быттьö ыджыд козин вөзйисны:

— Аски бара на волам, тайö жö кадас... Аттьö!

— Ёна коланныд, ракаяс!— бөрсяныс скөрысь броткыштiс зонка. Сийö төдіс: онi ковмас бaтьыслы ставсö висьтавыны, а сьлөн оти шуөм: «Ну бөр, кытысь босьтін!»

Сідзи и лoис.

Бaтьыскөд сёрни бөрын Коля тіралысь вом дорьяса да вазьөм син дорьяса пырис аслас жырьö. Ковмас бaтьыслысь кывзысьыны, жаль көть абу сэсся очкиыс. А кодлы нунысö? Бөр лэччөдны вадорас да бaдь ув вылас өшөдны? Пөльыс нö кыдзи төдмалас, мый очкиыс кутшөмкө бaдь куст пөвстын? А горш, лөк йөз киö кө веськалас? Сэки нö бaтьыслөн веськыдлуныс бур вылө лөö? Бөрдмөныс жаль очкиыс Колялы, но көсийысис нуны, да быть ковмас нуны.

Нормөм сьөлөмөн да шог мөвпьясөн и водіс узьны.

## Воисны öти кывйö

Мöд лунö школа бöрын Витя бара локтис Коля ордö: сылөн бать-мамыс эз вöвны гортаныс да некодысь повтöг позис сёрнитны-вензьыны. Пуксисны диван вылö, мöвпалöны, кызди-мый вöчны. Витя тöдис нин, кутшöм сёрни вөлöма тöрыт ая-пиа костын. И чой вылас скöралис, мыйла сийö польскис-висьталис гусятор йывсьыс Колялөн мам-батыслы.

— Ковмас бөр нуны, а кытчö? Сэтчö, кытысь сюри? — майшасис Коля.

— Колö пöльыслы нуны, — аслас, тöрыт шулöм кывъяс вылын сулалö Витя.

— Туйсö огö тöдöй да?

— Öчкиыс и нуодас, оланінсö тай лючки öдйö петкöдліс. Каям вөр дорö, тэ öчкиасян и шуан: «Петкöдлы туйсö важ көзяин дорад». Кытчань петкöдлас, сэтчань и мунам.

— Сэтшöм тэ вежöра? А вошам кө?

— Ог гөгөрво сэсса, мый тэ көсьян? — дözмыны мöдис Витя да бара мöдис көрлөдлыны кымössö. — Тэ, буракö, полан?

— А тэ нö эськө он? — юалö Коля. — Збыль вылö кө Вöрса? Локтам да шуам: «Видза олан, Вöрса! Ми вайим тэныд öчкитö, али кызд сы ногөн: гöгыля-вугылятö. А сийö миянös — тшап! И оз лэдз бöрсö? Либö ордымтö сідз чукльöдлас-мукльöдлас, мый бөр гортö туйыс оз сюр, нэм чöжыд вöрті новлөдлас, да коркö лысьöмнымös сöмын аддзасны.

— Энлы повзьöдчы. Öти-кө, гашкө, сийö абу на и Вöрса, а мöд-кө, ми сылы бур вöчам, гöгыля-вугылясö ваям... Мыйла нö миянлы сийö лөксö вöчас? Мыйысь?

— Но, ветлам,— кывйӧ сетчис Коля.— Сӧмын тӧдан, мый колӧ вӧчны, мед некутшӧм лектор оз ло?

— Мый?

— Юр пыдӧстӧ солӧн киськавны да аскӧдыд пурт босьтны. Сов да кӧрт лексьыс видзӧны. Меным пӧчӧ висьтавлывліс.

— А менӧ велӧдіс пасьясьны, сэки пӧ Енмыс став лексьыс видзас.

Сёрнитчисны детинкаяс нуны ӧчкисӧ локтан шойччан лунӧ.

Колӧ вӧлі висьтавны та йылысь Юлялы, мед босьтлас ӧчкисӧ да пӧттӧдзыс видзӧдчас, но переменяяс дырйи челядь водзын мыйлакӧ яндысис матыстчынысӧ. Сӧмын субӧта асывводзӧ водздзык локтіс школаас да вочааліс нывкаӧс.

— Юля, талун урокъяс бӧрын ветлам ми ордӧ, видзӧдчышт нӧшта ӧчки пырыс.

— Ме ог лысьт ті ордӧ...

— Витяӧс нӧшта кора.

— Ог тӧд...

— Асыв сэсся ӧчкисӧ бӧр колӧ нуны.

— Кодлы?

— Волы, да висьтала.

— Но.

Немтор сэсся Коля эз шу, да эз и вевъяв, мӧдісны матыстчавны челядь.

Урокъяс бӧрын, книга-тетрадьяс портфельсӧ гортас кольӧма да, локтіс Юля. Родыштіс быттӧ первойсӧ йӧз ордад, а сэсся, гырысьяс пиысь некод гортас абу да, збоймис. Мый мӧвпыштӧ, сійӧс и ӧчки пырыс видзӧдӧ, а ачыс гылыда сэралӧ. Татшӧм кыпыднас Коля нывкаӧс медводдзаысь на и



аддзис, и аслыс нимкодь вöлі, сы вылö видзöдöмөн нюмъяв-  
сис. Сёрöнджык Витя воис, а сы бöрся — Витялөн чойыс  
учительницалөн нывкöд.

Аслыс, Колялы, ставныс мунöм бöрын нин сöмын веськалі  
öчкиыс. Сэтшöм гажа вöлі рытыс, а öтнас коли да синваыс  
муртса оз пет. Аски нуас öчкисö, и бара сы дорö некод оз мöд  
воливлыны. Жаль öчкиыскöд янсöдчынысö, зэв жаль... А  
Юляыс? Кутшöм мусаник сійö талун вöлі. Волас оз коркö  
сы дорö мöдысь? А мый на аския луныс ваясь? Кытчöдз,  
ылöдз-ö ковмас мунны? Воас-ö оз бöр гортас?

Татшöм гажтöм мөвпъясөн и водіс узыны.

## Пыр водзö и водзö...

Водз асывнас детинкаяс, спортивнойö костюмаöсь, курткааöсь,  
Витя пемыдлöз беретa, Коля кыём шапкаа, кыкнанныс  
кокныдик мышнопъяöсь, петісны туйö. Медводз лэччисны  
вадорö, корсисны сійö кустъяссö, кытчö коркö Коля вугыр  
шатыяссö кольліс.

Луныс пуксис мича, шондіа. Енэжыс лöзалö, ни öти кы-  
мөртор абу. Но ыркыд, кöдзыд руа нин сынöдыс. Шуйга-  
вывса вöрыслөн уна пöлөс рöмыс киссьöма, көнюрö сöмын  
вижа-гöрдаыс тыдалö, ёнджыкасö куш увъяс нин сяр-  
видзöны.

— Кыскы гöгыля-вугылятö,— тшöктіс Витя.— Видзöдлы,  
кодарö муннысö.

Коля перйис морös зепсьыс öчкисö, пуктіс ныр вылас да  
мөвпыштіс пöль дорö мунан туй йылысь. Син водзас воис  
пемыд козъяиныс, сэтчань и веськöдчисны зонкаяс. Вуджисны

муяс, чечыштлісны джуджыд бөрөздаяс вомён да ма-  
тыстчисны вөр дорө.

Луныс шондіа, а вөрас пырнысө мыйлакө шуштөм. Гашкө,  
төдтөминө лөсьөдчөны ветлыны, да сійён. Сэсся и май-  
шасьөны на: өчки вылө надейтчөмөн пыді вөрө пыран, а  
кыз нө бөрсө петан? Сувтыштлісны весиг вөрас вось-  
ковтөдз. Юр пыдөссө солөн киськальштисны, пасъясисны.  
И пуртыд налөн орданыс. Та бөрын збоймыштисны, и га-  
гаджык лов выланыс лои. Мед төдны, кодарлань мунөны,  
Витя зепсьыс матка<sup>1</sup> перйыліс — видзөдліс, мед бөрсө пет-  
ны кужасны.

И пырисны ёртъяс вөрө. Өд төдөны эськө, мый вөрыс  
налөн сикт сайын помтөм-дортөм, а шуөма, да быть мун.  
Дыркодь восьлалісны некутшөм туйтөг, весиг мудзисны, небыд,  
кузь нитш вывтійд восьлалөмыд лыа вывті мунөмысь на  
сьөкыдджык: кокыд пыдө вөйө.

— Лешмам ми тадзтө, — броткыштіс Витя.

Но регыд петісны важъя вөла туй вылө; коркө, буракө,  
таті вөр петкөдлөмаөсь. Восьлавсис өні төдчымөн кок-  
ныдджыка. Туйыс нуөдіс рытиввывланы. Вуджисны кузь-  
кодь сук пожөма яг, сэсся пырджык лои мунны пемыд козъя  
вөрті. Кыкысь быттьө вощыліс вөрыс на син водзын, өти-  
кысьсө неыджыд кыддза раскө веськавлісны, а мөдысьсө —  
ловпуа раскө. Сэті гагаджык муннысө, югыдджык, а кок  
уларыс шура-шаракылөны уна рөма кос коръяс. Кузя нин  
лои мунөмыс, бара воис пожөма яг, сы бөрын — козъяин.  
Вөрыс пыр пемдіс и пемдіс, сук козъясыс эз ёна лэдзны  
шонді югөръяссө. Козъяиныйд ветлысь-мунысьыдлы шуштөм,

---

<sup>1</sup> *Матка* — важ нога компас.

а кор чукыль сайысь быйкнитас-мыччыяс киссьытём коръя на кольквиж кыздз либё гёрд юр чука ловпу, сьёлёмныс ырк-мунлө мичлунсьыс.

Коля ныр вывсьыс эз лэдзлы өчкисё. Кык туй вожё воасны, сувтыштласны, кодарё өчкиыс индас, сэтчаньё и веськөдчасны. Паськыд туйсьыс векныдидик ордымё нин воисны, да и сийё ордымыс чөд да пув кустъясөн тырёма, сідзкё, ветлысь-мунысьыс таті гежөд. Гөгрөс нюр сайё нин петісны, сэтчөдз верст вит кымын сиктсянь, — а муртса синмөн босьтан ордымыс пыр водзлань и водзлань нуөдө. Кутшөмкө паськыд туй вомён вуджисны, и бара водзлань. Мудзтөдзныс нин восьлалісны зонкаяс, а синнаныс пыр дзөркъялөны отарө-мөдарө, туй чукыльсё арталөны, видзөдөны, кыті налы ковмас бөрсө лэччыны.

Со и туй визьыс бердіс, а керкаыс некөн на эз тыдав.

## Туйвывса мытшөдъяс

Друг зонкаяс сувтісны: кодкө быгтьё вуджөртчис пуяс сайті. Найё кутчысисны ота-мөдыслы киас да дыр чөв олісны, виччысисны, оз-ө кутшөмкө шы нөшта кыв. Но рутш ни ратш эз мун. Водзө восьлавны мөдісны зэв видзчысьөмөн. Бара кодкө вуджөртчис пуяс сайын. И бара труч ни трач кокъяс улас.

- Коді нө мянөс вомөнавлө? — гусьөн юалис Коля.
- Кодкө кыйөдчө, — шөпкөдіс Витя.
- Гашкө, бөр косам? — вөзйё Коля.
- Ветлам нин помөдзыс, мый лоан — ло!

Видзчысьёмён, зэв чёла мөдөдчисны, кос ув вылө оз тальчыны, лов шысө весиг кутёны, кывзысьёны. Но шы ни төв. А кодкө, быттьө, на бөрся кыйёдчысь эм. Полёны да ки на ки кутчысьёмён и мунёны.

Мудзыштисны да пөрөм пу вылө пуксисны шойчыны-сёйыштны. Коля кыскис мышнопсыс пуём кольк да чай термос, Витя перйис выя нянь. Нуръясигмозыс и панис сёрнисө Коля, дум вылас усьёма да:

— Витя, очки сюран лунас ме сы пыр тэнсьыд аддзылі аканьён ворсөмтө. Збыль вөлі?

— Да эг ворс ме некутшөм аканьён!— дөзмис ёртыс.— Ме вурсьыны кужа, а чой корис аканьыслы выль платтьө. Ме вури да пасьтөді.

— Ме чайті, очкиыс ылөдліс.

— Эз. Ме, гашкө, быдма да вурсьысьён лоа. А тэ?

— Ме көсья водзө велөдчыны. Окота физика бура төдны, кызди директорным миян, Александр Григорьевичным.

— Физикасө ми ог на велөдөй да...

— Меным гортись важ книга сюрлі, лыддялі нин мый-сюрө. Бательсь юаси и...

Эз кө детинкаяс повны да эз кө восьлавны төдтөминас да волывтөминас, гашкө, татшөм сьөлөм сёрниыс налөн эз и ло. А өні быттьө кодкө тшөктө восьтны ёртъяслы өта-мөдныслы медся гуся мөвпьяссө.

Муртса вевъялісны идралыштны сёян коляссө, бушков кодь төв ныр лыбөдчис. Пуяс мөдісны шуштөма шувгыны-катласьны, көнкө дзуртөм шы кыліс. «Клоп-клоп-клоп!»— неылың, быттьө, кутшөмкө ыджыд пөтка кыпөдчис. Но шыыс эз ылысмы, а пыр өти местаын швачакыліс. Ён төв ныр

нетшыштис Коля ныр вылысь өчкисө. Зонка муртса вевъялис тшапнитны, эськө сы мында и аддзылис.

Кызди здукон шызылыс ставыс гөгөр, сидз жө и бөр лонис, быттьө нинөм абу и вөвлөма. Коля да Витя сөмын видзөд-лисны өта-мөд выланыс.

— Мый тайё вөлі? — вашнитөмөн артмис юалөмыс шай-паймунөм Колялөн.

Но ёртыс немтор жө эз гөгөрво, да нинөм эз и куж вочавидзнысө.

— Бара кө төлыс лыбас, сэки киад нин босыт өчкитө, — велөдө Витя.

Воськов-мөд и вөчисны зоньяс, Коля чорыда джөмдис да нырjëвтис-уëвтис небыд нитш пиө, а өчкиыс лэбовтис ныр вывсьыс; бур, мый кийс водзланьын вөлі да удитис шамырт-нысө. Сэссия сувтис кок йылас да бергөдчылөмөн видзөдалис, кытчө вермис джөмдыны, өд гөгөр шыльыд, вутш ни мыр матигөгөрын.

— Кодкө көсийө мырддыны өчкиөс! — вашкөдө Коля.

Витя, коді водзті эз эскывлы некутшөм мутилы, өні чөв оліс, өд кыкысь нин нетшыштлісны өчкисө. Кызкө тай удайтчис на кутнысө-а. Коймөдысь кө, вермасны и воштыны.

— Вай көрталам, — вөзйис сийө, перйис мышнопсьыс ён шөрт да зэлыда көрталіс крукыльясөдыс юр гөгөрыс.

— Öні оз вош, — муртса тадз шуис Витя, бара чорыд төв ныр петіс, тайкө пасьтөг оз пөрччөд детинкаясөс, паськөмсө летө на вылысь, нетшкө. Шапкааныс кутчысисны да пидзөс-чанясисны, нюкыртчисны му бердас.

Здук мысти бара ставыс лонис.

## Вөрса да Ёма

А тайё кадас Вөрса ордө, ышкө-пошкө, лолыс тырөма, воис Ёма.

— Вөрса! Нолы, петкөдлы гөгыля-вугылятө, кодос ме тэныд вайлі сизим ва сайысь, сизим му сайысь?

— Ёма, дивит коть эн, а ме од вошти тэнсьыд вайөмтортө. Сэтшөма нин шогся, юр чукиё кушмис. Кувмөн жаль, кувмөн жаль!

— Воштин? Кытчө?

— Ю дорө кодкөлун лэччылі. Зэра поводдя сулаліс, а сійё луннас асьядорыс гажаммис. Ме и мөдөдчи, мися, Васаос тшөтш аддзөдла йи сувттөдзыс. Сикт дорланыс петі, пукала бадь куст улын. Гөгөр лөнь, шы ни төв. Менам и ойбырмунсьөма. Вөтаси, быттьө тэкөд гөтрасям, көлысь миян. Тэ важсяыд кодь мича, статья, ме — багатыр, том да ён, а став вөрса да нурса олысьыс, став мутиыс да гут-гагыс чукөртчөмаось Веж луд вылө. Сэсся друг кымөртчис, пемдіс гөгөр, енэжсяньыс ме вылө кутшөмкө төдтөм Гундыр лёкысь горөдөмөн уськөдчис. Сэтшөма чегси — нинөм ог гөгөрво. Мися, выживма, но кызкө тай Ыджыд Мутиыс видзис на.

— Сэтшөма од эн жө повзы? — шензьө Ёма.

— Узигкостыд тэ вылө кө Гундырыс уськөдчас? Чегсян он, эськө?

— Ас садяд воин да, кодос нө повзөдчысьнас чайтин?

— Ылынкөдь нин кырныш вөлі лэбө. А сэсся некод эз вуджөртчыв. Эг на од пыр казаяв, мый гөгыля-вугыляйөй абу.

— Пон, гашкө, пышйөдіс, шуан, сикт дорө петалін да?

— Чөв, пон дуктө ме и узигөн кыла, этша өмөй ме найос тшыкөддывлі. Он кө эскы, юав вөралысьяслысь.

— Өні понъястө сизим ва сайысь да сизим му сайысь жө вайоны, быдсяма чулля-пелляыс на костын эм, гашкө, абу и пон дукаось?

— Ме чайта да, кырнышыс лэбөдіс. Сөмын ог гөгөрво, мыйла сылы колө гөгыля-вугыляыс? Кор казялі, рөмыд нин вөлі, да кималасөн эськө ёнакодь корси, но эг аддзы. Мөд луннас бара ризөдлі. Лун югыдөн нин видзөдалі, но быттьө сылөма, некөн абу.

— А ме вот аддзылі тэнсьыд гөгыля-вугылятө!— юрсө дзөрөдөмөн, скөрысь шуис Ёма.— Выжывмөмыд, менсьым козинөс абу сяммөмыд видзны!

— Аддзылін?— быдсөн чеччыштліс лабич вывсьыс Вөрса.— Кытысь?

— Татчань локтөны кык детинка. Өтиыслөн ныр вылас тэнад гөгыля-вугыляыд, ме пуяс сайсянь кыйөдчи.

— Мыйла эн мырдды?

— Видлі эськө, да эз артмы. Воча дзик эг петкөдчыв, а төв нырөн кыкысь уськөдчылі да нөшта сконъөвтлі.

— Но и?— тэрмөдлө Вөрса.

— Мый «но и»? Сюри кө өд, вайи! Да стөчасө ог төд вөлі, мый тэнад, эн на висьтавлыв вошөмсө да... Мырддыны колө, сөмын вот кызди? Мөвпав, мөвпав и ачылд тшөтш, чумали юрнад!

— Ачылд зэв сюсьө пуксян, а абу жө сяммөмыд мырддыны, мича юра зарни аньөй!

— Нөшта өд тешитчө да тшетшйөдчө!— ырыштчылө Ёма Вөрса вылө.— Матынөсь оланінсянныд, татчө локтөны.

— Татчө? Гашкө, меным и вайоны гөгыля-вугылясө да?

— Ваясны, дерт, вомтö рака моз паськöд да виччысь! Выжывыд нин новлöдлö тэнö! Кор нö, кодi тэн бурсö вöчлис? Лёк керны сöмын йöзыд и кужöны! Коркö сикт дорас матын и овлим, а öни став вöрсö пузувтисны да со парма пыдöсас ковмис дзэбсьыны! А водзö вылö, гашкö, и татысь на ушымгайтчыны ковмас?

— Коркö эськö...

— Коркöсö сэсся эн казтьыв. Сэки и ме Ен туйын вöли. А öни... Ой, локтöны нин, дзик керка дорадось! Ме горьяд пыра, мед оз казавны менö. А тэ кор гöгыля-вугылятö. Оз кö мöдны сетны, ме сэки и вувзьöдча на вылö. Но?

— Но, но,— ышловзис Вöрса.

А Ёма котöртіс гор дорас, мыйкö сэни бергаліс-гöграліс, пöлясис-шуасис да сэсся гор пытшкас и пырис.

## Вöрса ордын

Детинкаяс матыстчисны вөр шөрö куткыртчöм чом кодь ичöтик важмöм да нитшкассьöм стеньяса керка дорö. Водзын тыдаліс помтöм-дортöм нюр.

— Гашкö, тані и олö Вöрсаыс?— вашнитіс ёртыслы Коля. Мöдыс сöмын чöла лэптыліс пельпомьяссö.

Öни, кор туйыс найöс вайöдіс сук парма шөрödзыс, Витя эз нин водзсась, эз нин вензьы, эз нин ыстысь орчча сиктса пöль вылö, буракö, и збыльысь Вöрса либö кутшöмкö тöдысь тані олö. Кодлөн нö сэсся вермас лоны татшöм öчкиыс? Öд весиг школаса директор эз вермы вочавидзны, мыйла быдтор петкöдлö гöгыля-вугыляыс. Сідзкö, и кöзяиныс öчкиыслөн абу жö йöз пövстын бергалысь морт. Буракö, и збыль Вöрса.



— Мый петкөдлө очкиыд? — вашкөмөн жө юалис Витя.

— Тайё керкасө да өдзөссө и аддза.

— Мөдарө бергөдчы да мөвпышт өчкиыслөн көзиян йылысь, — велөдө ёртыс.

Коля бергөдчис гортланьыс нырөн, но аддзис сөмын ичөтик керка да пыран өдзөссө.

— Сийөс жө петкөдлө, көть кодарө ог бергөдчы.

— Сідзкө, воим. Колө пыравны, мый лоанаыс — ло! — шуис Витя да воськовтис керкалань.

На юр весьтти лэбис съод кырныш, но зонкаяс весьтын ни керка гөгөрыс кытшлавны, ни тыдаланаинө пуксьыны эз лысьт, тыдалө.

Детинкаяс кайисны кык содъя нитшкассьөм кильчө вылө да тотшкөдчисны өдзөсас. Некод эз вочавидз. Коля нөшта таркнитис өдзөсас:

— Кодкө нө эм абу ловья тани?

Ньөжйөникөн воссис өдзөсыс, дзирйыс гораа дзуртыштіс. Зонкаяс весиг чур-чермунины. Пызан дорын, лабич вылын, пукалис еджыд тошка пөль да сюся видзөдіс на вылө. Съод синьясыс лэчыда югнитлісны. Коля пыр и төдіс: тайё и эм өчкилөн көзияныс.

— Пырөй, — өдзөсыс моз жө дзуртыштіс пөльыс.

Полігтырйи зонкаяс төрөдчисны өдзөсөд.

— Пырөй да пуксьөй, пуксьөй да ваксьөй, чеччөй да гыжъясьөй, — бара дзуртыштіс сийө. Буракө, шмонитис, но серамыс некодлөн эз пет, детинкаяс сөмын чөвтлісны өтамөд выланыс синьяссө.

— Но, мый нө висьталаннид, том молодечьяс, кутшөм могөн воиннид? — киргис-сёрнитис пөль.

— А ми... мыйкө... со...— мөдліс шуавны Витя, кытчө и вошөма збодерлуныс.

Коля тувкнитіс сылы бокас, мед ланьтас. Ачыс перйіс өчкисө морөс зепсыыс, кытчө пуктыліс керкаө пыртөдз, да мыччис сійөс Вөрсалы:

— Тайө тэнад?

Мөдыс босьтіс киас, вайөдіс син дорас.

— Менам, менам! Кытысь нө тиян гөгыля-вугыляөй, менө гажөдысьөй, му выв өшиньөй менам сюри?— пөль сэтшөм ёна нимкодясис, өшинь дорын югыд вылас видзөдаліс, ныр вылас пуктыліс. Читкыртліс синъяссө да «и-и-и!»,— нимкодя чилөстіс, тайкө оз йөкты.

Сійө нимкодясис дзик ичөтик кага моз, да детинкаяслөн полөмыс быри. Найө нюмъялөмөн видзөдісны сы вылө.

Но Вөрса друг сувтіс да горөдіс:

— Ёма! Пет! Гөгыля-вугыляөс со зонкаясыс вайисны.

Детинкаяс тайө кывъяссьыс кутчысисны-шашаритчисны өта-мөдас да кынмисны-измисны, пышйыныс оз слөймыны.

Горсянь мөдіс кывны кашкөм, кодкө ружтігтырйи кыссис сэтысь. Сэсса мыччысис кос съөд кабыр, ротйыссьөм сос, да вөлись кыліс киргана гөлөс:

— Отсав! Гырйысь да горйө, горйысь да гырйө, некутшөм шойчөг! Ог ов, а песся.

Вөрса нюжөдіс сыланьө кисө, отсыштис, и детинкаяс аддзисны Ёмалысь саөссьөм мисьтөм чужөмсө да весьөпөрмөн горөдөмөн уськөдчисны өдзөслань. Витя джөмдіс тагөсас<sup>1</sup> да уси, Коля — сы вылө. Чеччынысө эз вевъявны — найөс кутіс Ёма.

— Эн полөй, эн полөй!— кыз сөмын кужис да вермис, меліа шуаліс Ёма.— Пуксьөй, кос чөдлачөн номсөдлам.

Киясөдыс кутөмөн Ёма нуөдіс пызан дорас да пуксьөдіс детинкаясөс өшиньдорса лабич вылө, а ачыс лажыньтчис өдзөсдорса пуклөс вылө. Пышъян туйыс зонкаяслы лои тупкөма. Коля синсө чөвтліс өшинь вылас, оз-ө позь сәті, пикө кө воасны дзыкөдз, петны, но ичөт вөлөма, он төр.

Ёма шыасис Вөрса дорө:

— Петкөдлам ми налы гаж, мыйла гөгыля-вугылятө гусялісны! Кхе-кхе!— серөктыштис сійө да мыччөдліс вижөдөм кузь пиньяссө. Чужөмыс сьлөн вөлі сьөд, синьясыс сьөдөсь жө, нырыс гөрбыля, дзор юрсиа, паськөмыс ротйыссьөма.

— Ми эг гусялөй, ми вайим, кор төдмалім, кодлөн,— дорйысис Витя.

— А коді Вөрсасө вадорас повзьөдіс узигкостыс?<sup>1</sup>— вегыльтчылөмөн юалис Ёма.

— Ми өд ог төдөй,— өдва кывмөн нурбыльтис Коля.

— Кытысь нө тиян гөгыля-вугыляыс?

— Кырныш вөлі лэбөдө да уськөдіс, а ме босьті. Сэссия төдмалім кодлөн да вайим со,— висьталіс збыльсө Коля.

— Узигкостаыд гусялөмаөсь,— шыөдчис пөль дорө Ёма.

— Тэ менө йөйө пуктан? Ме абу на выжив! Эз вөвны матын челядыс, дукныс, мый волөмаөсь, эз кыв ни,— дорйис зонкаясөс Вөрса.— А кырнышсө и ме аддзылі.

Ёма казяліс, мый вермасны өні, йөз дырйи, Вөрсакөд зыкө воны, кыв вылө сетчис да вежис сёрнисө:

— Гашкө, инө, и збыльысь кырныш. Нолы, видзөдлы ме вылө, эг-ө саөссьы горъяд пукалігөн?

— Саөссьөма ныр бокид, ниртышт.

---

<sup>1</sup> Тагөс (важ кыв) — порог.

Ёма сос вом дорнас чышкыштіс ныр боксьыс сасё.

— Нёшта кыті?

— Абу кө сэсся некыт-а.

— Рёмпёштантё вайлы, видзёдла.

— Абу менам.

— Но и олысь, нинём тэнад абу! Менам гортын стёнын ёшалё. Быд лун видзёдча да мичмёдча.

Детинкаяслён татчё муртса серамыс эз пет, зэв нин тешкодён кажитчис татшём мисьтёмыслён мичмёдчёмыс.

— Лоё тэныд и рёмпёштансё вайны,— водзё сёрнитис Ёма.— Сійё од абу гёгыля-вугыляйд, сикт дорысь сюрё, оз ков сизим ва сайё да сизим му сайё ветлыны.

Челядь пукалісны кын нисьё сывось, юрсё ёшёдёмаось, мёвпалёны, кыз эськё татысь пышйыны бурён-ловьяён. Со од кутшём лэчкё веськалісны, кызкё вермасны оз мынтёдчыны-а? Коліс, инё, ёчкисё төв нырыслы и сетны, мед нёбёдіс.

Сэсся, буракё, Ёмалён лолыс лёнъыштіс, бур ногён нин видзёдліс зонкаяс вылё:

— А ті эн полёй. Ме од эг тёд, чайті: узигкостаыс гусяліныд... А сідз кө... ті миянлы бур вёчинныд, ми тиянлы лёксё огё жё туналёй. Вермам кө, мыйёнкё отсалам.

«Кутшём нин отсөг тайёясянь, ловйён көть нин, эськё, мынны?»— вирдыштіс Коля юрын.

— Мый нё, кывнытё нылыштінныд?— юаліс Вёрса.

— Вердышт туй выв йёзсё,— ловзис Ёма.— Сус пу кольсё сет, мед килясны, кос чёдлачтё да кос чёдтё вайышт. Тшактё найё коснад оз няклявны-а.

— Збыль од, көн нё менам сус пу коллыс? Кёнкё тані, джаджйын?— мёдіс сійё корсьысьны. Сэсся вайис пызан вылё ыджыд сёй гырнич тыр коль.— Чёсмасьё.

Детинкаяс видзөдлісны ота-мөд выланыс да полөмпырысь на нюжөдісны кияснысö гырничлань.

— Киллысьсö, киллысьсö!— гөститөдö Ёма.— Талөн өд бырö кö, ме вая. Менам сус пу колбыд быдса ота сепыс<sup>1</sup>. Менам ставыс эм: пувйыд — тшан тыр, турипувйыд — тшан тыр, кос чөдйыд — ота сепыс, кос чөдлачыд — ота сепыс, кос тшакыд — йирк выв тыр, уръяс ваялісны. Четверик кос чери Васа сетіс, эм лагун тыр сур, тагйыс йирк вылын вон тыр. Талөн өд,— өвтыштіс сійö Вöрсалань,— бöбылялö отнас да, нинөм абу, мый ме вайышта — сійөн и олыштö.

— Тшаксö ме эськö и ачым косьта,— эз сет нинөмө асьсö пуктыны Вöрса.

— Медтыкö нöшта и тшак эн косьты, кильчö бокад быдмö да.

— Тэ өд сы мындасö отнад эн жö вермы дасьтыны, уръясыд да мутияс кö эз отсавны,— тшетшійөдчö Ёмакөд Вöрса.

Детинкаяс збоймыштлісны, веськыда нин вöлі видзөдöны Ёма вылö, а мутиястö казьтыштөм бöрын синъяснас бара кодзлавны мөдісны, кызди эськö татысь писькөдчыны-петны.

— Сөйö, сөйö!— бара шыасьö Ёма.— Нуръясьöй, бур сьөлөма пиян. Öні өд бур йöзыс этшаөнöсь нин. Важөн йöзыс ёна бурджыкөсь вöліны. Öні тай мыйлакö лөкмисны-а, ми вылö усьласьöны нинөм абусьыс. Ті эсканныд жö, мый ми Вöрсаыскөд лөк вöчысьяс? А-а?

Зонкаяс чöv олісны.

---

<sup>1</sup> Сепыс — мешök.

— Кодлы ми лёксö вöчлім? Ті кывлі́нныд коркö, Ё́ма пö талы лёк керöма? Кы́влінныд?

— Эг,— вочавидзис Коля.

— А меöн челядьöс повзё́длöны, со кытчöдз олі. Көть эськö кувны, да кувнысö ог вермы. Абу меным Ы́джыд Енмыс тшöктылöма кувнысö.

— Повзё́дчыланныд жö: вöралысьяс висьтавлывлöны,— сёрниö пырöдчис Витя.

Коля весиг йöжгыльтчис, татшöм кывъяссö ёртсянныс кыліс да. Мыйла нö Ё́масö дöзмöднысö да дэльöднысö.

— Дзик повзё́дчышттöгыс öд оз жö позь, сэки и збыльысь дзикöдз вунöдасны йöзыс миянös,— тшетшкыштіс Вöрса.

— Важөн нö мöд нога вöлі олöмыс?— юалö Коля, думсьыс көсьö бергöдыштны сёрни сюрöссö нбылыдджык.

— Важөнсö? Ё́на важөнсö? О-о! Бур олөм вöлі! Гашкö, ті онöй и эскöй, а зэв бура овлім! Сідз öд, Вöрса?

— Овлім.

## Ё́ма — Йомала

— Öні менö шуöны Ё́маöн, — босьтчис висьтавлыны сійö.— А водз вöлі ы́дждöдлöны Йомалаöн. Ен туйö менö йöзыс видзлісны, зарниөн кышлісны. Эзысьсö да зарнисö кок улö пуктывлісны. Копрасьлісны меным, бурö тшöктылісны велöдны да туйдны, мывкыдсö корлісны содтыны. Ё́на менö пыдди пуктылісны. Ме дорö вöлі локтöны медся шудтöм луньясас: юксöны шогнас, отсöг корöны. Шудаöсь кө, волöны жö: сөйöны-юöны, гажöдчöны, кевмысьöны, мясянь бурсö и водзö вылö на виччысьöны.

Ме өд сэки эг тани ов, а Вой саридз дорын. Өтчид пыжөн воисны викингъяс, ылі муысь лёк войтыр, луннас йёз оланін вылө уськөдчылісны, а войнас ме дорө локтісны, пөрччөдісны менсьым дона паськөмөс, мырддисны зарни-эзысьсөс, нуисны бур да дона көлуйөс. Грекө вөйтчи ме сэки: кори Ыджид Енлысь, мед путкыльтас саридзас налысь пыжсө. А эз ков меным тайөс вөчны. Сійөн, гашкө, и мыждіс менө Ыджид Енмыс да туналіс тадзсө овнысө, кызди өні ола.— Ёма чөв олыштис, мыйкө мөвпалыштис ас кежсьыс, сэсся водзө мөдіс висьтавлыны:

— ...Мөд луннас воисны ме дорө йёзыд, аддзисны, кызди тешитчөмны ме вылын локтысьясыс, ёна бөрдисны да ёрисны сійө лёк викингъяссө. А менө бөр вөччөдісны, мичмөдісны, Ыджид Енлысь прөща корисны, мый эз вермыны менө дорйыны.

Дөза дыр на сы бөрын бура олім. Бара лёк йёз воисны, лунвывсянь, выль Енъясөс вайисны, мөд ног налы кевмысьөны. Менө вөр шөр вөрө вөтлісны. Дыркодь на эськө пикө воөм йёзыс ме дорө гусьөн воывлісны, а сэсся вочасөн вунөдны пондісны. Туйяс нитщялісны, боръяс турунсялісны. Некодлы ковтөм лои. Сэсся и Йомала мича нимөс менсьым вунөдісны. Ёмаөн кутісны шуны. Весиг челядсьө меөн повзьөдлөны, ерөмаканьясыд. Бергөдны кө эськө сійө кадсө бөр, кутшөм лөсьыда сэк овлім, йёзлы отсасьлім. Сідз өд, Вөрса?

— Сідз...— ышловзис мөдыс.

— Тэнө өд пыдди жө пуктылісны йёзыс.

— Вөвлі,— лабутнөя вочавидзис Вөрса.— Но и повлісны, ме сэки вына вөлі да. Повны дугдісны, и вынөй быри.

— Мича тэ сэки вөлін, Вөрса,— ошкыштөмөн шуис Ёма,

а сэссия гусьон вомгоруласмоз содтыштіс: — Öні öд лысөм чукчи кодь-а.

Детинкаяс шпыньмунісны, а Вөрса абу, буракө, кывлөма мисьтөмторсө, ошкыны кутіс и Ёмаөс:

— И тэ банийөм көвдум кодь вөлі, Йомала.

— Шөвктуг кодь ме вөлі. И төдан, дыртө олі да мый ме гөгөрвои? Менө сэки йөзыс радейтісны, ошкисны, ме вөлі олана и колана, и ме маръямоль дзоридз моз дзоридзали. А лёкөдны мөдісны, да урөсми. Тэ öд, Вөрса, сэки том йөра кодь ён да мича жө вөлі. А йөз пинялөмсыд тай лебзин жө, пөрысь пөль лоин.— Ёма бара ас кежсьыс броткыштіс: «Кырнышысь повзьөмыд садьтө воштытөдз». Сэссия бара гораа: — Вөрса! Коркө волас оз нин сэтшөм кадыс, кор мянөс бөр мөдасны бурө пуктыны? Ок эськө! Сэки ми тэкөд томмылам на, и вынаөсь на лоам.

— Тэ эськө, Ёма, и öні на абу вынтөм да.

— Выныд менам эм на! Ме öд ог зутшвидз керка пельөсын тэ моз. Йөзыс кө öні менө дугдісны чукөстлыны отсөг вылас, ме и мөд ног на дінө сибөдчыны верма. А тэ вынтөммин, пөрысь чукчи моз гортад куткырвидзан-пукалан да.

— Сідз эськө да,— сетчис пөль.

— А тэ шевкнитлы вына бордъястө, кытшовт вөрсө пасьтала-кузяла ногыс, выльысь петкөдчыв став ловъя ловыслы, висьтав, мый тэ ловъя, вына!— велөдө Ёма.— Сэки тэнө воддза мозыд жө кутасны пыдди пуктыны!

Кывзисны детинкаяс налысь сёрнисө, и эз төдны, вөт али вемөс тайө, эскыны али не.



## Нюр весьтын тыш

— Но, рытьявыв нин шондіыс катовтчис. Гортаныс тайӧяслы колӧ,— шыасис Вӧрса,— ылӧдлан сёрни-басинад. Аттьӧ бур вӧчӧмсьыныд, челядь. Талун быттьӧ ме и збыль томмышті, асыв, гашкӧ, и вӧрӧ петала, Ёма шуккыв, шызьӧда матігӧгӧрсӧ.

— И ме талун быттьӧ томмышті,— чеччыштіс пукала-нінсьыс Ёма.— Эмӧсь на тай бур йӧзыд. А, гашкӧ, и ми-чаммышті на, важсӧ казтыліг. Ок, тэнад, выживлӧн, рӧмпӧштаныд абу, некытчӧ син чӧвтлыны. Гортӧ кӧ ог шутӧвтлы видзӧдчыштны.

Томмыштӧмӧн да ёнмыштӧмӧн висьтасисны, а некутшӧм вежсьӧм зонкаяс эз казавны: кутшӧмӧсь вӧліны, сэтшӧмӧсь и колины.

— Энлы,— сувтӧдіс сійӧс Вӧрса,— нуӧд детинкаяссӧ гортаныс.

Коля да Витя видзӧдлісны ӧта-мӧд выланыс повзьӧм синьясӧн. «Ёма! Нуӧдас! Кыдзи? Рос вылын али гырйын? А оз-ӧ уськӧд лӧбӧдігас? Кыпӧдас-ӧ куимтӧ?»

Петісны керкаысь, Ёма берд<sup>1</sup> пельӧссьыс босьтіс рос, быгыльтіс гыр, дзик жӧ сэтшӧмӧс, кутшӧмӧс аддзывлан сиктса важ керкаясысь, сӧмын, гашкӧ, муртса паськыдджык. Ачыс чеччыштіс гыръяс, тшӧктіс зонкаяслы сы бӧрӧ пуксьыны да кутчысьны. Зонъяс, дерт, эз эскыны, мый гыр вылын позьӧ му бердысь ордчыны да кыпӧдчыны вывлань, но кывзысисны Ёмалысь, тӧрӧдчисны сы дорӧ.

---

<sup>1</sup> Берд (важ кыв) — стен.

— Но, бур туй!— өвтыштіс кинас Вөрса, коді петөма жө найөс колльөдны да сулаліс муө пырөм, нитшассьөм кильчө вылас. Öвтчан киас и кутіс өчкисө.

Друг веськыда керка вевт вывсяньыс Вөрса вылө уськөдчис кырныш, мөдыс виччысьтөмысла уськөдіс гөгыля-вугылясө, но муөдзыс өчкиыс эз во, ён нырнас лэбач крукаліс сійөс да лэбөдіс.

— Чеччөй!— равөстіс лёкгоршөн Ёма да путкыльтіс челядьөс нитш вылас. Ачыс лыбөдчис гырнас да уськөдчис кырныш бөрся, роснас өвтчигтыр. Нюр шөрас и вөтөдіс.

Пансис чорыд тыш. Кыліс чилзөм да горзөм. Из моз мөдласны усьны нюрас, сэсся качласны вылө. Шердйыссьө кырныш гөн, лестукъясөн гылалө Ёмалөн ротйыссьөм паськөмыс.

Вөрса да детинкаяс шемөсмөмөн видзөдісны на вылө. Отсавны ни торйөдны тышкасьысьясөс найө эз вермыны.

— Ок!— өттшөтшмоз артмис куимнанныслөн. Найө аддзисны, кызди гөгыля-вугыляыс тольсмуні-уси зыбуч нюр ваас. Тайөс казялісны и тышкасьысьяс: найө торйөдчисны өта-мөдсьыс да мөдісны лэбавны нюр весьттіыс. Ёма гурйысьыштіс нюр нюйтас роснас, но, буракө, весьшөрө. Сэсся сійө медбөръяысь уськөдчыліс кырныш вылө, лёкысь летйис сійөс сьыліөдыс да энөвтіс. Ачыс мудзөма, упкөмөн воис Вөрса дөрө.

— Некор аддзывтөм вылө нин воши гөгыля-вугыляыд... Нюрыс нылыштіс сійөс,— ловсө лөнбөдігмоз шога висьталіс Ёма.

— Аддзылім,— жугыля вочавидзис Вөрса.— А мыйла нө сылы, сьөд бубыляыслы, ковмөма гөгыля-вугыляыс?

— Висьталіс... Саридзсайса Гундырлы, вёлём, нуо, да вадорын бадь пиас уськөдөма. Көсйөма эськө бөр судзөдны, да зонка вугыр шатъясөн вөтлөма.

— Дзик сідзи и вөлі,— гогнитіс юрнас Коля.

— А Гундырыслы нө мыйла гөгыля-вугыляыс?

— Көсйылөма воыны татчө, пасьвартны йөзлысь ов-мөсьяссө, а войтырыс вылын лоны медыджыдөн. А коді пө сылы паныд сувтас — ставсө чишкалас.

— А кырнышыс сылөн вер<sup>1</sup>?

— Вөлөма эськө, но гөгыля-вугылясө кө пө судзөдан — ыджыдө инда, көсйысьөма Гундырыс. Со и зільө вёлём. Тэа-меа, Вөрсаөй, эськө Гундыр гыжъяс улас жө веськалім, гөгыля-вугылясө кө кырнышыс нуис. А өні найө вынтөмөсь.

— Но и мед, вөйи кө гөгыля-вугыляөй зыбучас, Гундырлы эз ло лёк вөчөм вылас,— өвтыштіс кинас Вөрса.

— Миян йылысь со вунөдісны, пемдас регыд,— шуис Колялы Витя.— Кыдзи нө гортө мунам? Вошам өд...

Вөрса тайөс кылөма да шуис Ёмалы:

— Лэбөд челядьсө. Мам-батьыс виччысьөны.

## Гортө

— Пуксьөй, зонкаяс,— тшөктіс Ёма,— да кутчысьөй, мед он усьөй.

Ёма пуксис медводзас, рос вороп помыс киас; сы бөрө кавшасис Коля да родөмпырысь кутчысис гыр дорышас, Витя медбөръяөн төрөдчис, шашаритчис Коляө.

---

<sup>1</sup> Вер (важ кыв) — слуга.

— Сюрс во ов, Вөрса,— горөдіс Витя.

— Ме велөдча да тэныд гөгыля-вугылятө выльөс вөча,—  
содтіс Коля.

— Оз ков. Кыдзкө-мыйкө сытөг нин,— бөрыньтчис  
Вөрса.

А лөсьыд, вөлөм, гырнад лэбны: оз зөркөд, оз лувкйөдлы  
төв вылас, Ёма роснас бура бөжалө, да бөр личалис лов  
выланыс — нимкодъ: пыжөн, поездөн ветлывлісны, весиг  
самолётө нин сөвлывлісны, а вот гырйын... Дырджык на  
эськө сынөдтіыс лэбалісны, да со сиктыс нин тыдовтчис.  
Оз-ө нө кодкө найөс сиктсаяс пиысь видзөд? Оз кө аддзывны,  
өд некод оз эскы. Пывсянъяс сайө, град йөрьяс дорө и чеччөдіс  
найөс Ёма.

— Но, бура олөй,— бурсиис,— коркө, гашкө, дыр кадөн  
и аддзысьлөм на лоө.

— Зэв ыджыд аттьө, Йомала,— горөдіс Витя.

— Аттьө, Йомала,— бөрсянныс йөлөгаалис Коля.

И друг зонкаяс казялісны, мый Ёма томмыштіс, мичам-  
мыштіс, кузь нырыс дженьдаммыштіс, а ёсь синъясыс шань-  
мыштісны.

— Бур кывъяссыныд мед и асланыд олөмныд шудаөн  
лоө,— сынөдсянь нин вочавидзис Йомала.

Котөрөн кайис кильчө содтіыс Коля, пырис посводзас,  
босьтіс киас кызсюрө шыбитлөм вугыр шатьяссө, кыклаті  
көрталіс көвторйөн да лэптіс йирк вылас — локтан гожөмөдз.

# ВЕКНЫДИК ОРДЫМ

*повесть*

— Галка!— горөдіс Эдик, латшкөс тушаа да топыд сёркни кодь ар дас кыка кымын ён детинка, коді трустик кежсьыс петёма кильчө вылө. Сійё кыскыштіс сынөдсө нырнас да нюммуни: кыліс еджыд бобөнянь көр.

— Абу ме тэд галка, а Галя,— мыччысис гоҗся кухня өдзөссянь еджыд юрсиа, вөсни ки-кока да ёсь ныр-вома нывка.— Галкаыс комиён төдан, мый лоө? Чавкан. Мый сэсса, ме тэд чавкан лои? И-ки-ки-ки,— шпорөдчыштіс кияснас Галя быттьө лэбач.— Да и чавканыс съөд. А ме — еджыд. Аддзан,— аслас юрсиө инмөдчыштіліс нывка.— Мыссьы со өдйө,— индіс кухня стenas тувъялөм көрт мыссян доз вылө,— да лок сёям.— Бөр воши кухня өдзөс сайё.

— Öдйө, өдйө,— нерыштіс Эдик Галяөс.— Быттьө ме татчө сиктас кутшөмкө удж вылө вои, кодөс тэрмасьөмөн колө вөчны, а эг шойччыны. Öдйө чеччы, өдйө сөй, өдйө пасьтась, өдйө мун. Öдйө-өдйө, а вот ог өдйө!— мыччыліс кывсө детинка да пуксис кильчө сод вылө.

«Ачыс мед өдйөасьө. Абу ме робот сылы,— дөзмөмпырысь мөвпаліс Эдик.— Радлі, кор мама шуис: сиктө пө мөдөдлам августнас шойччыны. Мися, дышөдіс жө нин челядьлы лагерас, олан быттьө салдатыс армияын: өти кадө вод, өттшөттш ставкөд чеччы, сьөрсьөн-бөрсьөн столөвөйө мун.

Кутшөм сәни шойчөм! Вот, мися, сиктын лоо вöляыс! А веськалі этійö чавкан дорас!— Эдик нерыштөм могысь шпорөдчыштис жö кияснас бордъясөн моз да быттö котсыштис: «Öдйö, öдйö, öдйö, öдйö».

— Эдик, мый сэтчö сибдин кильчö вылас? Öдйö мыссы,— бара кыліс Галялөн гөлөсыс.

Детинка ышловзис, он öд мөд пыр вензыны ыджыдджык воча чойыдкөд, да лэччис кильчö сод кузя.

Друг сылы син улас уси потшöс мөдарсыыс, суседъяслөн йöрсыыс, детинка, юрөн куздыжык Эдикысь, вöсньыдик, кузьмөс вижов чужөма да гырысь сьод синъяса. Сійö вöлі кузь кока дөмаса гача, гөрда-сьода клеткаа вель ёна быгалөм дөрөмсö лэдзалөма гач вылас. Паськөмыс ставыс нин нөим, регыд пырыс мөдас тыдавы, көть и сөстөм.

— Ха-ха-ха,— серамыс петис Эдиклөн, чуньнас индис сійö детинка вылө.— Полөкалө!— кынөмас кутчысис Эдик сералөмысла.

Кор кухня öдзөсөд мыччысис Галя, Эдик нин быгласис кильчö пөлөныс быдмысь веж турун вылын да сералис.

— Эдик!— чукөстис сійөс Галя.

— Ха-ха-ха, полөкалө,— индис Эдик сусед йөрö, но сәни некод нин эз вöv.

— Дыр-ö мөдан йөйтавы?— скöрыськодъ чилөстис Галя.— Öдйö, мися, мыссы.

Зонка чеччис эжа вылысь, чышкыштіс пидзөсьяссö сибдөм турунысь, мыськис кияссö, чужөмсö, чышкысис көрт тувйын öшалысь еджыд ки чышкөдö да пырис кухняö. Пызан вылын вöлі руалö колькъя рач да пражитөм чери.

— Мый нö сэтшöма сералин?

— Суседъясылөн полөкалө вылас.

— Кутшөм полөкалө?

— Кутшөмкө тай зэв кузь детинка, кос паренча кодь съод да омоль, чагйö кö крукасяс, пöрö.

— А, сідзкö, воöма,— нюркнитіс Галя.

— Коді воöма?

— Но пиыс суседъясылөн, тетя Ларисаыслөн. Вошöма вöлі кытчöкö. Вежон эз волы гортас. Мамыс керкаысь керкаö ветлөдліс, корсьысис лимзалигтыр. Бурджык эськö мед юнысö дугдіс. Кыдзи юсясны гозъя, сідзи и пышйö Санькаыс. И некод оз тöд, кытчö. Сэссия недыр мысти бöр воас. Аддзöмыд, код вылын серавнытö. Сідз нин сійö став йöзсьыс öтдортчö, а тэ нöшта тешитчан. Юрыд ыджыд, а мывкыдыд ичöт.

— А мый нö, полөкалө кодь да.

— Тэ эськö кутшөм вöлін, тэнад кö бать-мамыд юысьöсь вöліны.

— Ме эськö муні на дорысь. Ачым олі.

— Ланьт, кытчö на эськö тэ и мунін.

Сейыштöм бöрын да тасьті-пань идралöм бöрын Галя петкөдіс чуман да бидон.

— Вöрö ветлам чöд вотны. Бöрти рытнас йöлөн сейны вайыштам. Тэныд бидон тыртны.

— Тайöс?— киас босьтіс Эдик да син весьтас лэптöмөн бергөдлыштіс.— Тайöс ме öти здукөн тырта, и тшын оз петав!

— Тшын оз петав? Ха-ха-ха! Чöд вотігөн нö кутшөм тшын петас?— öдъялі серавны Галя.— Ой-ой-ой, кочкавтөдз лои.

— Но видзөдлам! Тэ тыртөг локтан, а менам чукийөн лоö.

— Эн на ошйысь, кыйтём ошсö эн куль, — вомалис Эдикöс чойыс.

Тайö мугов чужöма да русыд юрсиа детинкаыс Галяясö воис тöрыт. Мамыс карын пуксьöдöма автобусö да мөдöдöма, а Эдик зэв ёна нырсö лэпталö, ме пö öтнам ветлöдлысь нин. Сийö Галяысь арөн ичөтджык, но чойыслысь ёна оз жö лөсьöдчы кывзысьны, ас юрөн ныртчö овны.

Бидонсö öшöдöма тасмаас, кыкнан кыыс прöст, босьтöма ньöр да туйдорса петшöрсö кералö, нöшта чеччыштлöмөн на.

«Дзоля петук», — нимтис ас кежсьыс сийöс Галя, кодi лабутнöя осьлалис вокыс бöрся вöрлань.

Вöли мича гожся шондиа лун. Ъвлаыс ымралис шоныдысла. Сикт весьтын гөвкъялис гожём көр: öтлаö чукöрмöмаöсь сэтöр да öмидз, косьмём турун да быд сикас дзоридз көръяс — апап мыйта көсьян. Матöджык вöрланьыс нин ставсö вевттьö козъя-пожöма сир көр.

Сиктысь петём бöрын чоя-вока осьлалисны муяскостса борти, вöр дорас вотöдз вуджисны посни виж дзоридзьяса уразнöй туруна нейджыд видз. Сэссия туйыс лэччис увлань. Öвтыштис ыркыдөн, улис көрөн. Тшем сулалысь бадь пуяс сайын шуныгис паськыдкодь лөнъ шор. Сы вомөн шыбитöмаöсь кыз пöv: кодкө тай татчöдз катöма, абу дышöдчöма.

Шор дорö воём мысти Галя кежалис джуджыд коз динö, кияссö суйлис лапъяс костас, кыскис чибльöг, гумовтис сöдз васö да юыштис, сэссия мыччис Эдиклы. Зонка бергöдлыштис киас пелька вöчём важмыштём нин чибльöгсö, көсийс гөгöрвоны, кыдзи колö гартыштны сямöдсö, мед артмöдны доздук. Сэссия сöдзтыштис шорсьыс васö да чурснитис. Көдзыд ваыс ёнтыштис пиньяссö. Сылөн юём бöрын нывка бөр суйыштис чибльöгсö тöдса местаö.



— Кор метөг волан, босьтлан кө, бөр важинас пукты,—  
ыджыд морт моз велөдө сійө воксө.

— А коді чибльөгсө вөчис? — юасьö Эдик.

— Бур морт. Ме ог төд, коді. Тайö чибльөгыс нэмөвөйся.  
Кор киссяс, выльөс вөчасны кужысь йөз да бара татчө  
пуктасны.

— Та йылысь ме төда. Лыддьывлі öти книгаысь, мый  
коми войтыр важысянь кутöны ассьыныс традицияс, быд  
шор вуджанінын эмөсь чибльөгъяс, кодөс вөчөма сямөдысь,  
мед туй выв морт вермис шойччыштны мудзвывсьыс, юыштны  
сөдз ва.

— Да, тэ ставсө сөмын книгаысь и төдан,— броткыштіс  
Галя.

— Вот и локті, мед ас синмөн унатор аддзывны. А тэ  
лоан менам экскурсоводөн. Тайö шорыс кызди шусьö?

— Көдзыд шор.

— А мыйла шусьö Көдзыд шор?

— Мыйла? Ваыс көдзыд сідзкө, шулөмаөсь сідз важ йөз,  
и ставыс.

— Эк тэ... «Шулөмаөсь, и ставыс», — нерыштас Эдик.—  
Тэ шор йылөдзыс кайлін коркө?

— Эг.

— Вот сійө и лёкыс, мый тэ нинөм он көсйы төдны... А  
ме ставсө көсья төдны.

— Ставсө төдны көсйысь,— прыльснитіс-серөктіс  
Галя.— Уна мөдан төдны да водз пöрысьман.

— А мый? Колөкө, тэныд висьтала, мыйла тайö шорыс  
шусьö Көдзыдөн.

— Висьтав.

— Вермас лоны кык ног. Гашкө, шорыс петө көдзыд нюрысь, визувтө вөрті да та вөсна оз вевъяв шонавнысө. Либө мөдтор: босьтчө шорыс көдзыд ключысь. А медым төдмавны, код ногыс збыль, колө ветлыны шор йылас. Ветлам, туялам заводитчөмсө и төдны мөдам.

— Но,— көсийысис Галя.

Шорсө вуджөм бөрын вывлань катөдіс паськыдкодь, буракө, коркө вөр кыскавлөмаось, но нитшсялөм нин туй.

— А тайө туйыс кызди шусь?— оз өвсьы Эдик.

— Ош гу дор туй,— вочавидзө Галя.

— Аддзан. Ош гу дор туй. Мый йылысь тайө висьталө?— школаын велөдысь моз лэптіс кисө да чургөдіс чуньсө Эдик.— Сідзкө, тані, туй пөлөныс, вөлөмаось ош гуяс.

— Тайө и сідз гөгөрвоана,— чушмуніс Галя.

— Сідзкө, сідзи и колө висьтавны, тэ өд экскурсоводыс. Вот мичаа и висьтавлы.

— Но, кывзы. Мунам ми Ош гу дор туйті. Гөгөр пожөма том вөр. Гырысь пуяс абуось. Сідзкө, мый йылысь тайө висьталө?— дзик Эдик моз лабутнөя мөдіс сёрнитны Галя.— Вөрсө неважөн ставсө нуөмаось. Веськыдвылас ялаа яг. Нөшта сійөс шуоны Чудь гу ягөн.

— Чудь гу яг? Энлы, энлы. Ялаа яг — сійө гөгөрвоана, а Чудь гу яг... Чудьяс йывсьыс ме лыддьывлі. Важөн овлөма сэтшөм йөз чукөр, шулөмаось найөс чудь белоглазая. Но важ картаяс серти найөс петкөдлөмаось рытиввылынджык, өнія Архангельск обласьт местаын. А артмө, мый найө и тані овлөмаось... Интереснө! А мый, ми кө тэкөд вөчам научнөй открьтие? Висьталам, мый чудь белоглазая йөз котыр овлөма и тані, Коми муын, коркө зэв нин важөн, кор комияс эз на вөвны татөн.

— Ха, научной открытие, — шпыньмуні чойыс. — Быттьо та йылысь некод оз тод! Серам петкоддысь. Став йозыс тодоны.

— Тэ немтор он гогорво. Отитор, кор сиктсаяс тодоны, модтор, кор петас научной статья научной журналын. И тайос гижам ми. Дерт, кор ставсө тодмалам. Коді тиян сиктын медся порысьыс. Одийо-одийо висьтав.

— Ме ог тод, гашкө...

— А мый тэ тодан? Татшөм ичот сиктад колө став йывсьыс ставсө тодны. Позьо вочны картотека, гижавны сэтчө, коді кутшөм воо чужома, и тыдавны модас.

— Да, мода ме ставос гижавны, быттьо мен сэссия вочныс нинөм, — дөзмөмпырысь броткыштіс Галя да олөдіс воксө, — эн триньгы сэссия. А медпорысьыс миян сиктын Педьо пөль.

— Оні гогорвоана. Оти-кө, колө тодмавны ставсө Көдзыд шор йылысь. Талун видзөдлам Чудь гу яг, сийо матынджык. Жаль, мый метровка эг босьт, колө вочны стөч карта: көні мылькьяс, көні нөптовьяс, гураньяс. Сэссия ветлам Педь пөль дорө, оз-ө мыйкө висьтав. Та бөрын модам кодйысьны, кызд настоящой археологьяс: видлалам гураньяссө да мылькьяссө. Гашкө, сэтчө гуасьлісны чудьясыд? Гашкө, тайо налөн важ шойна? Аддзам важ уджалан көлуй, тасьті торпыригьяс, нывбабаяслысь мичмөдчанторьяс. Ми йылысь газетьяс гижасны...

— Да, дерт, — шмонитөмөн торкис детинкаос чойыс. — Төрытья газетын вөлі нин, Эдик Макаров пө сиктө воома, чудьясөс корсьны.

Но вокыс эз лэпты серамсө, а водзө вылө лад лөсьөдіс:

— Асыв локтам татчө карта вочны. Эк, жаль, мый талун аскөд нинөм абу: ни кабала, ни метровка, ни ручка. Кывзы,

Галка, а мый ме кө бөр гортө лэччыла, ставсө, мый колө, босьта и локта. Эг на өд ыло муной, ме зэв өдийо шутөвтла. И модам вочны карта.

— Аха, — дивитөмон юрнас довкнитис Галя. — Öнi сийо бөр лэччас гортө, босьтас карандаш, локтас вочны карта. А кодi нө модас чөдсө вотны? Мамыд, весиг, тшөктөма косьтыштны, а тэныд аслыд сөйныгтө дыш вотныд. Он лэччыв. Пырам вöрас да вотчам. А асыв позьö и выльысь воыны. Лок ме бöрся.

Галя кежис шуйгавылас. Öнi найос кытшалисны вöсньы-дик том пожөмьяс, кок уланыс кажгис еджыд яла нитш, көнсюрө чукөрөн-чукөрөн быдмисны яг выв путникьяс, веж петкөдлисны асланыс мичлунөн өтка гут кулан тшакьяс. Яг вывти муныштөм бöрын вöрыс вежсис, тшөкыдджыка мөдисны вочаасьлыны коз пуяс, лой пемыдджык да улисджык. Сэссия и паныдасисны мичаник чөд кустьяс.

— Лок татчө, тани зэва, — корис Галя Эдикос. — Татчө сувт да кыкнан кинад зiля вот. Öтитөг.

Чойыслөн индөминыс и збыль вöли лөзсьыс-лөз. Чөдийыс быдмис джуджыдкодь вутш гөгөр, буракө, сись мыр нитш-кассөма да сийос и овмөдөма чөскыд вотосыс.

— А тэ нө кытчө?

— Ме бокөджык муна. Мудзи тэнад больгөмысь. Пель сьөдмис. А тэ кужан вотчынысө? — муно нин вöли да выльысь бергөдчис вокыслань нывка.

— Мый тан кужнысө? Нетшкы да пуктав дозьяд. И сөмын.

— Нетшкөмнад кыд ляксяс. Тэ улисянныс вөрөдышт вотөссө, ачыс киад усяс.

Эдик босьтис киас гырысь пемыдлөз тусьяс. Кутшөм

мичаоьсь! А чоьскыдось! Галя велөдөм серти и збыль вөлөм бурджык вотнытө: куст улас сюян киястө, вөрөдыштан тусьяссө, асьныс гылалөны кырымад. Сидзкө, воөма нин. Но кутшөм ньөжйө тырө дозйыс! Кымын китыр нин пунктис Эдик, а пыдөсыс на эз вевттыыссы. Мый тайө чавканыслы юрас воөма: чөд пө колө вотны. Эдиклы тшөтш сы вөсна ковмас тані мышкырасьны, а сйө мөвпыштлыны эз куж, кутшөм сьөкыд да гажтөм удж тайө вөлөма. Вөлі кө эськө тадз: локтін вөрө, сувтөдін дозмуктө пожөм лыс улө, ачыд котралін, ворсін, видзөдалін вөрсө, а бөрсө мунигөн босьтін чукийөн тыр дозмуктө и лэччин гортад. А тусьөн-тусьөн вотныд өна дөзман. Но мед, талун кызкө-мыйкө нин, а асыв Эдик нинөмысь оз босьт бидонтө. Сө пөв бурджык Чудь гу яглысь карта вөчны. Вот тайө лючки удж, сьөлөм сертиыс зонкалы.

Мудзтөдзыс лои вотчыны Эдиклы. Мича тусь вөсна муыслы эз өтчыд копыртчыв. И мышкыртчөмөн вотчис, и пуксьөмөн, и пидзөсчанысьөмөн, весиг водліс, чөдйөн лякосьтис джинсы гачсө. Да и чөд кустьяс пөвстас быдмысь зынтуруныс матө воштис: юмов-чад көрыс юрсө кольмөдіс. Одва мөдіс тырны дозйыс. А кор Галякөд өта-мөд дорас воисны, видзөдліс Эдик сы дозйө да чуймис: тыр нин.

А рытнас гортас нырсө лэпталісны чоя-вока: любө ошкөмыд. Да и кутшөм чоьскыд чөдья йөлыс!

Ужнайтөм бөрын нин петісны Эдик да Галя кильчө вылө, чөв-лөнь пукыштисны шоныд пемыдас. Лунтырья уджыс төдчис: эз нин вөв окота ворсны ни дурны. Чөв-лөньсө торкаліс суседьяслөн восьса өшиньті кылысь сёрниыс, сьыланкыв друг горөдлөмыс. Медсясө төтя Ларисалөн чилзан гөлөсыс:

Мыйла, мамö, уна вурин,  
Мыйла уна лосьöдін?  
Неужели лишной лои,  
Верос сайö модöдін?

— Бара гажъялöны...— гажтöминика шуис Галя.

— А мый, быд лун тадзи?

— Лун кык тай чöv олісны. Яндзимныс абу. Санькаыс нин эновтöмакөд öткодь. Гожөмбыд гортас оз ов. Няньла сöмын волас.

— А көні нö сійö олö?

— Некод оз төд. Талун ми кытчö кайлим, сійö туй вывсьыс аддзывлöмаось тшак корсялысьяс. Гашкө, ылі вөр керкаö кайывлө, гашкө, көнкө аслыс чом вөчис.

— И узьлө сэн? Войнас? Оз пов?— шензьö Эдик.

— Оз тай.

— Да, смел морт. Ме эськө сыкөд төдмаси.

— Сійö оз радейт йöзыскөд сёрнитнысö. Йöзыс сійöс жалитöны, а Санькаыс тайöс оз лэпты.

— А мый сійöс жалитнысö? Коньөр туйын кө оліс гортас, эськө позис жалитны.

— А вöрас öтнасөн овнысö абу коньöралөм?

— Кыдз тайöс нөшта гөгөрвоны. Сійö вöля корсьö. Петкөдлө, мый вермө мод ног овны, оз виньгыртөмөн. Ачыс.

Кыліс суседъяслөн öдзöс крапнитөм шыыс, кодкө котөртис-вуджөртчис дзиръялань, сэсса öдзöсыс модысь воссис да ывлаыс тыри тетя Ларисалөн горзөмөн:

— Санька, Санька, он лысьт мунны. Мунан кө, ме милицияös кора. Корсясны тэнö. Санька! А-а!— гораа бөрддзис сійö.— Санька!— нор гөлөсөн нин здук мысти

шыасис сійӧ.— Эн мун, жалитышт мамтӧ. Менам съӧлӧмӧй потӧ тэ вӧсна!

— Потас,— вомгорулас броткыштіс Галя.— Потӧ кӧ вӧлі, важӧн нин дугдін юнытӧ. Пырам,— корис сійӧ Эдикӧс.— Вой.

Мӧд луннас Галя бара лӧсьӧдчис чӧд вотны, петкӧдіс чумансӧ, а Эдик босьтіс ыджыдкодь кабала лист — важ плакат, метровка, карандаш, ручка, вӧлалӧм да ӧтар помсӧ ёсьтӧм ичӧтик тувъяс, вӧсньыдик кузь кӧв. Пыркнитіс-ректіс карысь вайӧм кӧлуйсӧ уна рӧма мича рюкзаксьыс, тэчис сэтчӧ став коланасӧ да пысаліс паськыдкодь волюсьяснас мышкас.

Чудь гу ягӧ воӧм бӧрын лэдзис мыш вывсьыс нопсӧ, перйис сэтысь дасьтӧм-тэчӧмсӧ да прӧстмӧмсӧ нин ӧшӧдіс пу увйӧ.

Сэсса весаліс увъясысь да ньӧръясысь кос места, вольсаліс сэтчӧ плакат, пельӧсьяссӧ гартовтчӧмысь кутышталіс росъясӧн, улиас суйыштіс гортсьыс жӧ катӧдӧм пӧвтор. Босьтіс метровка, ичӧтик пу тувъяс да босьтчис туй боксянныс мерайтны ягсӧ. Чойыс сюся видзӧдіс сы бӧрся. Нывкалы кажитчис тешкодӧн Эдиклӧн ноксьӧмыс, но чӧв оліс. Мед, колӧкӧ, вӧчӧ карта, окота кӧ, а сылы тайӧ весь уджӧн кажитчӧ. Бурджык мунны чӧдъяинӧ да вотчыны.

— Эдик, ме мӧді,— шыасис сійӧ.

— Но,— чӧвтіс вокыс, весиг эз бергӧдчыв.

Галя вуджис ягсӧ, пырис козьяинӧ, аддзис зэваин да мышкыртчис вотчыны. Киясыс пелька чукӧртисны чӧд, а мӧвпъясыс бергалісны вокыс гӧгӧр. Галя мӧвпаліс, мый со Эдик, арӧн сыысь ичӧтджык, но унджык лыддылӧма, унджык

төдө, көть мукөддырйиыс и кажитчө Галялы тешкодьөн. Абу тай дышыс, кутшөмкө карта көсийө вөчны. А мыйла? Кодлы сийө картаыс колө? Весь кад воштөм. Карта вылө кө пасъян быд мыльк, мый сыысь вежсяс? Походө ветлыны позьё, сэни век нин мыйкө выльтор аддзылан. А карта рисуйтөмыс дзик веськодь. Мед, колөк, эськө рисуйтчө да. А Галя татшөмтор вылад кадсө оз мөд воштыны.

Эдик паськыд оськолөн, а стөчджыка кө чеччалөмөн мерайтис яглысь кузьтасө, сы бөрын пасьтасө яг заводитчанинсьыс да яг помасянинсьыс, сэсья бергөдчис да пасйис кабала вылө. Ставсө: Ош гу дор туй, Чудь гу яг — серпаліс плакат вылө, петкөдліс шор, сөмын дженьыдика, өд шорыслысь заводитчанинсө колө на вөлі төдмавны. Бөрнас Эдик карта вылө пасьяс сылысь став чукыль-мукульсө. Сідзжө петкөдліс козьяин, көні Галя вотө чөд. Яг вывсьыс пасьяліс мылькъяс да гуранъяс. Коли төдмавтөм сөмын өтилаті, ягыс сәті пельөсөн моз пырис пыділань, сәтчө и мөдөдчис Эдик. Пожөмъясыс тані вөліны сәтшөм жө веськыдөсь, кутшөм и яг шөрас, сөмын, гашкө, тшөкыдджыка быдмисны. Ялаа нитшсө гөгөр вожмавліс көчвөнь.

Зонка дзоргис пожөм туганъяс вылө, весиг шутьяліс мунигмозыс. Друг сылөн кокыс дзумгысис кытчөкө гуө, зонка нетшыштчис, медым мездыны коксө, но вөйи и мөднас, а сэсья став тушанас пырис гуө.

— О-о-о! — горөдіс сийө повзьөмвывсьыс, и кыліс, мый сийөс кодкө кватитис кыкнан коктіыс да кыскис увлань.

— О-о-о! — лөкгоршөн равөстіс Эдик. Сылысь кияссө чорыда кутісны, бергөдісны мыш саяс, көрталісны вөсни вөньөн, коді зэв ёна дойдіс кияссө, вомас суйисны кутшөмкө ветьөк. Эдик ланьтіс. Югыд шонді бөрас тані кажитчис



дзурс пемыдён. Сөмын усян розьтыс пырис ичөтика югыдыс и, синъясыс велалыштём бөрын сійө көсийс бурджыка видзөдлыны, кытчө веськаліс, но и синъяссө көрталісны рузумён.

Эдик некыдз эз вермы гөгөрвоны, мый сыкөд лои. Медводз, кор сійө вөйи кокнас гуө, чайтіс, мый ош гуө веськалі. Да эз ёнасө и повзбы, төдіс, мый август төлысьнад ошъясыд гуын оз шняпвидзны. Но кор сійөс кватитісны кокъястіс да кыскисны увлань, сылөн муртса сьөлөмыс эз пот повзёмысла. Чайтіс, мый му пытшкас сійөс сюра мутиясыс кыскөны. Сэки и артмис лёкгоршён горөдөмыс. Но кор сійөс мөдісны разбойникөс моз көртавлыны да вомас рузум сүйисны, гөгөрвоис, мый тайө морт. Но коді, либө кодъяс? Мый сыкөд өні мөдасны вөчны?

Зонкаөс вештыштісны. Өні сійө куйліс кымыньён кос чөскыд көра турун вылын, сідз жө нырас чапкис ньыв көр, буракө, турун улас вольсалөмаось, но став тайө көръяссө вевтгис пожөм сир көр. Сійө нетшкысьыштіс, көсийс шедөдны кияссө, но нинөм эз артмы да ковмис ланьтыны. Турун сиясыс гильөдісны чужөмсө, но вештыштнысө сійө эз вермы.

Эдик кывзысьыштіс. Гөгөрвоана, мый веськаліс сійө му чомйө. Олө тані өти морт, унаөн кө вөліны, эськө шыасьлісны нин, өта-мөдыскөд сёрнитісны. Нөйтны сійөс, буракө, оз мөдны, сөмын вот дыр-ө видзасны? И мыйла сійөс кыскисны татчө? Буракө, тайө дзебсясьысь морт, шыш, коді овмөдчөма сикт дорө неылө. Асыв, гашкө, тшөктас вайны нянь, сөян. И ковмас вердны пышйөм мортөс? А, колөкө, сійө кутшөм мыж вөчис.

Зонка мый вынсьыс зіліс сьөлыштны вомсьыс ветьөксө, но нинөм эз артмы. Мудзис куйлыны кынөм вылас да бергөдчыштіс веськыд бок вылас. Мудзис и тадзи. Лолавнысө

сөмын ныр пырыс вөлі сьөкыд. Мөдліс пессыны, но зэлы-  
да көрталом вөсни гезыыс дойдіс кияссө. Дыр-ө нө сійөс  
тані видзасны? Час куим нин, буракө, коли. А, гашкө,  
унджык нин. Зэв ылын кыліс горзөм шы. Эдик лэптыштліс  
юрсө да кывзысьыштіс: гашкө, Галя сійөс корсьө. Мед эськө  
татчө оз жө лок, өд и сійөс вермас кыскыны шышыд. А  
сылы, нывкаыдлы, сьөкыдджык тані лоө. Мед нин мый вөчөсө  
мекөд вөчө. Бара, быттьө, көнкө гөлөсьяс кылісны. Сэсся  
став шыыс быри, воши, лои чуналана лөнъ.

Эдик казяліс, мый сійөс йөртысьыс мөдіс нурьясьны,  
разаліс рудзөг нянь көр. Мөдіс петны дульыс, сэтшөма  
сюмаліс кынөмыс.

— М-м-м,— ымөстіс сійө. Шышыс, буракө, гөгөрвоис  
Эдикөс, кыскис сы вомысь ветьөксө да суйыштіс нянь. Эдик  
азыма мөдіс нямлясьны. Сэсся шышыс мөд нянь тор суйис,  
да и коймөд.

— Юыштны вай,— корис Эдик.

Кыліс ва кисьтөм шы, сэсся сы вом дорө вайөдісны чибльөг,  
вом дорас инмис сямөдыс, да сы серти гөгөрвоис зонка.  
Горшасьөмөн ырситіс дэбыд ва.

— Разь кияссө,— тшөктіс Эдик.

Мөдыс чөв оліс.

— Пельтөм али мый? Разь! Он кө, горзыны мөда.

Шышыс бара матыстіс сы вом дорө ветьөксө. Эдик  
повзис да бергөдіс юрсө мөдарө, сэсся көйысис:

— Ог, ог горзы. Лэдз менө гортө. Воштасны. Корсьны  
локтасны.

Эдик кыліс, мый шышыс чеччис да, буракө, петіс чомсьыс,  
либө юрсө сөмын мыччыліс: лов шыыс эз кыв здук-мөд.  
Сэсся кыв шутөг кыскыштіс Эдикөс дөрөмөдыс, быттьө

шуис, чеччы пö. Эдик сувтис да вöчис сідз, кыздз тшöктис шышыс. Мöдыс тойлалігтыр индаліс. Содъя путі кайис вывлань да петіс гусьыс. Ыркыд гу бöрад вöлі торъя нин шоньд да лöсьыд. Но шондїыс эз нин сот, дерт нин, рыгъядор.

— Синсö кöть разь, уся кытчöкö, — корис Эдик, но мöдыс эз кывзы, нуöдіс сійöс тойлалігтыр.

«Бокиянь кö, быгтö, киноын, — визьнитіс Эдик юрын, — со сійöс кутисны вөрөгъяс да нуöдöны лыйлыны». И сэтшöм жаль лои Эдиклы ачыс аслыс, мый син доръясыс вазисны, а чышкыштны ни гыжйыштны вöлі некыздз. Туйыс лэччис увлань, тайöс Эдик гөгөрвоис кок ув му сертиыс. «Сынöдыс лоис улисджык, буракö, шор дорö воим. Сідзкö, сиктлань нуöдö», — нимкодъмис детинка.

Шышыс йöткыштіс Эдикöс шорас да бөръяысь тойыштігмозыс нетшыштіс ки көртöдсö. Зонка весиг ойöстіс виччысьтöмысла, кор кокъяссö кеды пырыс ёнтыштіс йиа көдзыд ваыс. Вөрöдыштіс да пыркнитіс позялöм кияссö, сэсса вöлисы разис син көртöдсö. Бергöдчис бөрвыв — сэні некод эз вöv.

Ывлаыс вöлі рöмдö нин, вöрыс öні Эдиклы кажитчис шуштöмөн. Сійö тöдіс Көдзыд шор вуджанінсö, сыкөд орччөн вöлі поскыс, но эз нин кай сэтчö, а кокнас пыдöссö видлалігмоз вуджис мөдарас. Сулыштіс нöшта здук, гөгөрбок видзöдалöмөн, сэсса тай кыздз ризнитіс сиктлань, коклябöрыс сöмын югнитліс. Сикт дорас нин тэрыба котöртöмсьыс ышкөпошкө вочаасис Галякөд да Толя дядьыскөд, кодъяс петöмаось кайны вөрö сійöс корсьны.

— Эдька, кытчö вошлін, яндысьтöм бугыль, дзебсяян мейсь! Повзьöдчан, — тракйис чойыс зонкаöс.

Но вокыс шöйöвошöмөн чöv оліс.

— Тадз мöдысь эн вöч, Эдуард, — ыдждöдліс тыр нимнас

сійос Толя дядь, Галялөн батыс. — Өтлаын кайинныд вөрө, өтлаын и лэччыны колө. А то Галя син гөрдөдтөдзис нин бөрдөма, пока корсьысьөма. Оз ков тадз вөчны.

— Ме мөдысь ог, — шуыштіс муртса кывмөн Эдик да лэдзис юрсө. Быттьө сійө мыжа. Быттьө ас көсьёмсьыс рытөдзис вөрас оліс. Висьталас көть шыш йывсьыс, да оз өд эскыны. Шуасны, лөсьөдлан пө.

Рытнас, ужнайтөм бөрын, Галя, Эдик да Толя дядьыс пукалісны кильчө вылын. Дядьыс куритіс өти папирос да пырис керкаас телевизор видзөдны. Сэки вөлісь висьталіс Эдик чойыслы, мый ськөд талун вөлі.

— Эн ылөдчы, — эз эскы Галя.

— Да збыль, мися. Кайлам аски да корсям му чомсө, кыйөдам, коді сәні олә.

— Йөймин? А бара кө кутас? Шышыдлы нө мый?

— Пыр и повзин. А он эскы.

— Ме ог төд. Дерт, колө мыйкө вөчны. Гашкө, батьöлы висьталам, мед юөртас, кытчө колө.

— Эн тэрмась. Асыв ветлам да асьным кыйөдам. А сэсса нин тыдовтчас, мый вөчны. Сөмын тэ — ша! Некодлы эн больгы.

Мөд луннас Эдик шуөм серти кайисны вөрас сөрөн, сэки, кор нин став вотчысьяс лэчисны. Эдик арталөм серти, шышыс вермас петны чомсьыс сөмын водз асыв либө рытланьыс. Водзсө чеччыны абу окота, а рытнас медся бур. А йөз ветліг-мунигад шышыд гусьыд оз пет.

Эдик муніс быд некымын воськов бөрын сувтыштлөмөн да кывзысьыштөмөн. Галя быд пуысь поліс да сөмын синнас гөгрөдліс өтарө-мөдарө.

Кор матыстчисны матö сійö местаас, кытчö вöйис Эдик, сувтисны. Сэсса зонка öвтыштис кинас, вод пö. Галя лажынътчис пу сайö ялаа нитш вылö, сэсса водис кымынь. Эдик — орчча пу сайын. Кыкнанныс видзöдисны водзлань, көни зонка шуом серти колö лоны му чомйислы. Но некод некөн эз тыдав, эз кыв рутш ни ратш. Галя мудзис видзöдны öтилаас да вештис синъяссö, юрсö пуктис кияс вылас. Мед, колökö, Эдик кыйöдчö, сылөн кө окотаыс. Ёна тай. Тадз чöвлөнён коли часөн-джыйён кымын. Галя весиг ойбырмунли. Садьмис Эдиклөн вашнитöмысь:

— Видзöд!

Галя лэптис юрсö да видзöдлис водзлань. Воськов комын сайын кодкö нюкыльтчöмөн мошкоритчис. Галя бурасö сійöс эз аддзы, сы вöсна, мый тöдтём морт да сы костын вöли пашкыр понöль. Сэсса сійö веськөдчис да кыйкъялигтырйи бергөдчис чужöмнас челядьлань.

— О-о, да тайö жö Санька!— гораа шуис Галя да сувтис.

Мöдыс сёрнисö кылём бöрын уськөдчис котöртны.

— Позьö мöй нывьяслы мыйкö висьтавыны!— чарöстис Эдик чойыс вылö да уськөдчис вöтöдны.

Мöдыс чашйис-пышйис вөртиыс. Эдик аддзис сійöс: яг вылад да гежөд пожөм косттыд бура тыдалö. Тöдчис, мый пышйысьыс чотö. Вöтöдис увтасінын нин, дзик Көдзыд шор дорас, сöмын ёна вылынджык сійö местасяньыс, кытi вуджавлывлісны шорсö. Эдик вöтöдигмозыс чорыдакодь тувкнитис Санькалы мышкас, мыйысь мöдыс, быттьö кытчökö конйыштчис, нюжөдчис васөд турунвиж нитш вылас. Эдик öд вывсьыс чеччыштис да лои сы вылын.

— Тэ, вöрса, мыйла тöрыт менö гуас лунтырсö видзин? А?— и сетовтис сылы сьылі тшуптас.

— Весаь!— бергөдчис Санька да шыбитіс ас вывсьыс Эдикөс.

— Тэ мый, дикөй?— равөстіс сійө.

— Ачыд тэ дик!— вочавидзис Санька тэрыба котөр-төмсьыс ыджыда ышлолалөмөн. Бөр бергөдчис кымынь да ланьтіс.

— Тэ мый, гуас и олан?— дыркодь чөв олөм бөрын юалис Эдик.

— А тэныд нө мый?— юалөмөн жө вочавидзис Санька.

— Ошкө пөран.

— Тэ мед он пөр,— вомгорулас мургыштіс Санька.

— Петкөдлы му чомтө,— корис Эдик.

— Нинөм сэн видзөднысө.

— Петкөдлы, мый жалитан. Лунтыр нин ме сэні шняп-видзи. Местасө өні төда и.

Здук-мөд чөв олыштөм бөрын Санька чеччис, пыркнитіс дөрөм-гачсө, пидзөс весьтгыс да гырдыза дортгыс көтасьөма васөд нитшсьыс, да чөвтіс:

— Ветлам либө.

Галяөс найө адзисны дзик гуө пыранінсьыс. Мусө ёна видлалігтыр сійө гөграліс өти местаын.

— Мыйкө воштін?— юалис Эдик.

— Ог адззы гусө. Öд кыськө татысь петіс,— гораліс Галя.

Санька нюмъяліс, сылы нимкодь вөлі, мый оз дзик пыр синманьыс усьсылөн дзебөмторйыс. Гуө пыран розьсө адзис Эдик. Гу вомас вольсалөма росьяс да вевттьөма ялаөн.

— Вот тайө да! Сэтшөм кужөмөн дзебөмыд. Он кө выліас во да тальышт, кыдзи ме төрыт, нинөмысь он казьяв,— шензис Эдик.

Санька вешталіс яласö, росъяссö да ачыс медводз и лэч-чис, Эдик пырис сы бöрся, Галя — медбöрын. Пемыдас синьясыс велалöм бöрын челядь сюся видзöдалісны гөгöрбок. Санькалөн оланіныс вöлі ыджыдкодь, морт нельлы позьö вöлі узьмөдчыны. Пельöсъясас бытшлалöма майөгъяс да на бердö тувъявлөмөн посни пожөмъясөн кышöма стенъ-яссö. Йиркыс сэтшөм жö пожөмъясысь, сөмын, гашкө, инö кызджыкысь. Со мыйла сэтшөм ёна тöрыт кыліс Эдиклы пожөм сир кöрыс. Öти пельöсын ныв лыс лапъяс, кос ту-рун, фуфайка, кутшөмкө пальто шой, сэні, буракö, узыланіныс. Мөд пельöсын пөвйысь вөчөм пызан. Пызан вылас ыджыд важиник эмалированной чайник, кружка, чибльөг, кутшөмкө тубрас, буракö, сэні кутшөмкө вөлöга.

— Ваыд эм? Горшö косьмö,— юалис Эдик.

— Чайникас. Ю.

Юыштөм бöрын Эдик завидьпырысь нөшта öтчыд кытшовтöдіс синьяснас чомсö.

— Дыр кодйысин?

— Вежон кык.

— А мусö кытчö новлін, некөн оз тыдав да?

— Эстчань, яг увтасінланыс лэччөдлі. Сэтчö тшак ни вотöс оз пет, некод кокнас весиг оз тальччывлы. Оз аддзыны. А казьяласны кö, дерт, шензыны мөдасны, кытысь пö татчö муыс воис. Тулыснас кодйысьлі, кор йöзыс оз зэв шöйтны вөртіыс.

— Санька, но тэ и морт! Татшөмтор кужөмыд мөвпыштны да вöчны. И дзебөмыд — некод оз аддзы!— öттшöтш нимкодясис да шензис Эдик.

— Ме ог гөгөрво тэнö, Санька,— шызьöма Галя.—

Мый тэ тани сэсса лун-лун пукалан? Татшөм мича луннас тэнад му улын овсьö?

— Оз жö эськö да,— водзсасьö Санька.

— А мый нö оз кö? Тадз öд йöйман! Ошкö пöран!

— Войдöрлун пемыднас локтигөн лёк ног тальыштсис менам да кокйö музгыльтчис, сы вöсна со мöд лун нин тани. Ог ёнасö ветлöдлы, мед öдйöджык бурдас. Да тi тай со он сетöй бурдöдчынысö. Талун со котöрти да, гашкö, нöшта лёкджык лоас.

— Музгыльтчöминсö колö топыда кöртавны, вай ме...

— Ог. Ачым бöрти,— яндысис Санька нывкаысь.

— Но, а сiдзсö мый вöрас вöчлывлан, кор он вись?— юасьö Эдик.

— Ветлöдла, видзöдала, вöрсö тöдмала. Ыли вөр чомъясöдз воöдчывли, сэни вежонъясөн овльивли, став матигөгöрсö собавли. Радейта быд лун выльлатi гөгöртны: сiдзсö унджык аддзылан, унджык мöдан тöдны.

— Но, Санька!— Эдик гөлöсын öни öттшötш кылис вежалöм и ошкöм.

Сийö бара на малышталiс пожöм стенъяссö, кинас видлис пызансö, ён-ö, оз-ö лег, дзөрöдыштис топыда тэчöм содъя пусö.

— Кывзы, Санька, а вай ми татчö штаб вöчам. А? Гожöм кежлас. Тэ лоан начальник штаба, ме — командир, а Галка — радövöй,— вöзйис Эдик.

— А-ха! Тi командир да начальник, а ме радövöй. Дерт, нин. Мед ме вылын командуйтинныд?— эз сетчы Галя.

— Но, сiдзкö, тэ лоан лейтенант. А, Санька, ворсам?

— Ог. Йöзасям сiдзтö. Ставөн мöдасны менсьым чомсö тöдны.



— Ми мёдам рытланьыс ворсны, кор став вотчысьясыс гортаныс нин лэччаласны.

— Позьё эськё да,— кёсьысис жё сэсья Санька.

— А öнi вай петам да менсьым рюкзакёс корсьлам да картаёс. Лейтенант Самарина, мунан разведкаё, петан да веськыдвывлань.

— Ачыд корсь, кытчö колин,— букыштчис Галя.

— Приказы командира не обсуждают. Шагом марш!— рочыштiс вокыс.

Галя петiс медводз да довгис-муниc веськыдвывлань. Эдик мөдөдчис сы бөрся, а Санька кольччылиc да топыда төбис рузумөн доймөм коксö.

— Э-э, татчö локтöй, сюрис,— горөдиc Галя.

Рытывбыд уялисны Эдик да Санька сантиметровкаөн ягтi. Мичаа пасьялисны быд рөч и быд гу кабала вылө.

Шондi лэччандор нин вöлись эштөдиcны. Санька кольччис узыны вөрö, а чоя-вока лэччисны гортаныс. Рюкзак да карта колисны Санькалы. Асыв пажун бöрын кёсьысисны бара локны.

— Санька, сёйнытö мыйкö эм тэнад?— төждысьö Галя.

— Эм.

— Асыв мыйкö ваям,— кёсьысис Эдик.

Санька нюммуниc. Кокыс доймис на, но сьөлөм вылас талун вöли долыд: радейтö сийö вöрас овнысö, но унанад, вөлөмкö, гажаджык. Вермас лоны, и челядьлөн шензьöмыс да ошкöмыс на лэптiс ловсö.

Рытнаc орчча керкаысь бара кылиc код юраяслөн гажъялөм да тетя Ларисалөн чирөм гөлөсөн сьылөм.

Куим лун дорыв ворсісны штабысь. Лун сьомөснас Санька коксö шойччөдіс да бурдөдіс, а рытнас котралөмысь эз өтдортчыв. Мыйсö сөмын эз думыштлыв Эдик. Медводдза луннас велөдчисны компас да карта серти өдйö аддзыны да корсьны любöй места. Сэтчөдз котралісны, мый Галя быд мыльк да быд нөптов мөдіс төдны, он нин шу детинкаяс йылысь. Велалісны яглөн быд пельөссиянь стөча петны землянка дорö.

Ворсан мөд луннас жö лөсьөдісны ассьыныс флаг. Нырччысьнас, дерт, вөлі Эдик, а вурисьнас Галя. Дөрапасыс налөн вөлі куим рөма: еджыда-турунвижа-лөза. Еджыдыс — сөстөм югыд енэж, турунвижыс — веж парма, лөзыс — сөстөм ю. Вуриссö эськө Галя и важ рузум торъясысь, но артмис мича, рөмъясыс куимнанныслы воисны сьөлөм выланыс. Штабысь ворсіганыс лыбөдлывлісны сійөс матысса пожөмө. Ворсны дугдигөн бөр лэдзлісны.

Штаб дорö воём да дөрапас лэптөм бөрын чоя-вока пырисны чомйö, Санька здук-мөд кежлө кольчыліс. Варовитыштөм бөрын шуисны талун видлыны өти мыльк кодйивны: Эдик ышөдіс Санькаөс Чудь гу корсьны. Но ывлаө петөм бөрын планыс налөн вежсис.

— Көні нө флагным? — зумышмис Эдиклөн чужөмыс.

Галя да Санька чуймөмөн чөла видзөдісны пожөм вылө, көні пыр дөлавліс сійө, но өні сэн немтор эз вөв.

Гөгөртісны пожөмсö, ылісянь и матысянь видзөдалісны, но некөн эз тыдав. Чайтісны, мый уси да пожөм ув вылас плавгыртчис, сійөн улісянныс оз тыдав. Эдик кавшасьліс вылөдзыс, но ставыс весьшөрö.

— Со нө кутшөмкө кабалатор, — кырсь костысь, вундыштөминысь, перйис Галя.

— Нолы, — сы кийсь босьтис Эдик.

Разис кабаласо да лыддис. Печатной букваон воли гижома: «Дорапасто корсьой. Тайо пусяньыс сточ лунвыло кызь воськов. Ичот пожом дорын».

— Санька, босыт карта, компас, модам корсьны, — кывкорталис Эдик.

Штабса начальник пыралис чомйо, босытис мый колосо, петис да бура вевтис чомйо пыранинсо, поньталис, быттыо нином сани абу и вовлёма. Пожом пу дорсянь корсисны компас серти лунвыв, воськовтисны кызьысь. И збыль, сани быдмис томиник пожом. Но сы дорын некутшом дорапас эз вов, коть и ена гогралисны-корсисны матигогорсьыс.

— Гашко, ялаас, — модис видзодавны Галя кок увсо. И бара адзис кабалатор. Гижома: «300 метра асыв-лунвыло. Пором вужля улын».

Челядь куимнанныс паськыда чечыштломон мерайтисны асыв-лунвывлань колана мында, но вужля эз адзыны. Бурако, сорсисны. Ковмис кытшлалыштны. Борянаас сюри жо. Вужляувса лыасо, позьо шуны, путкыльтисны дзоньнас, но коланаторйыс эз сюр. Эз адзыны и гижодтор. Санька корсьысис дышпырысь, но кор нином нин эз сюр, сийо бокысджык лыасьыс адзис бара гижод: «Веськыда лунвыло 500 воськов. Чегом пожом дорын».

— Коді тайо миянос новлодло, — шензьо Галя, — гашко, вурсаыс?

— Кодко миянос кыйодома. И тешитчо ми вылын, — гогорвоодис Эдик. — Гашко...

— «Гашкоыс» по кашко да гора йыло оз во, а миян флагто корсьны ковмас быть. Помодзыс воам да адзам.

Мөдiм!— нуөдчис Санька да чөла мөдiс артавны воськовъяс.

Эдик да Галя мунисны сы бөрся сiдз жө воськовъяс лыддигтыр. Уна луна кос поводдя вöсна ялаыс кажгис кок уланыс.

— Уп! Кыксө көкъямысдас,— сувтiс Санька.

— Абу. Кыксө көкъямысдас өкмыс,— и нöшта öтик воськов содтiс Эдик.— Кыксө өкмысдас.

— Кыксө өкмысдас нель,— тадзи лоöма Галялөн.

Муртса зыкө эз воны. Но сэссия воисны жө öти кывйö, мый колö медводз шуöмаинас воөдчыны, а сэссия видзöдлыны, кодi прав. Чегöм пожöм дорö петiсны стöч Санька воськовъяс серти. Пу чегöминас бара вöли гижöд: «Рытив-лунö 300 воськов».

— Тайö миян кутшöмкө йöйталöм артмö,— дöзмöма Галя,— лунтыр тадз мöдам довъявны вөртыыс, кок песны. Ёна тай, лэччам гортö, ме выль дöрапас вура.

— Тэ эськө, чавкан, ланьт! Делöыс абу вурöмын! А сыын, мед корсьны асьыным. Полк кө воштас знамя — позор. Быть колö корсьны.

— Тэ эськө, Эдька, эн нимтась!

— А мый нинöм абусö сöран!

— А ме мудзи нин!— муртса венö оз воны чоя-вока.

— Шойчыштам либö,— кывкөрталiс Санька.

Галя водiс гатшөн кос яла нитш вылас. Енэжыс вöли лöзсьыс-лöз. Джуджыд веськыд пожöмъяс сярвидзисны сы гөгөр да сэнi, вылын енэжас, öтлаасисны туганъяснас, быттö кутчысьöмаöсь да йöктöны. И юрыс нывкалөн бергöдчö налөн кытшөн йöктöмысь. И сэтшöм лөнъ гөгөр.

— Тэ мый сэн вöчан?— торкис чöv-лөнсьö Эдик.

— Видзёда,— воча кыв сетіс Санька.

— Мый видзёдан?

— Кодзувкотьясёс.

— Мый, некор эн аддзывлы?

— Тешкодьось найё.

— Мый сэн сэтшөмыс? Мунёны и мунёны ас мognаныс.

Нинём сэн шензёданаыс абу.

— А тэ видзёдлы бурджыка. Со тайё кодзувкотыс ассьыс ыджыдджык пу чаль лосьёдчө кыскыны. Оз вермы. Õтарсянь матыстчылас, мөдарсянь, быттё зэв зіль морт. А со сылы отсасьысь воис.

— Да, збыль.

— Эдик, тэ меным карсьыд корсьлы книга кодзувкот олём йывсьыс. И нөшта лэбачьяс йылысь. Но?

— Но. Мөдөда кодкөдкө либё ыста почтаён. Санька, тэ со кодзувкотьяс бөрся видзёдан, вөр төдмалан бурджыка. А ме, төдан, мый медся ёна көсья?

— Мый?

— Мукөд планетаяс вылын олысьяскөд аддзысьлыны.

— Мойд тайё ставыс. Кыдзи Ёма йылысь.

— Нинём тэ, Санька, он төд аслад вөрысь кындзи. Му вылас на сы мыйта төдмавтөмыс, а космосас... Ме эськө ставсө юаси налысь...— и Эдик ланьтіс, вөйи аслас думьясө.

Шойччыштөм бөрын челядь арталісны 300 воськов рытив-лунвылө. И бара гижөдтор «800 воськов войвылө. И сэтысь аддзанныд».

Көкьямыссё воськов бөрын найё петісны асланыс му чом дорас.

— Ёна кодкө миянөс бөбйөдліс!— шензис Эдик.

— Но, мудзөмыс сөмын сюрліс,— сы дор сувтіс Галя.

Санька чөв оліс.

— Сэтшөм бур штаб вөлі да кодкө кыйдөма. Эк,— шогсис Эдик.

— Но и көні нө дөрапасыс?— гөгөр гонняліс Галя.— Абу. Йөйтөдліс кодкө миянөс. Кыв нюждөмөн став ягсө кытшовтім. Сө дивө!

— Пырам, шойччыштам да сөйыштам,— вөзйис Санька.

Му чоййө пырөм бөрын ставныс быттьө кынмисны места выланыс. Налөн мича еджыда-вижа-лөза дөрапасыс вөлі сәні.

— Ойя! Кодкө миянлысь штабтө туялөма!— ливкнитіс Галя.

— Эн омляв,— вомаліс сійөс Эдик.— Тайө весиг интереснө. Корсьны найөс, пежъясөс, колө. Санька, талун лэччам гортад, асыв водз локтам да вөчам пожөмъяс вылас посяяс, сэтысянь кыйөдчам. Лунтырнас дзик коркө воласны.

— Зэв тай гажа олөм,— броткыштіс Галя.— Талун кыв нюждөмөн понъяс моз став ягсө кытшовтім, асыв пөткаяс моз тутвидзны мөдам пу вылын. Ёна колө!

— А тэ эн и лок! Ми тэтөг кыйөдчам,— венө пырө Эдик.

— Ме ог лэччы, тан узя,— сетіс гөлөссө Санька.

— А войнас кө локтасны шышъясыд!— повзьөма Галя.

— Кутшөм шышъяс!— бара вомаліс Эдик.— Мөдасны шышъяс миянсьыным дөрапас дзевлавны. Тайө кодкө сикт-са детинкаяс пиысь. Кутам! Миянөс ылөдлөмсьыс пуж петкөдлам.

Мөд луннас Галя кольчис гортас. Медсясө мамыс вөсна, сійө тшөктіс горт гөгөрын кутшөмсюрө удж вөчны. Эдик

асывнас чеччис водз, некодөн садьмөдтөг ни тшөктытөг, чукөртис аслыс нуръясянтор лунтыр кежлө, босьтис нянь, пуом кольк, черинянь джын, турипувья ва. Сэссия звөз дорысь корсис ичөтик, но ён пөвторыяс, Толя дядьыслысь корис кыз гез — ставсө тэчис мышнопйө. Водз воис сийө му чом дорө, но ёртыс кыйөдчыны эз көсийсь. Таысь найө, кык детинка, чорыд зыкө волісны. Санька шуө, тэ пө өтнад пукав, а ме ветла талун кытчөкө, талун кокой пө ньөти нин оз вись, вөртиыс пө собалышта, выль местаяс видзөдла. Эдик муртса сьылі тшуптас эз сет сылы, сэтшөма скөрмис. Он кө пө кыйөдчы пожом вылас, көть нин пө гуад пукав, мед тан, матын, вөлін, гашкө, отсөг ковмас.

Эдик корсис кыз увьяса пожом, кык өтвесьтын быдмысь ув вылө пунктис гортсьыс вайөм ичөтик пөв, пуксис сэтчө, көртасис гезйөн пуас да лунтыр сәні куткырвидзис. Ок и кузь кажитчис луныс! Жуялі жарысла, ойбыртсьылөма и быдөн. Но чом дорө некод эз матыстчыв, сөмын яг джыдж лунтыр майшасис, буракө, позтырыс матын.

Санька, ёртыслысь кывзысьны жө лои да, лунтыр чомьяс вальмасис, осьса гу вом дорас книга лыддис.

Рытланьыс нин, кор кок позялөм бөрас да өти ногөн пукалөмсьыс став сөнъяс дзеналөм вөснаыс Эдик лэччис му вылө, нөдзласьыштіс, веськөдыштіс мудзөм ки-коксө, чомсьыс нюмъялігтыр петіс Санька.

— Тэ мый вашьялан, дыш руньө,— видыштіс Эдик сийөс,— лунтыр менө эн вежлы весиг. Тэнад өд чомийыс, абу менам.

— Но и мый, кодөс кутін?— серөктөм сорөн шыасис Санька.

— Асыв бара на вола. Мед көть мый, а кыйөда, корся,

кодi миянлысь флагсö гусявліс.— И друг, быттьö мыйкö юрас дөвгис:— А тэсö эськö мыйла он корсьысь, весиг ньöти он тöждысь?

— Мыйла ме мöда корсьысьны, ме и сідз тöда.

— Тöдан?— чуймис Эдик.

— Тöда, дерт.

— Но, кодi?

— Ме!

— Тэ?!— и чöv ланьтiс, кыв ворыс вошис Эдиклөн.—

Эн сөр!

— Ме ог и сөр,— вашмуніс Санька.

— Либö ме дикми лунтыртö пу йылад пукаліг, либö тэ йййялан?— шензьö Эдик.

— Мыйла тэ он эскы? Шуи öд: ме дзеби.

— Но тэ öд тшöтш миянкöд котралін-корсьысин?

— Но и мый?

— Нинöм ог гөгөрво. Вай лючки ладнö ставсö висьтав.

— Но. Ме тöрыт асывнас водз садьми. Лэбач дзользьöмсьыс. Юрö и воис тайö ставыс, кызди дöрапассö дзебны. Арталі воськовьяссö, колялі кабалаторьяс.

— А бöрсö кызз пуктін?

— Флагыс менам питшöгын вöлі, тi öд асывнас меысь водзджык чомьяд пыринныд — сэки ме босьтi, а кор картаысла да компасысла пыралі, коли пызан вылас.

Эдик чöv олыштiс, эз тöд, мый и шуны татчö. А сэсса зэв гылыда серöктiс.

— Но и Санька! Но и шемöсмöдін тэ миянös. Мыйла кöть нин талунсö меным эн висьтав? Мыйла нö ме пöрысь тар моз лунтыр пу вылас куткырвидзи. Ха-ха,— вөр тырнас сераліс Эдик.



Ёртыс сөмын небыдика нюмъяліс.

— Но тэ и йөйтөдлін миянөс!— шензьөмсыйс дугдыны оз вермы Эдик.

— Тэ өд шуин, мый ме начальник штаба. Со ме и уджалышти аслам юр вемөн.

— А талунсө мыйла менө пу вылас пукөдін?

— Көсий видзөдлыны этштө, мися, кутшөмджык, ляб абу. Молодеч тэ, ме эськө ачим, гашкө, лунтыртө эг вермы сэн жботвидзны, — и кокныдика тапнитіс ёртыслы пельпомас. Мөдыс довъёмуні да тапнитіс водзөс. Санька содтіс, сэсса Эдик содтіс. И быглясьөмөн вермасьтөдз на воис налөн. Но бурпырысь, эз лёкысь. Кашкигтыр венласисны-муртасисны выннаныс, сэсса дугдісны жө, но дыркодь на куйлісны шоналөм еджыд яла вылас, видзөдісны енэжас.

Лэччигас бара на кайтышти Эдик, лэччам пө гортад, но Санька сөмын өвтышти кинас, ог пө, ме пө талун пемдытөдзис бурпөт на ветлөдла вөртийс.

Рыгнас, сөрөнкодь нин, ужын бөрын, кильчө вылын пукалігөн, на дорө матыстчис тетя Лариса, Санькалөн мамыс, дзик садь юра.

— Ойя да ойя! Санька вөсна сьөлөмөй потө. Көні шөйтө?— синваыс доршасис сьлөн.— Мыйкө кө не сы ног, гортись пышйө, нинөмөн кутны ог вермы. Тян со кутшөм шань челядь. А менам...

Галя эз көсийсылысь лөвтөмсө кывзыны да пырис керкаө. Сы бөрся вөтчис и Эдик.

Кильчө вылын дыр на кылө вангисны Санькалөн да Галялөн мамъясыс.

Локтан кык лунсө Галя сідзжө эз кайлы вөрас. Öти луннас весалис град йөрысь лук пуктас, капуста град. Морков

гежмөдiс мамыс велөдөм серти. Рытланьыс нин киськасис: помидор и огурцы, свеклө и кушман, укроп да сельдерей. А кутшөма нин муыслөн горшыс косьмөма! Юө и юө васө. Кисьтан да быттьө пож пыр мунө. Кутшөм окотапырысь Галя киськасис, быд пуктас юктөдiс ванас. Мөд луннас нывка пеласис, өд мамыс лун-лун видз вылын, сылы гортса уджсө некор бергөдныс, мыйсьюрө и эндьштөма. А нылыс өд ыджыд нин, унатор вермө-кужө. Со и босьтчө быд уджө. И киподтуя.

Керкаыс Галяяслөн сикт помланыс крут кыркөтш йылын. Чой горулас паськыд видз, турунсө ытшкөма нин, косьтөма и зорөдалөма. Сэти, видз шөртiыс, и лэччө векныидик туй ва дорөдзыс. Тазйөн Галя кыкысь лэччөдлiс көлуйсө пожъявны, сэсса ставсө өшлiс керка стенбердса зiбъяс вылө да косьтiс. Галя керка весьтти вадорыс туруна да пыр и джуджыдiн заводитчө, пожъясьнытө лөсьыд. А водзынджык, ю кузя кывтчөсджык, лыа бөж, сэни и ворсөны челядь чукөрыс. И сэтшөм окота лои Галялы лыа вылас ворсыштны, пөттөдз купайтчыны, өд, гашкө, бөръя шондiа лунъяс нин таво гожөм, а найө вөрын колялөны кадсө.

А Эдик колян лунъяссө Чудь гу яг гөрис. Эз эськө жө гөр, а кодйис. Катөдiс кык көрт зыр да Санькакөд кык нөптов кодйисны, зiлисны аддзыны важ йөзлысь, чудьяслысь кутшөмкө важ эмбур: сөй гырнич торпыригъяс, шыльөдөм изьяс, бипур местаяс. Но мый пыднаө көть эз кодйисьны, нинөм налы эз сюр: кузяла мича виж лыа, коръяскө сөмын еджыд либө руд сер волас. Нөптовьяссьыс нинөм эз сюр. Колө пө өти мыльк кодйивны — вөзйө Эдик. Но Санька, тайө кык луннас мудзтөдзыс уджалөм бөрын, сэсса эз көсийсь отсасьнысө. Кияс пө гадьяссисны, некутшөм пөльза таысь абу, весь кад воштөм. Да и со кутшөм мича лунъяс сулалөны,

колö и вадорлань катовтчивны, кодйысьнытö и букыша луно на позьö.

Рытнас Санька Эдиккөд тшöтш лэччис сиктö: öд мамыс пö дугдöма юёмсьыс, ёртъясыс висьталісны.

Рытнас тетя Лариса кыпид чужöма, тэрыб да пельк, сöмын и котраліс горт гөгöрыс: ломтіс пывсян, пусис-пражитчис. Мыйсяма чöскыд вөлöганас эз верд писö. Дерт, көнкö, дивитіс асьсö, кöсйысис, буракö, некор не юлыны сэсса, мед пиыс оз мун гортсьыс.

Лунтыр кежлö и мөдöдчисны ю дорас, Галя весиг пажын босьтіс: нянь, куим пуом кольк, песока рысь банка, парникысь нетшыштіс помидор да öгурец, — быдса сумка лои.

Чукöстісны Санькаöс и — вадорö. Котөрөн моз лэччисны чой горув, ышмигтыр вуджисны ю ковтысса веж öтаваөн пуритысь видзсö, лэччыштісны ю кывтчöс лыа дорöдз и воисны: гожийöдчы, купайтчы, ворс.

Тані асьыс востерлунсö Санька петкөдліс: берегас лөп чукөртыштіс да пестіс бипур, мөтыр вöчыштіс да пузьöдіс пöртйын чай. А ывла вылын пажнайтöмөн да бипур дорын чай юёмөн нин тайö вöлі öти лунся походö ветлөм кодь. Да и Санька талун вöлі кутшöмкö мөд нога. Пырджык сійö зумыш да кыв-вортöм, а талун вöлі варов да вильыш, нюмсера да шмонитысь. Синъясыс ворсöдчисны, ачыс дугдывтöг ышмис.

Рытладорыс нин, кор дышöдіс и купайтчыны, и гожийöдчыны, и ворсны, а босьтлөм сёяныс ставыс быри, Санькалы юрас мөвп воис пыжөн гуляйтыштны.

— Пыжөн? — чепöсйис Эдик. — А кытысь босьтам?

— Ме тöда öти пыж, тані берегас, кустъяс саяс куйлö. Абу томана ни нинöм. Пелысыс эм и.

— Йöзыдлысь оз позь,— öлөдö Галя.

— Тайö пыжыс важөн нин сэни куйлө, буракö, некод оз и вöдитчы сийөн.

Эз и дыр ло лэдзнысö Санькалы да Эдиклы, гири-люки кыскисны пыжсö да йөткыштисны ваас. Ичөтик дзибрөс пыж.

— Ме пола татшөмнад,— өтдортчис Галя.

— Пуксьы, пуксьы! Ме вежон сайын на мөдлапөлö вуджалі, лючки пыжыс,— эскөдіс Санька.

Но куймад пуксьөм бöрын пыжыс джуджыдакодь пуксис ваас, кык чунь вомлөс сөмын и коли дорышыс ва веркөсас. Санька сынис.

— Мөдлапөлас вуджалам,— вөзйысис Эдик.

— Ог!— вомалис сийөс Галя.— Берег пөлөныс кывтам. Этша запасыс пыжыдлөн да.

— Ю шөрас колө петавны,— бара корö Эдик.

Санька веськөдчис ю шөрланьыс.

— Эн,— чилөстис Галя,— ме пола!— Пыжыс катовмуні, муртса эз гумовт васö.

— А-а-а!— бара чарөстис Галя.

— Кор пыжөн мунан, сыныськөд эн вензбы,— öлөдіс сийөс Санька.

— Польсь көч! Чавканлы тэныд нө мый, вöйны кө мөдан, лэбзян да и,— шмонитö чойыс вылын Эдик. Ышмис да повзьөдлө сийөс, дзибрөдлө пыжсö.

— А пыжыс вөлөмкө розя,— чоя-вокалөн ышмөм вылө видзөдіг төждысьөмөнмоз шуис Санька.— Ковмас бергөдчыны.

— Ой!— бара повзис Галя да кутчысис пыж дорышас. Пыжыс катовмуніс да гумовтис васö.

— Эн чепсась!— өні нин повзьёмөн моз шыасис вокыс.— Пукав веськыда.— Ачыс мөдiс тэрмасьёмөн тыртөм консерв банкаөн, кодi вөли пыж пьдөсас пуклөс улас, коявны васө.

Санька бергөдiс пыжсө ас береглань, да, буракө, крутаджык артмөма, пыжыс бара катовмунi. Сыладорас жө шатовмунi Эдик, эз вермы кутчысьны кок йылас да бузгысис ваө. Галя чечышгiс пуклөс вьвсьыс, мышкьртчис, мед кутны воксө, и ачыс дзумгысис сы бөрся. Пыжыс пөри, куимнанныс веськалiсны ваө. Эдик мыйь вьнсьыс мөдiс варччыны береглань.

— Ме бөрся уйөй!— бергөдчылис жө өртьясыслань.

Галя, повзьём чужөма, сунгысьлас ваас да бөр петалас.

Санька кутiс пыжсө, матөдiс нывкалань.

— Кутчысь! Пыжас кутчысь!— горзө зонка, но Галя сэтшөма повзьөма, оз казьяв весиг, мыйь колө вөчны, сөмын сарпасьө кинас и кокнас, мед кьдзкө кутчысьны ва веркөсас. Медбөрын Санькалы удайтчис матыстчыны сы дорө да кватитны нывкаөс киөдыс. Галя кылис өртыслысь вына кисө да вөлись ас саяс воис, мөдiс гөгөрвоны, мыйь вөчны, да кутчысис пыж дорышас.

— Видлы кайны!— горзө Санька.

— Ме ог вермы, кьдз ме сэтчө кая!

— Сидзкө, өти кинад кутчысь, а мөднас варччы. Вай өтвылысь, пыж өтар-мөдарсяньыс, эн пов, васьыс пьдө ог вөйө.

Но нывка кькнан кинас кутчысьөма пыжас да полө мынтөдчынысө. Санькалы ковмис пыжсө веськөдны берегланьыс да варччыны өтнаслы. Сэссия и Галя, муртса лөньыштөм да полөмсө венөм бөрын, мөдiс жө отсасьны кинас.

Эдик сулаліс лыа вылын да горзіс:

— Э-э-эй! Мый сэтшөм дыр ноксянныд! Ме нин важөн вои, тшын эз петав!— Сэссия мөдіс чеччавны өти кок пөв вылас юрсө пөлынтьөмөн, буракө, пеляс веськалөма ва.

Кор Санька да Галя петісны берегө, Эдик, быттьө нинөм абу и вөвлөма, куйліс лыа вылын да киллис семечки коляс.

— Уп,— лэччисис сы дорө Галя. А сэссия бөрддзис.

— Тэ мый? Мый тэкөд?— ыззис вокыс.

— А тэ он гөгөрво? Санька кө эз отсав, ме эськө вөйи. А тэ! А тэ!— Галялы эз сюрны мөрччанаджык кывъясыс, мед кызкө дойдны воксө, коді нинөм абу и гөгөрволөма.

— Ме эг чайт, мый тэ он куж варчыны,— мыжтөмөн лыддис асьсө Эдик.

Санька чөла ноксис пыж дорас, сэссия мөдіс кыскыны сійөс важ местаас.

— Мед көть отсыштін,— бара на лэптыліс гөлөссө нывка вокыс вылө.

Мөдыс, мыжа морт моз, чөла лэччис пыж дорө, босьтіс чептіыс да Санька моз жө доддясис.

— Косьмас пыжыс да дзижалам,— путкыльтөм бөрас нин гараліс Санька.

Чөв-лөньөн сэссия и кайисны гортаныс. Медводдзаыс на чоя-вока костті сьөд кань вуджөртчис.

Чойыс видөм бөрын вөлись гөгөрвоис Эдик, мый лөсьыд-төма артмөма сьлөн, мый мыжмис, а водзвывсө эз куж ар-тыштныс.

Рытнас Эдик мөдөд-чис Педьө пөль ордө. Эштыліс нуөдны Галяөс да Санькаөс, но некоднанныс эз көсьысьсны. Лои өтнаслы тапиктыны. Но мед, збоймөдчө Эдик, юасьём-

сьыд өд вомад оз на кучкыны. Босьтіс блокнот да ручка, гашкө, ковмас мыйкө гижыштавны.

Педьö пöльлөн керкаыс сикт шöрас, лавкалы воча. Сы кодь керкаыс сэссия сиктын и абу: ыджыд джуджыд мича кильчöа, воссялан öшиньяса, öшинь дорсö мичмöдлöма серöдлöм пуөн. Керка гөгöрыс идöра, некөн энөвтöм лөп ни өг оз тыдав.

Пырис посводзас Эдик, а водзöсö и оз тöд, кодарас пырныс, кодар керкаыс гоҗся. Ывлаладорсянныс некыдз эз вермы тöдмавны, кыкнанладорас еджыд занавесьяс, кодарас пö и олöны. Сэссия тотшкөдчыштис лунвывладорас и стöч веськалі.

— Пыр, коді сэні,— кыліс сійö пöрысь пöльлысь гөлөссö. Воськовтіс зонка порог вомөн: пызан сайын пöрысь гозья пукалöны, чай юöны.

— Но, кодкө тай воысь лои, пыр, пыр, пуксьы, чай юам,— шыасис пöчыс.

— Ме гортын сөйыштли нин,— бöрынтьчис Эдик.

— Сөйöм сөйöм вылө пö лөсялө, нöйтöм нöйтöм вылө оз лөсяв-а, лок, пуксьы,— корö пöчыс.

Эдик родөмпырысь матыстчис пызан дорлань. Пöчыс пыр жö кисьтіс чашкаö пöсь чай да мыччис зонкалы. Сылы быть лои пуксьыны пызан саяс.

— Кодлөн нö лоан?— юалö пöльыс читкырасиг, буракö, омöля аддзö. Сійö вöлі мича: джуджыд кымöса, югыдлөз синьяса, дзор юрсия да мугов чужöма.

— Ме карса.

— Карсаыс нин татчö кытысь уси?— швачкерис кияснас пöчыс.

— Ме локті дядя Толя дорö, мамлөн вок дорö.

— Мамыд, сідзкө, татчös?

— Водзсö овыс вöлі Самарина, Анна Никифоровна.

— Митипер Анналöн? Висьтасин да быгтьö Митиперланьыс и мунан чужöмнад. Сэтшöм жö гöгрöс чужöмъяса, джуджыд кымöса. Видзöдласыд пöльыдлөн кодь ёсь.

— Ю, ю чайсö,— бара шыасис пöчыс меліа видзöдигтыр. Чужöмыс сылөн пöсь чай юёмсьыс банйыштöма. Пöльыс кодь жö дзор юрсисö гартыштöма юр бöрас. Посни нырвома чужöм вылас ворсöдчис мелі нюм.— А нимыд нö кыздз?

— Эдик. Эдуард.

— Карса ним тайö. Сиктсаыдлөн абу татшöмыд,— бара мелі нюмөн вашнитіс пöчыс да матöдыштіс тасьтіö тэчöм пушыд кöлöбъяс да рыська шанъгаяс.

— Тыр нимыд тэнад лоö Öньö Öльöк Ивö Митипер Анна Эдик,— сёрниö сюртчö пöль.— Тадз колö висьтасьны сиктад, сэки и ставөн мöдасны тöдны.

— Менам татшöм нимыс?— шензьö Эдик.

— Тэнад. Митиперыс — ыджыд батыыд, Ивöыс — прапöльыд, Öльöкыс — прапрапöльыд, Öньöыс — прапрапрапöльыд. Сэсса водзöсö ме тэнсьыд рöдтö ог тöд. Гашкö, мамыд либö Толя дядьыд важджык кöленасö на тöдöны. Юав. А колö пö тöдны сизим кöлена. Сизим тшупöд кö он тöд, сідзкö омöль рöдысь.

Эдик кыскис блокнот, ручка да гижис: Öньö Öльöк Ивö Митипер Анна Эдик. Сэсса дыр видзöдіс гижöд вылас да шензис, кутшöм кузь сылөн вöлöма нимыс важ коми ногөн.

— Менам квайт кöлена сöмын да,— юасяна синъясөн видзöдö Педьö пöль вылö Эдик.

— Тикö!— горöдчис пöчыс.

— Мый Тикö?— эз гөгөрво Педьö пöль.



— Тикö Öньö Öльöк Ивö Митипер Анна Эдик, — лыддьöдлiс пöч.

— Со тай, тöдан вöлöм, — шензьö Педьö пöль.

— Тöда, дерт, — вом дорсö чуњьяснас косöдыштiс да юрнас довкнитiс пöч. — Öти вужйiсьсьöсь ми да. Ме — Тикö Öньö Петыр Гриша Ивö Марья.

— Со тай, тэ сöмын квайт кöлена тöдан, тэнад чиньд мейсь ичöтджык, — дэльöдö Педьö пöль гöтырсö.

— Мун сэсья, эн артась, — дöзмискодь пöчыд рöдтö увыртöмьсь. — Юав, мортыс, гашкö, мөгөн воис-а. Тшетш-йöдчан сэн.

— Мөгөн кö öд, висьталас, мед чайсö юö да.

Эдик босьтiс нин коймöд шаньга да зэв окотапырысь чурскис чай. Пызан саяд кö пуксян, тай сэсья оз ков тшöктöм. Вештiс чашкасö да шыасис:

— Педьö пöль, ме локтi юавны тэнсьыд, мыйла Чудь гу ягыс тадзи шусьö. Кытысь татшöм нимьс?

— Тэ тай, зонмö, зэв писькös вежöра, быдтор кöсьян тöдны. Сидзи и колö: сюсь мортыд му пыдöсьсьыс и ва пыдöсьсьыс тöдö. Пöльыд кодь жö. Бурсьыс тай бур и чужö да рöдмö. Зэв вежöра, сюсь морт вöли Митипер. Öтлаын зонмавлiм. Кыйсьывлiм и. Позьö шуны, öти öшмöсьсьыс васö юлiм. — Тэрмасьтöг ньöжйöник сёрнитö Педьö пöль.

Пöчыс чеччис пызан сайсьыс да кокньыдик вöрасөн мöдiс идравны пызан вывсьыс.

— Висьтала инö, мый ачим кывлi. Меным аслам пöльö висьтавлывлiс, а сылы, колöкö, пöльыс жö. Öни ме со тэд висьтала, — лабутнöя заводитiс пöль. — Важ олöмтö колö тöдны, мед водзöсö аддзыны. Пу кö пö тай оз лэдз вужьяссö пыдöджык, юрнас оз лэптысь вылöджык.

Коркө важонсьыс-важон, гашкө, му пуксигас на, тани овломась чудьяс. Ми кодь жө йёз, сөмын ми ногө ичөтджык тушааось вөломась. Гөна пась новломась да быдторйыс повломась. Енъяссө пуысь вөлөм вөлалөны, налы эскөны, юрбитөны. Ас костаныс ыджыдыс вөлөма Онык. Зэв ён вөлөма да сюсь, яг рыжик кодь мича, выныс муртавтөм, мывкыдыс артавтөм. Кужө вөлөм сийө и төв бергөдны, и зэр корны, и слөт да шер дугөдны, и көдзыд вөтлыны. Зверпөткаыс сылы служитө, мый мөвпыштас-тшөктас — вөчөны. Ачыс пө сийө гөна пась новлө, бикөд и вакөд вашкөдчө, Ыджыд Енкөд сөрнитө. Ыджыд вына вөлөма, из поткөдлысь рөдысь. Йёзыс вөлөм сийөс вылө пуктөны, кыв веж оз мунны, быдторсө юасьөны, сылысь кывзысьөны.

Коркө-некоркө кывсяс налы, чудьясыдлы, юөр, локтөны пө Оныксьыд вына войтыр: енколаяс сотөны, коді оз сетчы — виөны. Став му вылын олысьяссө пө вермөны; важ Енъяс оз кужны налы паныд сувтны. А выныс пө локтысьясылөн көрт крестын.

Повзьөмась чудьясыд, Онык дорө локтөмась, пөрысь и посни чукөртчөмась.

— Онык, Ыджыд бать, шыась Ыджыд Ен дорад, юав, мый миянлы вөчны? Кыдзи водзсасьны да мынтөдчыны тайө лөк войтырсьыс?

Нуөдас Онык йёзсө Гөгрөс видз вылө, пестас ыджыд бипур, босьтас кучикгор<sup>1</sup>, кучкавны мөдас, медводз ньөжйөникөн, ньөжйөникөн, сэссия пыр өддзө, өддзө. Со нин сийө бергалө, йөктө, чеччалө... Пөсялөма, мудзөма, медбөрти усьө бипур

---

<sup>1</sup> Кучикгор — бубен.

дорад. Йӱзыс ставӱн чӱв олӱны, виччысьӱны, кор бергӱдчас на дорӱ Онык, ӱд сийӱ Ыджыд Ен дорӱ мунис, ськӱд сӱрнитӱ.

Ас садяс воис Онык, чеччис, довъялӱ, синъясыс гудырӱсь.

— Ок, бур войтырӱ, рӱдвужӱ, чойясӱ, вокъясӱ,— шыасьӱ сийӱ,— ыджыд лӱк лоӱ миянлы, буракӱ. Ыджыд Ен чӱв олӱ. Оз сӱрнит мекӱд. Шойчшышта да выльысь босытчыла.

Шойччас Онык, бара бипур пестас, бара пырӱдчас Ыджыд Енкӱд сӱрниӱ. Немтор оз шу Ыджыд Ен.

Коймӱдысь пырӱдчас Онык. Ставыс весьшӱрӱ. Чӱв олӱ Ыджыд Ен. Нуӱдас Онык йӱзсӱ ягӱ, косинӱ, ӱния Чудь гу яг местаас, тшӱктас кодйысьны. Кодъясны гуяс, йиркаласны, вылас му лӱпталасны. Шуас Оныкыд, кор пӱ локтасны татчӱ кӱрт пернаа йӱзыд, йирксӱ ас выланыд уськӱдӱй, мед не сетчыны, ме висытала, кор кадыс воас.

Ветлас ачыс сиктад, аддзылас креста йӱзтӱ, видзӱдас, кыдзи пу енъяссӱ налысь, енколаяссӱ сотӱны-бырӱдӱны. Каяс ягад, кӱни сийӱс чудьясыд виччысьӱны, пырас ачыс тшӱтш гуад и горӱдас ӱн гӱлӱснас:

— Ыджыд Ен дорӱ шыӱдчӱмӱн, сылы кевмысьӱмӱн, уськӱдӱй йирктӱ.

Медся ӱн йӱзыс быд гуын вӱрзӱдасны йирксӱ, усьӱ йиркыс, муыс личкас сийӱс да вевттыас йӱзсӱ. Тадзи и бырӱны чудьясыд.

А ягсӱ ӱни шуӱны Чудь гу ягӱн.

...Дыр эз унмовсь тайӱ войӱ Эдик, бергалис да ышлолалис. Мӱвпалис. Чудьяс йылысь. Збыль ӱд чудьясыс овлӱмаӱсь, асьныс асьнысӱ гуавлӱмаӱсь, яг нимыс со висыталӱ та йылысь. А, гашкӱ, абу збыль, кодӱнкӱ лӱсьӱдӱм мойд? ӱд кык нӱптов кодйисны найӱ Санькакӱд да немтор тай эз аддзыны. А,

гашкӧ, колӧ мылькъяссӧ кодйыны! Оз, оз ков кодйыны, и оз ков нинӧм корсьны. Ӧнӧя олысь йӧзыс помнитӧны важ йӧзсӧ, казтывлӧны на нимӧн шуӧм ягнас. И оз ков вӧрзбӧдны налысь нӧмӧвӧйся узянӧнсӧ.

Кӧдзыд шор пӧлӧн мунис векныдик ордым. Чожа восьлалісны сӧтӧ Эдик, Галя да Санька. Куимнанныс нопъяӧсь, мӧдӧдчӧмаӧсь тӧдмавны Кӧдзыд шорыслысь йывсӧ.

Ӧдва и кыпалісны. Медводз Санька ыръянитіс, оз пӧ менам сьӧлӧмӧй кыскы сыладорас, кыськӧ кывлывлӧма — каститчӧ пӧ сӧні. Сӧсся и Галялӧн мамыс содтіс, абу пӧ сӧтӧ сӧстӧм местаяс. Бур нӧшта, мый Галя эз кывлы сӧрнисӧ, эз ӧд эськӧ туяд пет.

Тӧдчӧ, мый коркӧ татӧ йӧзыс ӧна ветлывлӧмаӧсь, ӧна таявлӧмаӧсь, туйыс ворга кодь лӧма. Но бӧръя воясас ветлысьыс гежмӧма, а, гашкӧ, и абу вӧвлӧма. Туйыс ӧнакодь турунсялӧма, туй выв туруныс регыд нин вӧтӧдас бор турунсӧ, и ордымыс тырас, вошӧ, синмыдлы оз нин мӧд тыдавны, сӧмын кокнад тувчалӧмӧн и позяс корсьны туй воргасӧ.

Туй пӧлӧныс быдмис пемыдвез корьяса да чорыд заа петшӧр, кодӧ ставнас дзоридзаліс пемыд лыа рӧма дзоридзӧн. Кӧнсюрӧ вочаасьлісны чорыд, кысьмытӧм на еджгов тусьяса лежнӧг кустьяс. Сӧсся ӧвтыштӧс чӧскыд сӧтӧр дук. А сӧтӧрыс! Некор и некод на абу, гашкӧ, и воывлӧма татчӧ бӧръя кадас да абу вотлывлӧма пев пом гырся сьӧдӧн волялысь вотӧссӧ. А чӧскыдыс! А кӧрыс! Сідз вомад и сылӧ. Нопъяссӧ челядь колісны ордым вылас да пырӧдчисны кустьясас. Бурпӧт чӧсмасьӧм бӧрын шуисны водзлань муны, но бӧр локтігӧн быть татчӧ сувтлыны вотчыны.

Туйсяньыс веськыдвылас воссисны видзьяс, а шуйгала-дорыс ставнас тырöма баддьöн, ловпуясöн, быдсяма пöлöс джуджыд туруннас. Галя восьлалігмозыс кывзіс шорыслысь горсö: то сійö чöв олö, шуныгö лöня, то мöдлас дзольгыны, быттö сибдылöминысь мынöма да нимкодясьö.

Челядь мудзисны, надзмисны. Сэсса и вотöс сёяныд быттö ва моз муніс, регыд и кынöмныс мöдіс сюмавны. Шуисны сувтыштлыны, сёйыштны мыйкö пötöсджыкös да пузьöдлыны чай.

Эдик корсяліс кос лöп, мед пестыны бипур. Галя мöдіс перьявны сёян, а Санька босьтіс пöрт да лэччис ва дорö.

Недыр мысти, Эдик эз на весиг вевъяв биасьны, ышкиг-пошкигтыр, котөрөн воис Санька. Сылөн ыджыд сьод синьясыс лоöмаöсь нöшта ыджыдджыкös.

— Тані кодкö олö!— вашнитіс сійö чоя-вока дорö матыстчиг.

— Кöні?— повзис Галя.

— Ош?— вашкöмөн жö юаліс Эдик.

— Кодкö морт тані матын олö,— тöдчöдіс Санька.

— Мыйöн тöдан?

— Ме лэччи шор дорас, корси бурджыкин, мед васö гумовтны кокös кötöдтöг, таті весьтассö зэв вутшкös да ва, муні водзлань: а сэні туй, миянлысь тайö ордымтö вомöналö, лэччö шор дорöдзыс, а шорсö сэті кодйылöмаöсь, вомöныс паськыд плакаысь пос. Кодкö неважөн на лэччылöма вала, туруныс ляксöма.

— Энлы биась, тшын дуксö кыласны,— öлöдіс Эдикös Галя.

Но мöдыс эз и чайт биасьны, сылөн синьясыс нин öзйисны, юрас чужис мöвп:

— Нопъястө кольлам татчө коз пу улас дзебыштөмөн. И ме бөрся. Петкөдлы, көні туйыс,— тувкнитіс сійө Санькалы.

Туй вылө петөм бөрын лэччылісны шор дорө, видзөдалісны гөгөр. Шор бокас быдмисны бадьяс да кымынкө коз пу, водзынджык заводитчис ловпу рас. Шор таладорыс вөлі косджык, дзик шор дорыс тырөма эжөрөн да шор бок лисөн, вылынджык вутшкаиныс дзоридзалө төзьөн, көнсюрө чурвидзөны паськыд юръясыс омра пөлянлөн. Төзь көрыс вевтгьө став мукөд көрсө. Санька вөлөм прав: кодкө неважөн на волөма татчө — туй дор ситуруныс ляксьөма. Шор вомөнса пос плакаыс важ, съодасьөма, нитшсялөма, буракө, сись нин.

— Мышкыртчөмөн ме бөрся,— вашнитіс Эдик да котөртіс туй кузяыс вывлань. Сэсся сувтыштліс да водіс, кинас өвтыштіс Галялы да Санькалы, мед тшөтш водасны. Челядь лажыньтчисны турун пиас. Галя полөмысла эз казяв гожся мичсө, а көнкө вылын лөз енэжас дзользис ыбкай, а тані, турун пөвстас, ызгис ыб выв шомгаг, дзик сы син весьтын тіраліс пырыс тыдалана бордя юрсигусь. Сөмын эськө лөня куйлыны да кывзыны вөр-ваыслысь ловъя шыяссө. Но челядьлөн юр вемас мөдтор: төдмавны, коді тані олө.

Эдик бара лыбөдчыліс, дзоргис-видзөдыштіс водзлань, сэсся косіс ёртъясыс дінө.

— Сэні Ёма олө,— вашнитіс сійө.

— А-а,— повзис Галя.

— Эн сөр, Ёма кыськө,— эз эскы Санька.

— Ме тэд шуа — Ёма. Он кө эскөй, видзөдлөй асьныд.

Найө куимнанныс кыссисны водзлань да турун пиысь юрсө лэптыштөмөн видзөдлісны. Водзынджык, неыджыд луд

сайын, тыдаліс нель кок йылын важ нёриньтчём нин тшамъя, а сы сайын сулаліс нейджыд керка, тыдаліс кильчөыс. Сэні, медвылыс пос вылас, пукаліс пёрысь пөч, сатин ковтаа да сэтшөм жө сарапана, юрас павкнитөм еджыд вöсньыдик чышъяна. Кадысь кадö сійö малыштавліс керка стенсö да кильчö содсö.

— Аддзан, кор бергөдчыштлас, бокисяньыс нырыс кутшөм кузь тыдалö, — вашкөдö Эдик. — И сиктысь бокрын олö. Ті кывлінныд, мый тані, шор йылас пёрысь пөч олö?

— Эг, — юрсö дзөрөдыштіс Галя.

— Ме эг жö, — шыасис Санька.

— Но вот. А шуанныд, абу Ёма. Ёма!

Öні ёртъясыс эз нин пыксьыны да чöv олісны.

Керка дорыс вöлі ытшкытөм, кильчö дорөдзыс тшем сулаліс джуджыд югыд веж ситурун да паськыд коръя турун. Тшамъя дорас алöй дзоридзөн дзоридзаліс воййив турун. Кажитчис, мый тані коркө вöвлөмаөсь муяс да эндөмаөсь. Гашкө, сөмын важ муяс вылын и вермис лоны туруныс татшөм мичаөн да вежөн.

Тшамъя вевт пельöсысь лёкысь кравзөмөн кыпөдчис рака.

— Ой, збыль Ёма! И ракаяс сылөн эмось! — кельдөдіс чужөмыс Галялөн. — Мунам, пышъям татысь! Бөр гортö! — сійö тэрыба мөдіс бөр кыссьыны шорлань, сэсса, кор воис вомөна туйөдзыс, уськөдчис нопъяслань.

Санька уськөдчыліс жö сы бөрся, но бергөдчис да аддзис, мый Эдик кольччөма да водзö кыйөдчö, и эз төд, мый вöчны. Мунны кө Галя бөрся, Эдик чайтас, мый сійö повзис, но и öтнассö нывкасö татшөма шызьбөмнас лэдзнысö оз позь.

Санька вөтчис Галя бөрся:

— Тэ мый, повзин?

— Ме гортö лэчча,— тіралысь киясөн сійö көрталіс ассьыс мышнопсö.

— Энлы тэрмась,— öлөдіс сійös Санька,— Эдик сэтчö кольччис. Кыйöдчö. Тэ тані пукавлы, а ме ветла видзöдла. Öтлаын сэссия гортö мунам.

— Но, ветлы, сöмын öдйö локтöй, дыр кө мөданныд ножмасьны — öтнам лэчча,— буракö, вок вöсна тöждыс тшöктіс сійös нөрöвитлыны.

Кор Санька воис Эдик дорö да лэптис юрсö — чуймис. Керка дорас тыладорсянныс тыдаліс «Москвич» машина, дзик сэтшöм жö, кутшöм вöлі Николай Ивановичлөн, сиктса юралысьлөн. Кильчö вылас некод эз вöv.

— О-о!— чуймöмысла горөдсис Санькалөн.

— Ланьт, кыласны! Машинанас кутшöмкө морт воис, кутчысьлісны Ёмаыскөд, сэссия кыкнанныс керкаас пырисны.

— Ме нинөм ог гөгөрво,— вашнитіс Санька.

— Ме ог жö,— вочавидзис Эдик.

— Матыстчылам керка дорас,— корö Санька.

— Ветлам.

Сійö жö туйтіыс, кыті Ёмаыс лэччывлöма вала, найö матыстчисны кильчö дорас. И ичөтик керкаыс, и нёриньтчöм тшамъяыс, и кильчöыс — ставыс вöлі важ, сись, некытчö выль керас керыштлытöм, некыт выльмөдтöм. Стен бердас жмитчөмөн челядь матыстчисны öшиньяланьыс. Керкаыс эськө ёнакодь нин пуксьöма, но öшиньöдзыс вöлі джуджыд-кодь на, морт тушаысь вылөджык писькөдлöмаöсь, да кыйöдчөм йылысь и сёрни эз вермы лоны.

— Санька, лэпты менö пельпом вылад, ме видзöдла.

— Казяласны!

— Оз. Ме зэв гусьöникөн, öти син пөлөн кыйкнитла.



Санька куткыртчыліс да лэптіс пельпом вылас Эдикӧс. Латшкӧсіник тушаа Эдик вӧлі сьӧкыд, Санькалӧн зэлалісны сӧнъясыс, кокъясыс тіралісны сьӧкыд нопсыс. Эдик син пӧвнас и кыйкнитліс керкаас: югыд да сӧстӧм жыр, пу пызан да лабичьяс, инпӧлас важ нога шкап да джаджьяс, посни дзоридза ситеч занавесьяс.

Ӧшиньянъ мышкӧн пызан саяс пукаліс воысь мужичӧйыс, а Ёмаыс укватӧн мыйкӧ кыскис пачысь.

— Со ті кӧнӧсь!— чур-чермунтӧдз повзьӧдіс зонъясӧс Галя аслас шыасьӧмӧн.

Санька виччысьтӧмысла чарӧстіс, сы вӧрзьӧмысь Эдик кымӧснас зурасис ӧшинья таскӧ.

— Мый тэ горзан!— гораа вашкӧдӧмӧн вувзьысис чойыс вылӧ муӧ чеччыштӧм бӧрын Эдик.— Кыласны!

А Санькалӧн повзьӧмвывсьыс лигышмуніны ки-кокыс, да сійӧ лажыньтчис стен дорас. Эдикӧс пельпом вылас кутӧмсьыс кок сӧнъясыс тірзисны. Сійӧ кӧсйис зэвтны медбӧрья вынсӧ, мед чепӧсйыны котӧртны, но эз удит.

— Мый нӧ, челядь, энӧ юкӧ?— кыліс мужичӧй гӧлӧс.

Ставныс чуймӧмӧн видзӧдісны кильчӧ вылын сулалысь вылӧ.

— Видза оланныд, Николай Иванович!— медводз кыв-ворыс сюри Галялы.

— Видза, видза! Кутшӧм могӧн татчӧ воинныд? А воинныд кӧ нин, пырӧй керкаас, шойччӧ да шонтысьӧ.

— А Ёмаыс нӧ кӧні?— вашнитіс Эдик.

— Кутшӧм Ёма?— эз гӧгӧрво сійӧс Николай Иванович.

— Тані кильчӧ вылас пукаліс ті локтӧдз,— стӧчмӧдіс Эдик.

— Тані кильчӧ вылас Ёма?— выль пӧв юаліс сійӧ да

мөдiс гораа серавны. Сылөн паськыд мугов чужомыс гөрдөдiс да пемдiс, виж синьясыс ворсөдчисны да дэльөдчисны ичөтик биторьясөн.

— Ой, челядьö, сьомдытөдз сералi! Но и серам петкөд-лысьяс! Ыджыд мам, петав, тэнö со челядь Ёмаөн чайтö-маось. Со өд, өтнад вöрад олан да!— öни нин сийö шмонитiс аслас ыджыд мам вылын.

Кильчö вылө петiс вöснъидик косiник пöч. Зэв нин пöрысь: не кö кучикыс, лыыс киссис нин эськö. Вöрасыс сылөн вöли ньöжмыдик, чужомас сё чукыр, нырыс и збыльысь ыджыдкодь, кöть и эз мисьтöмт чужомсö, чусмём кельыдлöz синьясыс челядьлы кажитчисны бурöсь-бурöсь.

«Вот тэныд и Ёма!»— визьнитiс Эдик юрын.

— Господьöй! Ен кыськö гөсьтьясөс сетöма. Локтö, локтö, пырöй, чайөн юктала,— корис сийö.

— Миян асланым сёяныс эм,— бöрыньтчис Галя.

— Ас няньнад өд абу гөститчём. А ветлысь-мунысьöс вердём кузя пö дас во няня лоан, дас во тшыглун он тöдлы,— вомалiс сийöс Дуня пöч.

Пызан сайын чай юигөн челядь висьталiсны, кутшём могөн воёмаось татчөдз. А Николай Ивановичлөн ыджыд мамыс висьтавлiс важ олём йылысь.

— Верös сайö ме петалi Никöнор Сандрö сайö. Любö-пырысь мунi: мича вöли зонмыс, статя, уджач да пельк, збой, кок чунь увсьыс би вартö. А ме ачым гидйысь петавлытём кукань кодь рам. Семьяыс ыджыд вöли налөн: мам-батъыс, вит вок, кык чой, ыджыд вокыс гöтыра нин, быдтысьö — и ставныс олöны öти керкаын. Керкаыс эськö и ыджыд, а унанад сьökыд. А меным сэнi, кöть кутшём шаньöсь, а абу

гортыд: лоӧ ваысь кизьӧра, турунысь ляпкыда овны. И мӧдӧм ми Сандрӧкӧд думайтны торйӧдчыны, юксьыны, ас кежысь овмӧдчыны, ас керка лэптыны. Ас керкаад ӧд сэсса кӧть кыз ов, кузялаӧн кӧть вомӧнӧн, некод тэнӧ оз тӧд. Сэтшӧма ми дӧнзим ыджыд семьянас овны да уна йӧз пиас, весиг сиктсьыс мунӧм. Татчӧ шор бокас лэптим керкасӧ. Местаыс мича, вӧрыс матын: Сандрӧ кыйсьӧ вӧлі ёна, а зіль мортыдлы низыд-мойыд керка пельӧсӧдыс кайӧ. Сэсса и му-виддзыд орччӧн. Скӧт лӧсьӧдим: вӧв, мӧс, ыжъяс. Кык пи миян чужи, ныв. Бура лӧсьӧдчылӧм эськӧ да, абутӧ эг тӧдлӧ ни, да эз тай сетны миянлы овнысӧ. Олӧмыд ӧд кор тай юмов, а кор и курыд. Ладыс вежсис да ыршасьны ми вылӧ мӧдӧсны, кодлӧнкӧ ӧд и вежыс петӧ вӧлі. Ӧні ӧд йӧзыс ставыс сюсь вылӧ сюсь да бур вылӧ бур, а сэки... Колхозъясыд лоины да асалисны миянсьыным видз и му. Мӧс и вӧв ковмис сетны. Сьӧкыд кайны чой паныдтӧ, кокӧдыд кӧ крукавлӧны. Сэсса войнаыд лои, Сандрӧӧс сэтчӧ босьтисны. Эз и во бӧрсӧ, юрсӧ пуктис, кӧнкӧ ылі муӧ и дзебӧма. А мый ме ӧтнам тани кера? Верӧстӧгыд. Ковмис лӧччыны бӧр сиктӧ, энька-айка ордӧ. Сэні и олі-быдтыси. Том кад мунис — эз прӧщайтчы, пӧрысьлун воис — эз юав. А ӧні со пӧрысьявылад лӧнь ва моз шуньгӧ-мунӧ олӧмыд. Быд гожӧм со татчӧ кыскӧ, кӧні том вӧлі да шуда. Аслад керкаыд кӧть кутшӧм, а век лӧсьыд. Тани олышта гожӧмсӧ, важсӧ казъышта да сьӧлӧмӧй бурмӧ. Кӧдздӧдас да, сиктӧ челядь дорӧ бӧр лӧчча тӧвйынысӧ. Да и гожӧмбыд со оз энотлыны менӧ, Коля машинанас лункосмысь волӧ, нянь-совтӧ вайӧ, ватӧ шорысь катӧдас и. А ті со менӧ Ёмаӧн чайтӧмныд! — кокнипырысь сералис пӧч.

— А тэ, Дуня пӧч, тӧдан он, кытысянь тайӧ Кӧдзыд шорыс заводитчӧ? — асланьӧдис сӧрнисӧ Эдик.

— Ме эськө йылөдзыс эг волы, а Сандрө висьтавлывліс, мый шорыс сөдзтысь нюрйысь, Виж нюдз нюрйысь, тасянь лоө верст вит сэтчөдз. А нюръяс вотөдз, верст куим ылнаын, эм Гөгрөс видз, ми сэтысь турун вөлі ытшкывлам. Ог төд, өнөдз кө эз вөрөн тыр сәті, зэв мича гөгрөс луд вөлі. Гашкө вот, вөрөн тыри,— майшасис сійө.

— Видзөдлам да бөр лэччиг висьталам,— көсийысис Санька.

— Но. Луннад эськө мича виддзыс, а войковнад ми эгө ветлөй.

— Мыйла?

— Эштөдам вөлі уджсө пемдытөдзыс. Сандрө эз радейтлы сійө местаяссө.

— Мыйкө кывлөма али мый?

— Вуджрасьоны пө сәні.

— Кодъяс?— вашкөдөмөн юалө Галя.

— Повзбөдөма сәсся лои тиянөс. Ог төд, нинөм ме эг аддзывлы. Ті талун туяд эн нин петөй, шойччөй, узьөй ме ордын. Асыв выль вынъясөн водзө мөдөдчанныд, видзөдланныд Виж нюдз нюрсө, шөрас сөмын энө келөй, мед он вөйө, кадъя сәті, а доръясыс вутшкөсь пө, Сандрө, шонъянөй, висьтавлывліс. Сэтысь сійө вөлі турипувтө ваялас! Төвбыд кезлө! Рөдвужыслы на вөлі доддьөн лэччөдас — ставлы тырмыліс. Ылын да, сиктсаыд сэтчө оз ветлывлыны-а.

— Ог, ми керкаад ог узьөй,— Эдик, дерт, медся варов да пыр сёрниө сюртчө,— ми сы вылө и петім походас, мед ывлаын узыны.

— Керкаас узьөй, шоныдінас да косінас, сәсся кайланныд нюрйөдзыс да бөр лэччигад бара ми ордын узьөй.

— Ог, миянлы ывлаас лөсьыдджык,— шыасис пыр на

чөв олысь Санька кузь син лыс лапъяснас тшөкыда лапйөд-  
лігтыр. Абу велалөма гырысьясыдкөд сёрнитнытө да родыштө.

— Ми өд ывлаас велалөмаось нин, — вильыша видзөдліс  
Санька вылө Эдик сійөс дзерөдөм могысь.

Санька пель йылөдзыс гөрдөдіс да кокныдыка тувкнитіс  
ёртыслы. Галя сөмын шпыньмуні, гөгөрвоис зоньяслысь  
шмонитөмсө да. Гырысьяс, дерт, нинөм эз казьявны.

— Мед мунёны, ыджыд мам, эн кут. Абу нин посниось.  
Та арлыднас водз вөлі кыйсьыны нин велөдөны, ноддя дорын  
узьлыны да, — челядь дор сувтіс Николай Иванович.

— Сідз эськө да, — нбылыд муніс пөчыс.

Гөгрөс видз вылад челядь воисны рөмдандорыс нин, көть  
эськө шойчөм да сёйыштөм бөрад чожа восьлалісны.  
Вотөдзыс ковмис вуджны нейджыд нөдз, ничьявны-мунны  
паськыдкодь лості. Кыкысь кымын лыбөдісны-повзьөдісны  
сьөла позтыр, узянінысь лэптисны тугтьюр варышөс.

Виддзыс вөлі ыджыд, ытшкытөм туруныс коскөдзыд.  
Чуймөдіс, мый абу тырөма понөльөн ни кыз-баддьөн. Өд  
Николай Ивановичлөн ыджыд мам висьталөм серти тані во  
кызь нин некод турунсө эз пуктыв. Видз гөгөрыс вөлі вөр,  
сыладорсяныс, кытысянь воисны челядь — кыддза рас,  
водзынджык, видз мөдарас, — тшем козьяин. А виддзыс и  
збыльысь вөлі гөгрөс. Сөмын видз шөрас өта-мөдсьыс  
неылын быдмисны куим пашкыр пу, буракө, льөм пуяс.

Воөм бөрас мудзөмвывсьыд челядь медводз бурпөт  
шойчисны вөр дорас, косінө, джуджыд турун пиө, водалөмөн.

— Өні эськө таdzi и унмовси, эг нин эськө и чечыв  
асылөдз, — ас кежсьыс шуис Галя.

— Тшыг ог жö узьöй, — шызис Эдик. — Бипур пестам, сёян пуам, чай пузьöдам.

— Пöртйид öти да. Ковмас сöмын чай пузьöдны, — öлöдiс Санька.

— Сёяныс быдсямаыс на эм: чериняньыд, пирöг, шаньгаяс. Чай сöмын и пузьöдлам.

— Санька, тэ лэччыв шорас вала, — ыстö ёртсö Эдик. — Сöмын вай кызкö приключенияестöг нин. Некутшöм Ёма керкаö эн нин сэсса веськав.

— Эн повзьöдчы, — öлöдiс сийöс Галя.

— Тэ пыр повзьöмыд да, кöть нем эн и шулы, пу дзуртыштöмысь садьтöг усян, — броткышгiс Эдик. — Вай чеччы, нинöм лывкъявны, кор йöзыс уджалöны. Ми тэкöд, чавкан, чукöртам кос лöп да бипур öзтам.

— Бара нимтысян! Сидзтö кö, ме нинöм ог вöч! — дözмис Галя.

— Ог, ог, — лöньöдiс чойсö вокыс, — ме öд сидз, шмони-тигмоз.

— Но, чукöртам либö кос пестö, сöмын орччөн ветлöдлам.

— А мый, збыль полан?

— Пола, дерт, повтöгыд öд ош сёяс.

— А польсь морттö кöч повзьöдас! Аддзан, кутшöм Санькаыс! Öтнас вала шор дорö лэччис. Тöдтöминын. А тэ? Польсь кöч!

— Сийö öд велалöма нин, весиг войнас öтнас узьлö вöрас. А ме, дерт, пола, некор на вой кезлö съод вөр шөрö эг веськавлы, — гусьөн вашкöдiс Галя öтарö-мöдарö гоннялигтыр.

— Да эн пов, нинöм микöд оз ло. Ошъяс öнi пötöсь, кöиньяс тшötш. Йöз дорö оз матыстчыны, тэнö асьныс ылисянь кылöны да ыли гөгöртöны.

Кос увъяс, ньөръяс чукөртисны поводнөя, бөрнас Санька көйсйис вой кежлас ноддя лөсьөдны.

Биасьны эз на удитны — воис Санька, бара ватөм. Синъясыс — шар, чужөмыс кельыд.

— Бара мыйкө лои!— вомгорулас шусис Галялөн.

— Мый лои?— сідзжө шызис Эдик.

— Ш-ш-ш!— чуньсө вом дорас вайөдліс Санька да чуньнас корис кыкнаннысө пырны луд вывсьыс пыдөджык вөрас.

Пуяс да кустъяс сайө сайөдчөм бөрын сөмын висьталіс.

— Ми тані абу өтнаным.

— А көні, коді нөшта эм? Туристъяс? Ветлам, төдмасям,— ыззис Эдик.

— Ш-ш-ш!— бара өлөдіс сійөс Санька. Синъясас сьлөн вөлі полөм.

— Но мый, мый? Öдйөджык висьтав.

— Ме шор кузьяс водзлань муні, лэччи, гумовті ва, а кор моді бөрсө кайны, синмөс чөвтілі Гөгрөс видз вылас. Дзик шөрас, куим пу дорас кодъяскө эмөсь.

— Оз тыдавны да,— эскытөма вомаліс Эдик пуяслань дзоргиг.

— Тасянь оз и тыдавны, пашкыр льөм пу саясөсь, а эстысяньджык бура тыдалөны.

— Ветлам,— збоялө Эдик.— Төдмасям.

— Лөнь!— коймөдысь өлөдіс Санька.— Найө абу ми кодьөсь.

— Мутияс!— киас вокыслы шашаритчис Галя. Сьлөн весиг лов шыыс джөмдыліс.

— Абу,— вашнитіс Санька.

— Кодъяс нө? — өттшөтш моз юалисны чоя-вока.

— Ог төд. Буракө, мөд планета вылысь воөмаяс.

— Сөр ёнджыка, — эз эскы Эдик.

— Збыль! Ветлам эстчаньджык, аддзылан.

Челядь кустьяс сайё дзебясигтыр мунісны шор катчөсыс.

Збыль, дзик видз шөрас куим пу костын мовкъяліс эзысь кыша югъялысь шар. Рөмыд нин, да и ылынкодъ, бурасө он аддзы.

— Ветлам, код сэн кимөститчө?

— Ог, — өвтыштчис Санька. — Ог петкөдчылөй. Лэччам бөр, Николай Ивановичлөн ыджыд мам ордас узям. Асыв луннас выльысь волам.

— Да, да, Эдик, бөр лэччам, — сы дор сувтіс Галя.

— Эн сөрөй нинөм абусө, ме ветла на дорө да ставсө төдмала, — сійө воськовтіс дзебасысь да мөдөдчис видз шөрлань.

— Эдька! Кос бөр! Кылан! — майшасис вокыс вөсна Галя. — Мыйкө тэныд век йөзсьыс унджык колө, дзоляник петуклы.

— Чоюк, коді полө, лёка олө: луннас кувлө куим пөв, — бергөдчыліс да шмонитөмпырысь лыддьөдліс сійө, өвтыштіс кинас да вочасөн ылыстчис. Виддзө пыраніныс вөлі васөд, да сөмын лайкыд уль ошнитш вылас колины сылөн кок туйясыс. Со нин сійө матысса льөм пукөд орччөн, со ылынджык, со матыстчис эзысь рөма шар дорө. Со дзирдыштіс кутшөмкө мач, и ставыс воши син водзсьыныс.

— Санька, мый лои? Ме нинөм ог аддзы, синмөй, буракө, бердіс дыр видзөдөмсьыс.

— Ме ог жө аддзы. Нинөм оз тыдав.

— Но өд абу на тыдавтөм пемыд, — шензьө нывка.



— Вай шойччөдыштам синъяснымös, матөджык видзөдыштам, сэсса бара водзлань.

Но и мөдысь, и коймөдысь синъяс шойччөдөм бөрыннинөм эз югзы. И югыд мачыс, и Эдикыс вошины.

— Ветлам матөджык, колөкө, отсөг колө да,— вөзйис Санька.

— Ме ог лысьт,— эз көсйы петкөдчыны Галя.

— Он кө, ме өтнам. Барыш либө варыш,— воськовтис Санька эрд вылө.

— Сидзкө, өтвылысь. Тэ кө нөшта вошан, мый ме өтнам мөда вөчны? Сөмын гусьөн. Эн горзы.

Детинка мунис водзын, кузь туруныс гартчис кокас, сэсса сйё лөсьөдчис Эдик кок туйё да восьлавныс лои кокниджык. Галя полигтырйи, өтарө-мөдарө дзоргиг, вөтчис сы бөрся. Колөмыд тай полөмтө венө вөлөм. Мунныс лои кузякодъ, видзыс ыджыд. Кор Эдик кок туйтi воисны видз шөрөдзыс, шензьөмысла эз вөв помыс. Видз шөрас, куйм пу костас туруныс вөли ляксьөма, артмөма гөгрөс кушин. Водзө некутшөм кок туй абу. И Эдик некөн абу. И некод некөн оз тыдав.

— Эдик!— вашкөмөн шыасис Галя.

— Эдик!— гораджыка чукөстис Санька.

— Эдик!— мый вынсьыс нин горзисны челядь.

Но некод эз вочавидз.

Өдйө мөдис пемдыны. Колис бөр петны вөр дорланьыс, кытчө кольлисны нопъяссө. Важ кок туйтiыс и петисны. Нопъяс дорын Эдик эз жө вөв. Здук горзыштөм бөрын найө мудзырысь пуксисны. Мый вөчны? Дзурс пемдис. Лои шуштөм, гажтөм.

— Биасям,— чөвтис чөв-лөняс Санька.

— Ог. Казяласны миянӧс.

— Колӧ биасьны, кынмам татчӧ. Асьявылыс лоӧ кӧдзыд.

— Биасям кӧ, быдӧнлы тыдавыны мӧдам. А ми некодӧс ог мӧдӧ аддзыны. Асыв, гашкӧ, Эдик кыськӧ воас,— нургыны мӧдӧс Галя.

— Йӧй тӧ. Ми сы вӧсна и биасям, мед Эдикыд аддзас бисӧ да кужас локнысӧ.

— Но, биась либӧ,— кывӧйӧ сетчис нывка.

Санька ӧзтӧс битор, мӧдӧс ньӧжӧйӧ лӧдны сӧтчӧ кос ньӧръяс, увъяс, матӧдӧс пӧрӧм пу, юкис черӧн кык пельӧ да вӧчис ноддя. Бинад лои гажаджык, лӧсьыдджык, кӧть и кокнилуныс сьӧлӧм выланыс эз вӧв: ӧд ӧртныс воши. Воши ку ни ру. Нуръясьыштӧм бӧрын би дор мозыс нӧровтчыштӧмӧн Санька унмовсис. Галя эз вермы венны полӧмсӧ, но венӧс детинкаысь родӧмсӧ да нюкыртчис сы дорӧ, дыр на дзӧръялис синъяснас, сӧсся тай коркӧ унмыс личкӧма жӧ сӧйӧс.

Узисны челядь кокни унмӧн. Майшасьӧмыс эз вош ни эз быр. Быд вӧрса тӧдтӧм шы вылӧ садьмывлӧсны да недыр кывзысьыштӧм бӧрын бара лӧдзлисны юрнысӧ ноп вылас да здук-мӧд кежлӧ сыркмунлисны мӧд тӧдтӧм шыӧдз. Оз жӧ тай вӧрад войнас ставӧн узьны: кӧнкӧ акнитлас сюзь, кышакылӧны нитш сӧйысь вӧрса шыръяс. Асьявылыс нин сӧмын чорыдджыка и унмовсьлисны.

Садьмисны водз лӧбачьяс дзользьӧм шы улӧ: кӧнкӧ матын тивзисны уркайяс, шыасьлисны ньывкайяс, пиньгис пинькай, ылісянь, буракӧ, нюрсянныс кыліс турияслӧн кывгӧмыс. Часіныс эз вӧв, да стӧч кадсӧ эз тӧдны, но став сертиыс вӧлі зӧв на водз. Бипурыс ваймӧма. Би вомӧн пуктылӧм керйыс шӧриассьӧма, орӧма. Кык кер помсӧ Санька ӧтлаӧдӧс да шӧрас бара пестӧс бипур. Лӧччыліс вала да пуктӧс пузьӧдны.

— Санька, төрыт тэ шуин, мый гумовтін васö, а локтін тыртöг.

— Но и мый?

— Кытчö нö ваыс лои?

— Ме повзи югыд шарсьыс, джөмді да уси. А выльысьсö эг нин бергөдчыв.

— Тэнö Эдик вомдзалис.

— Кыдзи?

— Сійö шуис, мый тэ нинөмысь он пов.

Санька чөв ланьтіс. Кыкнанныслы вöлі шуштөм.

Ывла вылын узьөм бöрын бура сөйсис. Бырөдісны став пöжассö, мый вöлі, коли сөмын нянь, шыдөс, консерв банка да картупель. Пусьытöг сэсса кынөмпөт оз шед, өнөдз сідз на мыйөнсюрö нурьясьлісны-а. Сэтөр корья чай юөм бöрын челядь бара шуисны ветлыны видз шөрö. Мунісны важинтіыс, мед не вöчны уна кок туй. Гашкө, талун югыднад казяласны, кытчаны сетчисны Эдик да төдтөмьясыс.

Ывлаыс вöлі быттö ставнас кутшөмкө кельыд. Енэжті бовкьялісны ру кодь вöсньыдик кымөрьяс да эз сетны тыр вынөн сьвкнитны шонді югөрьяслы. Льөм пу вылысь матыстчиганыс челядь повзьөдісны сьөд юра да гөрдоват тывбордьяса пинькайясöс.

— Пинь, пинь, пинь,— жбыркнитісны найö.

Войтыштны лөсьөдчысь льөм тусьясыс сідзи и чуксалöны ас дораныс, но челядьлы некор чөсмасьыштнысö.

Видз шөрö воөм мысти да ставсö гөгөрбок видзөдалөм бöрын нинөм гөгөрвоанаджык эз ло. Видз шөрын гөгрөса лякөм турун. Шөрас кушин. Сэсса некутшөм кок туй некодарланьö.

Сёрнитчисны кадсö не воштыны, а лэчыны сиктö да висьтавны ставсö гырысьяслы.

Кежалісны шор дорас: сійö тані вöлі векньыдик, пемыд ваыс визувтіс чöла да тэрмасьтöг. Дорыс тырöма ляпкыд нюдз нитшкөн, а шор пыдöсас руд лыа. Матігöгöрас быдмисны ройсялём козьяс, тыдаліс кымынкö шунпу. Улис көрсьыс да шуштöмсьыс Галяöс босьтіс йирмög.

Кор шор дорсьыс бөр петісны да мөдісны матыстчыны нин Гöгрöс видз дорö, найö кыкнанныс джём сувтісны: водзыланыс быттьö кодкö вуджөртчис, кажитчис, быттьö кодкö налы воча локтö. Челядь весиг лов шысö кутыштісны, пельяснысö чошкөдісны, мед бурджыка кывны, мый сәні водзылас. Галя гусьöникөн чөвтис пернапас да кутчысис Санькалы киас. Пуяс сайысь петём бöрын тыдовтчис: видз шөрсяньыс кузь турун пиас öтарö-мөдарö ветлөдлөмсьыс артмөдөм векньыдик ордымті локтіс Эдик. Галя да Санька чуймөмөн сулалісны да видзөдісны ёртныс вылө, быттьö сійö мөдар югыдсьыс петö.

Эдик матыстчис на дорö меліа да вежавидзөмөн нюмъя-лігтыр.

— Эдька, тэ ловъя!— шыасис Галя.

— Он öмöй аддзы?

Гөлөссö кылём бöрын вöлись эскисны, мый оз каститчы налы, мый ёртныс ловъя, со, тані, накөд орччөн сулалö.

Лигышмуні ки-кокыс Галялөн, уськөдчис да топөдіс ас дорас воксö, гусьöникөн чышкыштіс сөдзтысьöм синвасö.

Эдик сулаліс шөйөвошөм чужöма, быттьö ачыс тырвийö оз гөгөрво, мый сыкөд лои, синъясас сылөн төдчис гөгөрвотөм дзирд, быттьö кутшөмкö гусятор поздысьöма сэтчö.

— Көні тэ та дырасо вöлн, мый тэкөд лои? — шызьбөм гөлөсөн юасьо чойыс.

— Уна-ө кадыс коли?

— Тэ эн вöv быдса вой.

— Ме чайти, öти здук. Ти öд танн сулаланныд вöли ме мунн.

— Бöрынджык, бöрынджык ставсо сёрнитам, — торкис найос Санька, — öнн лэччам гортö.

Челядь босьтисны нопьяснысо да мөдөдчисны төдса туйти сиктлань.

Бура дыр мунөм бöрын нин, кор тыдовтчис Дуня пöчлөн керкаыс, челядь долыдырысь ышловзисны да вöлись пуксисны шойчыштны. Гögрөс видз вывсьыс быттьö тэр-масьбөмөн пышйöма и лои налөн.

— Но мый, висьтавлы, — корис чойыс.

— Ме ставсо помнита вöтын моз, — заводитис Эдик. — Матыстчи. Найö эзысь рöма югьялан паськөмаось, комбинезон сям, но зэв зэлыд, туша сертиныс, весиг юрныс кышöма, сöмын синьясыс тыдалöны, миян дорысь синьясыс гырысьджыкось. Асьныс ме судтаось кымын. Сёрнитöны быттьö кутшöмкө аппарат пырья, телефонын моз сёрниыс кылö. Ичөтик гögрөс корабль. Тшöктисны меным сэтчö пырны. Пытшкас ставыс югьялö, сөстөм. Ме öд көснн накөд сёрнитыштны, юасьны, сийөн и мунн на дорö, а найö мекөд оз и варовитны. Здук кежлö, буракö, садьос воштыли. Паляли ме мөдлаын нин, ыджыдджыкинын, кутшöмкө пызан кодь вылын, киносад тай петкөдлöны, кыдзи операцияястö вöчöны, мыйкө сэтшөм сям жö. Куйла ме сэн, киос ог вермы вөрзьöдны ни кокос. Мыйсö мекөд сэнн эз вöчны. Ставсо

мурталісны: и ки, и кок, и кок чунь, и пель, и ныр. Буракö, быд юрси си сöмын эз мерайтны. Ас костаныс мыйкö мургöны, но ме немтор налысь эг гөгөрво. Сэсса, буракö, бара садьöс воштылі, немтор ог помнит. Ас садьö вои — бөр Гөгрöс видз шöрын. Сэтшöм жö рöмыд, кутшöм и ме мунігөн вöлі. Ме чайті, öти здук и коли, а вöлöмкö быдса вой.

— Гырысьяс пивись некод оз эскы,— гажтöминика шуыштіс Галя.

— Но и мед, оз кö,— ярзис Эдик,— ныма налы. Ми петкöдлам!— сійö сувтіс да мöдіс шенасьны кияснас.

— Лöнь! Эн пу, а то ачылд пусян. Бурджык висьтав, мый тэ кöсьян вöчны,— öлöдіс сійöс Санька.

— Ме лэчча карö да тöвбыдөн став литературасö лыддя НЛО йылысь. Мыйсюрö ме, дерт, тöда, но мый сэн збыльыс, мый абуыс, код тöдас. Сы вöсна колö ставас воöдчыны аслыным. Тöвнас дасьтыся бура да гожöмбыд кежлö локта татчö.

— Кор нин тэ тайöс мөвпавныс вевьялін?

— Сы вылö и юр, мед мөвпавны.

— Оз тэнö мамыд лэдз, вошлін да,— нурбыльтіс Галя вомгорулас.

— Лэдзас! Ме ськөд сідз сёрнита, мый кыв шутөг мөдöдас, и тшын оз петав. Вот. Ме лэччöда палатка, сувтöдам сійöс Гөгрöс видз бокас сэтшöм местаö, мед ни туй вывсяньыс, ни енэжсяньыс, ни видз вывсяньыс оз тыдав. Санька, сюрас сэтшöм местаыс?

— Позьö корсьлыны.

— Вöчам наблюдательнöй пункт. Тэ, Санька, и сідз вöрын олысь морт, абу мöй веськодь, кöні: Чудь гу дор ягын али Гөгрöс видз дорын.

— Абуджык эськө да... Сэнісө сиктсынь матын, и вöрыс гажаджык.

— Он öд öтнад ов, вежласьöмөн.

— Гожöмбыд?

— Дерт, мöдам видзöдны, кор вольвлöны, мый вöчöны, гашкö, гөгөрвоам, мыйла локтöнысö татчö, мый налы колö.

— А ті казялінныд, мый виддзыс зэв гөгрöс? — мыйкö ёна думайтöм бöрын юалис Санька.

— Сійөн и Гөгрöсөн шусьö... — вомалис Галя.

— Но öд Николай Ивановичыдлөн мамыс мый шуліс, во кызь пö сэт некод нин эз ытшкыв, а тэ казялін, мый лёк баддьөн ли кыддзөн тырöма гөгöрыс? Абу. А мыйла? Эновтлы кутшöмкö видз во-мöд кежлö, видзöдлы, мый лоö. Вөрөн тырас. А тайö? Гөгрöс вөлöма, гөгрöс и кольöма. Сэки и öні.

— Ме и шуа, колö туявны ставсö. Мöд гожöм кежлö дасьтысям, — ассьыс зильö Эдик.

— Видзöдлам, — лабутнöя вочавидзö Санька. — Кöс-йöмыд эм, а судзяс-ö юр вем. Ме мöд во кöсья вöлі удж вылö пырны, лесничествоö вöзйысьны.

— Öтиыс мöдыслы оз мешайт, Санька. Сідз и тадз вöрын мöдан уджавны.

Сэсся ставныс ланьтісны, быдөн вöйтчис ас думьясас.

— Ок, ме йöй, йöй, — мöдіс друг кучкавны кабырнас Эдик эжаас, — сэтшöмтор вунöді! Öні тöда, тöда, мыйла татчö вольвлöны мöд планета вылысь йöзыс.

Санька да Галя вомсö паськөдöмөн видзöдісны ёртныс вылö.

— Öд мый меным Педьö пöльыд висьтавліс! Оныкыс, чудьясылөн медыджыдыс, Гөгрöс видз вылö катöдліс медводз

йөзсө. Сәни сийө вөлі пырөдчылө сёрниө Ыджыд Енмыскөд. Сідзкө, тайө налөн вежаиныс вөвлі. Со көнi гусяторйыс! Ми нинөм на огө төдөй му вывсьыс. Мыйта на дзебасын, гусяинын. Ме гөгөрвои! Мөд планета вылысь йөзыс локтөны, мед сідз жө төдмавны муыслысь гусяторъяссө, найө корсьөны важ йөзлысь, вошөм нин котырлысь, вошөм цивилизациялысь олан ногсө. Ме гөгөрвои, гөгөрвои!— И Эдик сувтіс да мөдіс чеччавны нимкодъысла.

— Тэ ачыл нин Оныкыд моз йөктыны мөдін,— гажаа серөктіс Галя.

Санька чуймөмөн видзөдіс налөн гажъялөм вылө.



# МЕ ДА ИВУК ВОКӢЙ

*повесть*

## Ас йылысь

Висьтала медводз ас йылысь. Нимӧй менам — Тоня. Помалі коймӧд класс. Ыджыд нин. Чужӧмӧй гӧгрӧс, юрсийӧ пемыдруд, пельпомӧдз тшӧтшӧдӧма, синъясӧй... лӧз. Абу эськӧ лӧз да. Ӧтияс шуоны рудӧн, мӧдъяс — каньлӧн кодъ виж пӧ. Код тадзсӧ шуӧ — ме на вылӧ зэв ёна скӧрма. Синкымъяс сьӧдӧсь, чужӧмӧй беринӧсь. Мед, беринӧсьыс абу жӧ мисьтӧм. Менам Ивук воклӧн эмӧсь жӧ ныр вылас. А мама мукӧддырйиыс шуас: «Нолы, мусаник беринъястӧ матыслӧй, окышта». И ми Ивуккӧд кыкнанным ныръяснымӧс сылы мыччам, мед, колӧкӧ, чупнитӧ. Дерт, кор некод бокӧвӧйыс матын абу. И нӧшта мама шуӧ, мый миян ныръяс вылын пӧ беринъясыс нюмъялӧны.

А батьӧ... Сийӧ пыр миян вылын шмонитӧ. Мый нӧ пӧ гутъяссӧ ныр вывсьыныд он вӧтлалӧй, ставсӧ льякӧсьтӧмаӧсь. Ме эськӧ быд ног нин заводитлі ниртны, да некыдз оз быр. Коркӧ ӧтчыд сэтшӧма вуштӧ, мый вирсера весиг чужӧмӧй лолі. А сэсса энӧвтӧ. Мед, мися, мама тай мусаникӧн шуӧ.

Тушаӧй ыджыдкодъ, кыдз коркӧ орчча керкаысь Вера баб шуліс: «Ен ськӧд, Тоняыс ёнпырысь быдмӧ». Мед, ёнпырысь кӧ. Ёныс абу на кыз. А Ыджыд Таняыс, Вера

бабыслөн внучкаыс, меысь кызджык. А мөд Таняыс, Дзоля Таняыс, и косьтөм тшак кодь вöсньыдик. Тайö менам нывьёртъяс, ми век öтлаын ворслывлам.

Ми олам нельöн: батьö, мамö, ме да менам Ивук вок. Мамö уджалö совхозын, батьö сэни жö трактористалö. Гожöмнад найöс гежöда аддзылан: кыкнанныс пуктöны видзьяс вылын турун. Батьö ытшкö, а мамö юрасьö да юр сюртö.

Батьö миян зэв стрög, кöть эськö ми вылö оз жö лёкавлыв. Ми сылысь пыр кывзысям, мый тшöктас — пыр и вöчам. А мама... Мама зэв ёна кöсйö, мед ми быдмим зильöн да шаньöн. Сыкöд кокни да гажа. И уджавнысö миянöс велöдö ворсигмоз.

Колян ар картопель керны петим. А Ивуклы регыдөн и дышöдiс öктынысö, öтарö бипур дорö мунö. Ме няргыны мöдi, мися, Ивукыд оз уджав-а. Мама чöv олыштiс, а сэсся шуö:

— Ивук, лок маматö дорйы, гөгөр лёкагъяс менö кытшалiсны. Öдйö чукöрт найöс ведрö. Öтнамöс найö менö дзикöдз вермасны.

Ивук мöдiс сэтшöм зiля картопельсö — «лёкагасö» — сöвтны ведрö, мый меысь öдйöджык тыртiс. И весиг арся шондiыс быйкнитiс-петiс нейкнитчöм кымөръяс сайысь, медым видзöдлыны, кутшöм тэрыба ми уджалам. Пемыдöдз сэсся Ивук «лёкагъяскöд» тышкасис.

## Серöд, Чиган да Руч

Миян эм Серöд. Татшöм мича нима миян гөрда-еджыда сера люкасьысь мöсным. Эз эськö некодöс люкавлыв да, но

мыйкө кө абу сы ног, пыр и крукыштө сюрнас. Век лоө видзчысьны. Йөвсө сетө уна. Мама быд рыт и быд асывводз пыртө ведра тыр да миянөс юкталө мөс вөра йөлөн. Мама Серөдсө зэв ёна радейтө, «вердысьөн» ыдждөдлө. Ми Ивуккөд тшөтш сылы борйысь турун вайлывлам, гөститө-дам, мед миянлы унджык йөв сетас.

Нөшта миян эм Чиган нима кань. Сійө чим съөд, весиг еджыд чут некөн абу. Сійө йөвтө Серөдлысь зэв жө ёна лакө. Мама йөвтө пыртас, да кок гөгөрыс и ниртчө, сысьявнысө оз сет, сэтшөма корө. Чиган миян зэв асныра, некодлысь оз кывзысь. Ас кежсьыс оло. Но мудерсьыс-мудер, весиг ылөдчыны кужө. Öтчыд ас синмөн аддзылі. Мама пуис риса рок, чөвтис Ивуклы да меным тасьтiө, пунктис пызан вылө. А Чиган мама кок гөгөр гөгралө, мургө-сьылө, весиг нявөстлө. Мама сылы шуө:

— Коран роктө, а он өд сөй.

— Няв,— шуө Чиган, сөя пө.

— Но, сөян кө, на!— пунктө мама кань дозйө рок.

Чиган исыштө да көсийө нин вешйыны, но мама оз тшөкты:

— Сөй, корин кө.

Сэки миян Чиганыд мөдіс «сөйны». Öтарө юрсө пөлынът-лас, вөрөдыштас, мөдарө катовтлас, бара легөдыштас. Петкөдлө, мый зэв ёна сөйө, а вомыс рокөдзыс оз инмыв. Но и сералім жө ми сы мудеритөм вылө.

Эм Руч нима пон. Тадзи онсө ме нимті сы вөсна, мый сійө гөрд да кузьмөс ныра, дзик руч кодь и эм. Сөмын бөжыс абу ручлөн кодь пашкыр.

Ми Ивуккөд радейтам Ручөс пывсьөдны. Шонтам ва, кисьтам ыджыд тазйө, пуксьөдам сэтчө Ручөс, майтөгалам юрсө, гөнсө, лапаяссө. Сэсся дэбыд ваөн киськалам да лыд-дөдлам, кызди мама Ивукөс киськалігас вордө:

Раба божья Ручлы  
Овны да вывны,  
Бур войтырлы ошкымөн,  
Лёк войтырлы вежгымөн.

Оз эськё бур войтырыс ошкыны Ручсё да, быд ветлысь-мунысь вылө увтё да, дөзмёны.

Сэссия Ручёс лэптам, чышкалам кос рузумён. И тані заводитчё медся тешкодъыс. Руч, мыйён сөмын кийсь мынё, пыркнитчас, ваис отарё-мөдарё резсьё, сэссия тай нырсё ковёр вылө пуктас да мөдас котравны-чышкасьны, мөдар ныр боксё бергөдас да бара ракета моз ковёр кузя кырсьсё. Ивук кочкавтөдзыс серавлас этша.

Сэссия эм курөг. Дзик өти. Сійё миян зэв вылө пуксьысь, некодкөд оз ёртась, асивводзсянь рытөдз көнкө бротьялас-ветлөдлас, ставсё гөгөртас:

град дор и пывсян дор, гид дор и керка гөгөр. А нөшта мама кайліс карё да вайис чипанъясёс, быдса комынёс. Ассьыным пё пөжнысё колькъяссё оз позь, петукыс абу да. Сэтшөм чипанъясыс мичаникось да мусаникось: кольквиж рөмаось да небыдикось. Вайөдөм бөрас найёс недыр видзим керкаын, төвъянладорас (асьным тувсовладорас нин олім), а кор найё быдмыштісны, еджадмыштісны, а ывлаис шоныд лои, петкөдім кильчө улө. Дорас бать йөр потшыштис, медым лэдзливлыны чипанъяссё ыркөдчыштны, шонді водзын гожийөдчыны, кокасьыштны. Сэні жө йөрас ме найёс и вердывла. Сөмын вот мыйлакө менсьым кокөс век отилаті кокалёны. Мый сэтысь и аддзөмаось.

Со татшөм унаён ми олам өти керкаын, и ставөн төрам.

## Миян сикт

Олам ми Лыаты сиктын. Коркө Опонь пöль, пöльыс абу менам, а Ыджыд Танялөн, висьтавлывліс, мый Лыатыас медводдза олысьясыс волöмаось коркө зэв нин важөн Оквад сиктысь. Сэні юклöмаось видз-му, да öти семьялы оз тырмы. Быть кодлыкö колö мунны выль муяс лöсьöдны. А коді нö чужан сиктсьыд мунас? Некодлы абу окота. Ковмас пудьясьны. Пудйыс усьö Васьлы: мунны выль местаö овмöдчыны, выль видз-му лöсьöдны. Доддяласны рос доддьö вöвьяс (сэтшöм важөн тайö вöлöма, мый öнiя кодь додьяссö йöзыс оз на вöлөм тöдны), сöвтасны сэтчö эмбурсö, пуксьöдас Вась гöтырсö, куимнан писö, и мöдöдчасны найö бур му корсьны Эжва катыдланьö. А рöдвужыс уна вöлөн колялöны. Воасны öнiя Лыаты сикт местаö, лунвывлань алькöса джуджыд кыркötшö, косинö, да сэтчö и сувтасны. А мичыс гөгöрбок! Ылöдз тыдалö! От гöраыс и Паль гöраыс, мöдлапöвса ойdlана видзьясыс!

Ректысясны, нурьясьыштасны бипур дорын, Васьлөн гöтырыс и шуö:

— Лэчыла кыр горув, юсö видзöдла.

Ставөн чайтасны, мый кыркötш улас ю визувтö. Лэччас. Пияныс сы бöрся вöтчасны. Недыр кад кольö, локтö Вась гöтыр, оллялöмөн бöрдö да лыддьöдлö: ой, кытчö нö пö тi миянöс, дона рöдвужö, вайöдiнныд да мича паськыд Эжва дорсьыс; да, ой, лыа ты дорö тай тi миянöс вайöдiнныд; да, ой, лыа ты дорö тай тi миянöс кöсьянныд кольны; да и кор нö сэсся ме мича Эжвасö адзыла; да кор нö ме сэсся сöдз васö содзнам гумовта; ой, да и лыа ты вылö тай мен ковмас и нэм чöж видзöдны.

Ливзö-бöрдö Вась гöтыр.

Эжваыс эськö коркö визувтлöма кыркöтш увтiыс, но сэсса юыс лыаөн туöма, ваыс мöд туй корсьöма. А татчö лыа пиас кольöма сöмын нейджыд ты, кодöс и аддзöма Вась гöтыр.

Быль места оз нин мöдны корсьны Васьлөн рöдвужыс. Вежонөн лэптасны нейджыд чом, мед позис тöвiыны. А тöвбыднас тшöктасны Васьлы дасьтыны керка лэптöм вылö кер. И мöдöдчасны рöдвужыд бөр Оквадö. А кодi вочаасяс, юалöны, кытчö нö пö тi ветлiнныд? Вочавидзöны: лыа ты дорö пö. Сидзи и нимыс сибдас: Лыаты.

Тулысын бара воасны рöдвужыс да лэптасны Васьлы керка. Сидзи и овмöдчас Вась Лыатыö. Куим пиыс быдмасны да батьсьыс торйöдчасны, нöшта куим керка лэптасны. И öнöдз на сiйö местаыс шусьö Васьпиянөн. А сиктыслөн катыд помыс шусьö Шадрин. Кор Оквадсьыс Васьыс локтас овнысö, сэки катыдасджык олö нин вөлөм рочысь пышйылöм морт, Шадрин. А сиктыслөн шöрыс, көнi öнi миян керкаыс сулалö, Шöр вөлөсьтөн шусьö.

А уна во мысти Эжваыс бөр важ туяс бергöдчас, мöдас визувтны Лыаты увтi.

Кор ме висьталi тайöс батьлы, сiйö шуис, мый миян рöдыс муно тайö Оквадса Вассяньыс.

Миян керкаыс сулалö дзик сикт шöрас. Воча магазин да школа, водзынджык клуб да столöвöй. На костын волейболөн ворсанiн, а сы сайын — вичко. Став сиктса керкаяссьыс вичкоыс медджуджыд да медмича. Лэптылöмаöсь керьясысь, тшуплöмаöсь помвыв. Керьясыс ёна нин важмöмаöсь, потасьясыс быттö пöрысь мортлөн чукырьяс. Вичко юрсö кышлöмаöсь көрт листөн да краситлöмаöсь. Öшиньясыс кык пöлөс: мукöдыс векни да кузьмös, а мукöдыс ичöтикöсь. Öшинь юрйивсö мичаа серöдлöма. Öшинь дорьяссö тшöтш кра-

ситлөмаось, но красказы дзыкөдз нин вушйөма, сөмын көнъяско муртса тыдыштө.

Ми, челядь чукөр, вичко дорас весиг некор ог ворслывлө. А матыстчам кө, мыйлакө гусьон сёрнитсьө. Быгтьө миянөс сәні кодкө кылас. Весиг медся вильыш зонпосни оз пакөститчыны. А каяс кө кодкө на пиысь вичко юр йылас гулюясөс пулюшайтны, пөрысьяс найөс видөны, Енмыс пө мыждас, шуөны. А коркө пө вичкоыс нөшта на мичаджык вөлөма, көлөкөльня. А өні сәні совхознөй склад.

## Менам вок

Менам ичөтджык Ивук воклы нель арөс. Детсадйө ветлөдлө. Зэв тешкодь. Вермө лунтыръясон машинаөн джоджын гургыны-ворсны. И оз, майбыр, дышөд. А сідзсө сийө миян вывті вильшасьысь да сералысь. А мама шуө, мый сийө миян мелі.

Кывлөма коркө радио ли телевизор пыр планета кыв да юалө менсьым, мый пө сийө лоө? Но ме висьталі, кыздз кужи, мися, эм космос, а сәні уна планета, а ми вот, мися, олам Му планета вылын, Му вылын. А Ивук серөктіс да шуө:

— Эн ылөдчы, ми ог му вылын олө, а керкаын.

Сідз меным эз и эскы. Ковмис Ивукөс пуксьөдны лабичө, пызан сайө, да висьтавыны, мися, тэ өні лоан велөдчысь, быгтьө школаын, а ме — учительница. Киястө мичаа пукты да кывзы, а ме тэд висьтала планета йылысь.

— Вот ми тэкөд олам Лыаты сиктын, Шөр вөлөсьтын. Кывтыдланьын — Васьпиян, катыдланьын — Шадрин. Став керкаыс сулалө юлань чужөмбанөн, вөрлань бөрөн. Видзөдлан

кө карта вылө, миянлысь сикттö пасйöмаоьс ичöтик-ичöтик чутöн, а збыль вылас миян кык улича, көнi тшöтш и миян керканым сулалö. Но öд миян сиктысь кындзи на эмöсь мукöд сиктыяс да каръяс.

— Да ме тöда,— торкө менö Ивук.— Ме и уна кар ним тöда: Сыктывкар, Москва.

— Мед, тöдан кө. Тайöс тöдан, а мый мöда водзö висьтавны — он тöд. Сэсся школаас öд учительсö оз торкавлыны. Пельтö чошкöд да чöла кывзы, а мый висьтала — пель саяд сюркняв. Водзö,— бара ме учительница моз лабутнöя мöдi висьтавны.— Миян Лыаты, и орчча сиктыяс, и Сыктывкар, и уна мукöд сикт да кар — ставыс тайö Коми му. Коми муыс кындзи зэв на уна страна эм: Венгрия, Польша, Америка... И став тайö странаас олöны йöз да сёрнитöны уна сикас кыв вылын. И олöны тайö йöзыс, и ми тшöтш, Му планета вылын, а муыс Вселеннöйын, көнi бара жö уна планета: Венера, Марс, Юпитер. А олöны планетаясыс алыспөлöс закон серти, бергалöны Шондi гөгөр. Тэ эськө чайтан, мыйсяма кодзувъяс ми весьтын енэжас, видзöдан кө рытын. Аддзывлiн кодзувъяссö?

— Аддзывлi, дерт. Кутшöм на мича войся енэжыс.

— Ставыс тайö кодзувъяс да ичöt либö ыджыд планетаяс.

— А мый, миян муыс сэтшöм жö кодзув? И тшöтш енэжын öшалö?

— Муыс — планета, оз öшав, а олö, Шондi гөгөр бергалö.

— А мукöд планета вылас тшöтш йöз олöны? — юалö Ивук, а синъясыс висьталöны, мый сийö ньöти оз эскы меным.

— Сийö планетаяс вылас, кодъясöс йöзыс тöдöны, некод оз ов, а көнкö ылынджык, гашкö, и олöны, но та йылысь некод на оз тöд. А коркө, дерт, тöдмаласны.



Висьтала тадз Ивуклы, а сылөн синъясыс öзйöны, эскö ли оз меным, вомыс весигтö калькмунома. А ме быттьö збыль учительница. И сэтшöм меным нимкодъ, мый менö Ивук кывзö. Вот татшöм миян Ивук, уна кöсийö тöдны.

## «Мудер» Ивук

Миян мича еджыд, гöрд сорсьяса курöг чöсмöдлывліс колькйöн. А тулыснас колькъясыс мöдісны вошласьны. И места лöсьöдöма, а оз пуксьы сэтчö. Мама тшöктіс меным корсьны, кытчö курöгыс пуксьывлö. И öти лунö ми Ивукöс садьö эг нуöd, и ми кыйöдчим. Аддзим öд. Град шöрысь, картупель коръяс костысь. Быдса квайт кольк. Буракö, пöжсьыны лöсьöдöма.

Сöвті ме платтьö бöждорö колькъяссö да гортö пырті. Ивуклы тшöкті тасьті босьтны да сэтчö колькъяссö тэчны. Мöдіс тасьтіö пуктавыны, öтикöс и жутöдіс. Кисьтім чашкаö, солалім да юим. Зэв чöскыд кажитчис. Мöдöс юим дай коймöдöс. А кор ставыс быри, ме повзи:

— А мый мамыдлы висьталам?

— Ме ог тöд.

— А вай шкап саяд дзебам кольк кышсö да нинöм ог висьталö.

— Вай дзебам.

— Сöмын эн висьтав, мый кольксö ми сёйим, — стрöжиті ме вокöс.

Сюялім кольк кышсö шкап сайö. Чайтім, мый мама сэтчö дыр оз видзöдлы. А сійö рытнас и мöдіс идрасьны, да миянлысь дзебастö и аддзис.

Ме вöлі ворса ывлаын, вoсьса öшинь улын, аканьöн. А Ивук гортын. Кыла, мамö юалис:

— Ивук, кольксö тэ сёйин?

Менам вомö калькмуни быдöн, мися, мый нин вочавидзас.

А Ивук:

— Эг.

Мамö:

— А кольк кышсö нö кытчö дзеблалин?

— Шкап сайö,— зэв лабутнöя вочавидзис Ивук.

Сэсса ме эг нин вермы кутчысьны, серамöй петис. Вот, мися, и ылöдлим маматö. Пыри да ставсö висьталі, кыздз вöлі. Полі, мися, зэв ёна пинялас, а сійö чöv оліс.

Нöшта öтчывд видлим ылöдчыны. Почтальон вайис газет. А Ивук вильшасигас косяліс. Ачыс сэтшöма повзис, öд бать вермас чорыда скöрмыны.

— Вай газеттö пачö сюям, да быттьö эз и вайлыны,— шуа ме, мед дорйыны Ивукöс батьысь.

Чукралім да шыбитім пачö. Нöшта öтчывд шуи, мися, батьыдлы эн висьтав.

Муртса батьö воис удж вылысь, вoськовтіс порог вомöн, Ивук сылы воча:

— Батьö, ми тэнсьывд газеттö косявлім да пачö шыбитім.

Ме сэтчö и пукси. Мися, кöсйи отсавны-а. Та бöрын шуи аслым, мый сэсса некор некодöс ог мöд ылöдлыны.

И тасянь жö ми мамакöд мöдİM шмонитны Ивук вылын. Нарoшнö шуам: тайöс папайды эн висьтав.

Локтас бать удж вылысь, а Ивук терпитнысö оз вермы, телепит, колö висьтавны. И ветлöдлö вомсö ичöтик кинас тупкөмөн. Бать пыр и казялö, мый Ивук мыйкö кöсйö висьтавны. А сэсса ставөн сералам, мый Ивуклы нинөм вомас оз öшйы.

Сідзи миян Ивук мудеравны эз и велав. А мама шуө, мудер йёзыс пö абу бурöсь. Сідзкö, миян Ивук быдмас бур мортöн.

## Нимтысьöм

Ок и дözмöдлывла жö ме мукöддырйиыс Ивукöс. Коркö пукала, урок велöда. Назга-лыддя рочöн: «Имя существительное — это часть речи...»

А Ивук джодж кузя машина гурйöдлö. И сэтшöм завидь лои меным. Мися, майбыр тэныд овнытö, Ивук. И сэтшöм окота лои сййöс дэльöдыштны:

— Ивук!

— Мый? — дугдiс ворснысö да синсö лэптiс сййö.

— Тэ — имя существительнöй.

— Мы-ый? — нюркнитiс сййö.

— Тэ — имя существительнöй!

— Ме абу, — тэрмасьöмön да юрсö пыркнитöмön во-чавидзис Ивук.

— Чеччы джоджсьыс, имя существительнöй! — шуи скöра.

— Ме абу, — повзьöм-пырысь нин шуис вокöй да сувтiс.

— Да, да, со татчö книгаас гижöма.

— Кöни, петкöдлы! — дзикöдз вунi Ивуклөн ворсöмыс.

— Со нö, — чуньön зурги книгаас, — сьöднас тöдчöдöма.

Он али мый эскы?

— Ог.

— Да со гижöма, мый тэ имя существительнöй, одушевлённöй предмет.

— Нöшта содтав, — лөгпырысь горöдiс Ивук.

— Збыль.

— Ачыд тэ сійён лоан, имя существанойнас,— ырышт-чис ме вылө Ивук.

Менам серамой петіс воклөн тешкодя шуом вылас, но ышми да эг вермы дугдыны дэльөдөмсыыс.

— Да, ме тшөтш лоа, но и тэ тшөтш!

— Ме абу,— гораа бөрддзис Ивук.

А ме гизя-серала. Имя сущестительнойон вокос шуа, одушевлённой предметон. Ме од абу жө мыжа, мый книгаас сідз гижөма.

— Но, кывзы,— көсья нин ме сійөс бурөдны, жаль лоис да.— Позьө юавны: «Тайө коді?»— инда ме чуньям сы вылө.

— Тайө Ивук,— ачым жө вочавидза.— Позьө кө юавны: коді?— сійө и лоө имя сущестительнойнас, одушевлённой предметон. Гө-гөрвоин?

Но Ивук нинөм эз көсийи гөгөрвоны ни кывзыны, сійө бөрдіс менам нимтысьөмысь. А меным вокөй сэ-тшөм жаль лои, мыйла и дөзмөді. Сэтшөм лөсьыда вөлі ворсө, а торки.

## Ивук — ыджыд вок

Тулснад од дыр югыд, абу төвся кодь. Енэжыс дон, некөн кымөртор абу. Мылькъяс косьмышталөмаөсь нин, турунся-лөмаөсь, но и ва гөпъяс на эмось. Гажа. Дзоля Танякөд котралам, ворсам, резсям. Меным кыпид. Дыркодь ризьялім. Локті гортө да некыдз ог гөгөрво, мый лоөма. Ивук крөватъын равзө-бөрдө, а мама батькөд сы дорын сулалөны, шпыннялөны, мыйкө сылы шуалөны.

— Тоня, — ме дорö шыасис мам, — со мыйкө вокыдлы шу, а то рытивбыд нин бөрдө: мыйла пө ме ичөт вок, а тэ — ыджыд чой. Талунсянь пө ме ыджыднас көсья лоны.

Ме пыльсмуні, но кутчыси сералөмысь. А Ивук бөрдөмсьыс лөнъыштіс, буракө, кывзысис, мый йылысь ми сёрнитам.

— Мый, Ивук, збыль ыджыд вокөн көсьян лоны? — юала ме.

— Да, талунсянь ме ыджыд вокыс лоа! Гөгөрвоин? Ме! А тэ лоан ичөт чой! Ме мода сёр рытөдзыс ывлаас ворсны, а тэ телевизор пыр «Малышок» видзөдөм бөрын водны.

Шпыньмуні, но эг серөкты, кутчыси. А Ивук, ичөтик, косіник, крөватъын ырзөмөн бөрдө.

— Ыджыд вокъясыд өд оз бөрдлывны.

Ивук тшөк ланьтіс, буракө, мурталіс менсьым кывъяссө. Сөмын сыркъялөмсө эз вермы кутны, сідзкө, доза дыр нин бөрдөма.

— Ме ог кут, колө кө, ло ыджыд вокөн, сөмын ставсө, мый ме вөчлывла — вөч.

Асывнас мама чуксаліс менө Серөдөс колльөдны йирсьыны. Көсья нин вөлі петны, да дум вылө уси төрытъяыс. Чуксалі Ивукөс, мися, чеччы, ыджыд вок, Серөдтө колльөд. А сійө юалө:

— Кытчөдз?

— Сикт помөдз.

Сеті киас ньөр, мун, мися, а ме бөр на водла. Польштө мөсьяссъыс, но муніс. А сәні нөшта Вера баб потшөс дорас сулалө да ошкыштіс Ивукөс.

— Но, Ивукыс нин сәтшөм ыджыд лоөма, мөс вөтлыны чуксалөмаөсь.

Ивук вашмунёма, вомыс пельөдзыс, мелань бергөдчыліс, да аддзылі. Муніс. А ме өд вокөс ог жө сідз энөвт, гусьөн бөрсянныс вөтча, мед мөсьясыс оз жө көть люкавны.

Сідзсө, ме Серөдсө ачым зэв ёна радейта кольөднысө. Асывнас сиктыс мөд нога, кутшөмкө аслыспөлөс мелі, муртса-муртса на восьтыштөма синъяссө, абу на унсьыс палялома, унзіль. Читкыртчөмөн и шондыс видзөдө, оз на тыр синмөн, кызди лун шөрын. Дзуртыштөны дзирьяяс, баксыштөны мөсьяс, өта-мөдыскөд видзаасьёны. Лөсьыд асывнад.

Кыйөдчышти Ивук бөрся, а кор сійө бергөдчис гортлань, йөрьясті весьтасалөмөн сыысь воддзык гортөдз вои.

Локтіс Ивук, ворсны босьтчис. А ме шуа:

— Тасьті-паньтө мыськав.

— Ачыл нө мый? — синсө шармөдіс ме вылө Ивук.

— Ме өд ичөт чой, ме машинаөн гурйөдча, — босьті машинасө, мөді джоджө водөмөн ворсны. Аддза: сылы завидь.

— Эн вөрөд! — шуө.

— Ог мыйлакө, — вочавидза, — тэ өд школьник, книга-тетрадьтө лөсьөд. Регыд школаө мунны.

— Ме ог төд, кутшөм книгаяс босьтнысө.

Петкөдлі, кутшөм урокьяс талун. Тэчис ставсө, мый ме инді, сумкаө.

— Босьт портфельтө, менө детсадийөдз кольөд, а сэсса ачыл школаө мунан. А ме медся мича машинасө талун нула сацийө ворсны, — шуи тадз да босьті киө грузөвик.

— Школаад ме ог мун.

— Кыдзи он мун, төрыт вежсим да. Тэ — школаө, а ме — детсадийө.

— Ме школаад ог.

— Мыйла он?

- Портфельыд сьöкыд.
- Но и мый, тэ öд ыджыд вок.
- Ог, мися, школаад мун. Ог сэні куж.
- Ковмас кужны. А ме талун лунтыр машинаөн детсадыын ворса, мичаа журыöдла öтарö-мöдарö.
- Он, ме ачым муна садъяс.
- Мед эн вежсьы.
- Ме öд сöмын рыт кежлас.
- Сöмын рыт кежлад кө, ме ачым ог вежсьы, зэв тай тэ сюсь вöлöмыд асланьыд.

Тадзи Ивук эз ло ыджыд вокөн.

А ме эськö көсий лоны ичöt чойөн, мед мекöд меліджыка сёрнитисны, мед менö ставөн радейтисны, кызди Ивукöс. Но ме тöда, мый збыль вылас вежсьынысö оз позь.

## Узьсьöма

— Тоня, чеччы,— кыла ме унйылысь мамалысь чук-салöмсö.— Кылан? Ме видз вылö муна. Чеччы, Ивуктö садъяд нуöдны эн сёрмы.

— Но,— көсийыси ме, мöдар бок вылö бергöдчигмоз.

А кор садъми, видзöдлі часі вылö да звирк чеччышті, кадыс вöлі матысмö дас часö.

— Ивук, чеччы, детсадыад сёрмим,— мöді ме летны сійöс. Детинка пуксис крöвать вылö да вежыньтис чужöмсö.

— Мый вежыштчин? Пасьтась öдийджык,— тэрмöдлі ме.

— Колö вöлі водз чуксавны. Кыдз öні ме муна детсадыяс? Воспитательницаыс сёрмысьяссö век видö.

— Видёмсьыд коскыд оз на чег,— ыждала ме.— Мед төрыт кинотө сёрөдз эн видзөд дай!

— Да, ті ставныд видзөданныд-а,— водзсасис Ивук.

И збыль, төрыт «Полосатый рейс» кино видзөдим сёрөдз. Мырдөн мамалысь кори, мед лэдзас видзөднысө.

Вот и узьсьөма.

— Вай либө ог мунө талун детсадъяд,— ньөжйөник шуыштіс Ивук.

А ме чөв ола, мися, мый и вөчны.

— Сөрмим жө нин-а,— содтіс детинка.

— Мама видас...

— Кытысь сійө төдлас?

— Оз төдлы, дерт. Ог өд ылөдлөй.

— Оз мамыд вид. Мый сэсса, узьсис да,— сэтшөм нор синмөн ме ылө видзөдө.

— А оз кө, и кывзысь менсьым,— шуа.— Он кө, некор сэсса ог кольөдлы.

— Кывзыся, кывзыся,— радліс Ивук крөвать ылын чеччалігмоз.

Дерт, Ивуклы дышөдіс жө садъяд ветлөдлыны. Менам со төлысьысь дырджык нин каникулъяс, а сылы быд лун колө мунны.

Петі кильчө ылө. Сэтшөм шоныд да мича лун. Шондіа. Лөнь. Ичөтик төвру небыдика ворсьыштө юрсиён. Кылө косьмысь турунлөн чөскыд көр. Төрыт мама ытшкіс өшинь ув.

Талун менө весиг Серөдөс колявны мама абу чуксалөма. Жалитөма, мед дырджык узя. Но өд мукөд быд лунья уджсө колө вөчны, поснияссө вердны.

Петігмоз нин петкөді көшөн ва, кисьті чипан ворьяс, осьті



кильчөувса өдзөс. Чипанъяс өта-мөдсө ордйөдөмөн уськөд-чисны вөля вылө. Койышталі проса шыдөс, а тасьтйө чөвті рысь.

Ме зэв ёна радейта дөзьөритны найөс: вердны, юктавны, весавны сёян дозмуксө. А видзөднысө на бөрся сэтшөм гажа: кокасьоны, мыйкө корсьысьоны мусьыс, вензьоны ас костаныс, мырддысьоны, весиг косьө воласны.

Но гырысьджык чипанъяс бара мөдісны кокавны менсьым веськыд кокөс, кок пөксьыс улөджык. И быд лун өд тадз. Мукөддырйиыс весиг вирөдз овлө.

Тэрмасьөмөн петі чипанъяслөн потшөм йөрысь, бергөд-чөмөн видзөдлі кок вылө. Сідзи и эм, папара петукъясыд! Вир визь лэччис коклябөрөдз.

— Вата петкөд,— горөді кильчө өдзөсті петысь Ивуклы.

Вирсө ватаөн чышкалөм бөрын тшөкті видзөдлыны Ивуклы, мыйла век өти местаті кокалөны.

— Да тэнад сәні пудпас,— серөктіс вокйө.

— Пудпас?

Котөрөн пыри гортө, джоджө рөмпөштан пуктөм бөрын видзөдлі асьым кокөс. Сідзи и эм. Пудпас. Ок и мудерөсь чипанъясыд! Оз шыдөс кокавны, а менсьым кокөс... Налы нө мый, чут тай-а. Водзө вылө ковмас вердны петтөдзыс кокөс бинтөн көртавны.

— Ивук, ме петала Таняяс ордө, оз-ө найө вадорө лөсьөдчыны лэччывны, а тэ чипанъяс бөрсяыд видзөд.

— Но,— көсьысис Ивук.

Бөр локті, а Ивук нин йөртөма поснияссө оланінас.

— Мый нө сэтшөм өдйө?— юалі ме.

— Котөртлі звөз дорө нидзувьясла,— мөдіс висьтавны вокйө,— путкыльті куйөд пласт, өкта банкаө, кыла: шызисны

чипанъясыд. Уськөдчи, а вөлөм асланым Чиганыд пырөма налөн йөрө да пулюшайтө. Вөтла, да оз өд пет. Ковмис моздорөн каньсө петкөдны. Сэсса и йөрті чипанпянсө, мися, бара уськөдчас.

А Чиган, быттё оз сы йылысь сёрнитны, пукалө кильчө вылын да синъяссө куньтыралө.

— Öдйөджык лөсьөдчы, — мөді тэрмөдлыны Ивукөс, — лэччылам вадорө. Кыкнан Таняыс лэччөны.

— Ура! Вадорө! А менам нин ставыс дась: и вугыр, и шатин, и нидзув, — кияснас өвтчөмөн быдөн висьталіс Ивук.

— Ха-ха-ха! Хо-хо-хо! — эг вермы ачымөс кутны серамысь.

— Мый? — шай-паймунөм синъяссө чөвтліс сійө ме вылө.

— Ой, кочкавтөдз сералі! Код нө лун шөр лунө чери кыйлывлө?

— Ме кыя.

— Йөзыслысь серамсө эн петкөдлы.

— Батьө вугыр шать дасьтіс, а ме өтчыд на эг вуграсьлы, гождөмыс чери кыйтөг и кольө? — чуймөмөн шуө Ивук.

— Батьыдкөд коркө и ветлан. А то куштөгыд вугырнас асьтө кыян.

— Ог, талун босьтла, — да сэтшөм лабутнөя тайөс шуис, дзик верстьө морт моз, и ме гөгөрвои, мый вензыны ськөд оз ков.

## Ю дорө

Ивук тэрмасьмөн лэччис кильчө содті да мөдіс видлавыны вугыръяс. Ме котөрөн пыри посводзө, босьті таз, кайи пөсйылө. Сэтчө ваннаө чукөртлывлам сьодасьөм көлуй.

Лукийсышті, корси посниджык пом, но ни аслам, ни Ивуклөн нинөм эз сюр. Вежон нин сулалө бур поводдя. И ми некор куш киён вадорө ог лэччывлө. Быд лун съод көлуй босьтам, пелалам Эжва ваас, пожъялам, сэні жө косьтам вужля вылө везйөдөмөн либө эжа вылө вольсалөмөн, и бөр кос көлуй гортө катам.

И со посни помыс нинөм нин абу кольөма. А пеласьтөгыд мый лунтырсө вадорас вөчан? Ковмис батьлысь дөрөмьяс босьтны, мамлысь платтө да юбка, нөшта кык юрлөс кышөд содті. Быдса таз лои. Пукті пеласян порошок куд. Дасьтөм тазсө петкөді кильчө вылө. Мый нөшта? Мыйкө сөйыштны колө босьтны. Талун өд кыкөнөсь. Кык бутылкаө кисьті йөв, кык нянь шөрөм, кык пуөм кольк, град йөрысь нетшышті лук турун да ставсө пукті целлофанөвөй мешөкө, а сэсса сумкаө.

Сумкасө сеті Ивуклы, ачым босьті таз да петі дзиръяті.

Дзоля Таня, ыджыд съод синъяса, мугов чужөма да еджыд юрсиа нывка, сідзжө вөлі тазъя. Таз тырыс лөдөма посни чой-вокыслысь көлуй. Сылы лөсьыд, чой-вокыс уна да, век посни помыд пелавнытө эм.

А Ыджыд Танялөн киас сөмын мича гөрд доръяса пажын тыра сумкаыс. А пеласьнысө сылы бабыс оз сет, көть эськө сылы зэв жө окота лэччөдлыны көлуйсө ю дорө, бульөдны-больөдны сэні.

— А Ручыд нө талун көні? — юалө Ыджыд Таня.

— Видз вылө, буракө, батьөкөд мунөма. Оз тай гортын тыдав-а. Сійөс мырдөн кө он кольөд, век батьөкөд ветлөдлө.

## Ыджыд Тая да Дзоя Тая

Менам кык нывъёрт: Ыджыд Тая да Дзоя Тая. Ыджыд Таяыс мекөд тшөтшъя, а Дзояыс арөн ичөт. И куимнаннымлөн керкаясым орчөнөсь. Медводз мян керкаыс, паськыд да ыджыд: төвъян да тувсова. Сэсса орчөн Дзоя Таялөн, налөн керкаыс векныдик да джуджыдджык, либө векныд вөснаыс джуджыд кажитчө, мичаа краситөма. Сэни Таяыс олө мам-батыскөд да посни чой-вокыскөд. А Ыджыд Таялөн ичөтик важиник керка, сэни сийө олө Опонь дедыскөд да Вера бабыскөд. А мамыс олө карын. Водзынджыксө Таяыс дед-бабыскөд и оліс, а мамыс сөмын воливліс. А кор ковмис мунны школаө, Ыджыд Таяөс катөдісны карө велөдчыны. Оні сийө лои карса, а сиктө воливлө сөмын гожөмнас.

Ыджыд Таяыс кызиник, карса шөвк платтьөясыс сы вылын быттьө балитөмаөсь. Ачыс шуө, тайө пө сы вөсна, мый ме квайт арөсөдз йөв нөнялі. Юрсиыс сылөн пемыдруд да зэв сук, кык кыз көсаа.

А Дзоя Тая тэрыб вөраса, карөй синъясыс збойөсь да вильшөсь.

Зэра лунъясө ми радейтам ворсны Ыджыд Таяяс ордын. Сылөн унджык карса чачаыс. И сы мыйта мичаа серпасалөм книга. Быдса ыджыд картон куд тыр. Да сэтшөм книгаяс, мукөдыс весиг школаса библиотекаын абу. Лэптас лабич вылө, и ми дасьөсь лунтыръясөн видзөдавны мича серпасъяссө да өта-мөд вежмөн гораа лыддыны. Букыш лунъясыд медсясө книга куд дорын и кольөны.

Ми Дзоя Таякөд нөшта воливлам Ыджыд Таяясө сы вөсна, мый сылөн эмөсь пөль да пөч, Опонь дед да Вера баб.

Опонь дедыс дзор юрсиа, вöйыштöм синъяса, а ныр-вомыс вошöма ус-тош пиас. Сійö зэв шмонитысь да серам петкöдлысь. А мукöддырйиыс, кор бур сар вылын, кор кыпыд лов вылас, миянлы висьтавлö важ олöм йылысь, тöдысьяс йылысь, орт йылысь... Висьтавлас, а ми сэсся ывлаö огö лысьтö петны. Полам. Сы вöсна Вера бабыс оз тшöкты быдторсö миянлы висьтавлыны, вомалö дедсö, нинöм пö челядсьö ылöдлыны. Мыйöн Вера баб кытчöкö мунас, ми — Опонь дед дорö: вай миянлы мыйкö мойд. Сэсся нин кутшöм сар ылö веськалан.

А Вера бабыс зэв жö шань. Сійö югыдлöз синъяса, мугов чужöма да зэв статя. Нюмъялö небыдика. Пыр миянöс мыйöнкö чöскыдөн гөститöдö: шаньгаөн ли кöвдумөн, чöдья ли пувья пирөгөн, льöмья лязөн либö кисельөн.

Ми завидьтiм Ыджыд Танялы, мый сылөн эм пöч да пöль.

## Опонь дедлөн висьт

Пукалам Ыджыд Таняяс кильчö вылын куим нывъёрт да Опонь дед.

— Дедö, том дырйиыд ён-ö вöлин? — юалö Дзоля Таня, миянысь медся збойыс.

— А мый, тэ чайтан, ме öнi вынтöмджык али мый лои?

— Дерт, — серöктiс Дзоля Таня, — пöрысь нин да, бедьён ветлöдлан.

— Мый кöть и пöрысь, — ньöти оз нюмъяв Опонь дед, — менам вынöй век на томдырся кодь.

— Эн ылöдчы, — оз öвсьы нывка.

— Ньöти ог. Эстысь, вичко дорсьыс, ыджыд изсö аддзы-  
лнныд?

— Но-о,— öтгшöтш моз нюркнитам ми.

— Вот ме сійöс том дырйи эг вермыв лэптыны, и öни ог  
вермы.

Ми гылыда сералам.

— Дедö, а ме ён жö,— бара сёрниö пырö Дзоля Таня.—  
Видлы менсьым мускулöс.— Таня нюкыльтö кисö да ставнас  
зэвтчö.

Опонь дед личкышталö Таня сойö да шуö:

— Но, сир кынöм кодь выйим нин.

Танялы нимкодь. Сійö ышнясьöмөн видзöдлö ми вылö,  
пуксьö Опонь дед дорö матöджык, топöдчыштö да корö:

— Важ олöмтö висьтав.

— Мый сійö важтö сёрнитан,— пыксьö Опонь дед.

— Висьтав,— ставөн нин дзайгысям ми.

— Но кывзö, инöсь, зарни тугьяс, пель саяд сюркнялöй да  
нырад тшупöй.

...Коркö-некоркö, а вөлöма тайö сэтшöм важөн, кор на  
куим сикт вылö вөлöма öти чер...

— Кыдзи куим сикт вылö öти чер?— юала ме.

— А вот сідзи. Öти чер вөлöма куим сикт вылö. Перво  
öти сиктын поткöдчасны-керасясны, сэсся мöд сиктö сетöны,  
сэни уджаласны, мый колöсö, сэсся коймöдö сетöны...

— Став йöзыслөн öти чер вөлöма?— шензям ми да  
мöдам серавны. Миянлы гажа. Сэсся лöням да корам водзö  
мойдны.

— Олöны-вылöны вөлöм коми войтыр парма шöрын, ю  
берег пölөн ашшөр олöмөн. Вöрысь-ваысь кыйöны-вийöны,  
сар ни указ оз тöдны, а мый сэсся и колö.

Коркө-некоркө юөр кывсяс, гашкө, ветлысь-мунысь висьталіс, а гашкө, тури борд йылас вайис, Пырасянь пө (Котлассянь) уна пыжа катöны, роч йöз локтöны. Войтыртö быдөн шемöс босьтас: мый могөн нö локтöны, бурөн али лөкөн. Кыйсьысьяс берегсянь кыйöдчöны. Медводдза пыжас морт сулалö, гөрд шөвк платтьöа, кузь съöd юрсиа, тошка, морöсас ыджыд перна öшалö.

А тайö Степан Храп локтö, бöрыннас сійöс Пермскöйөн нимтісны, роч князьлысь юасьöм-висьтасьöм бöрын коми йöзöс кöсйö пыртны ас вераас.

Воисны пыжаяс Емдін весьтö, стругъяс берегö сутшкы-сисны, петісны Степан да том молодеच्याс му вылö, кайисны кыркötшö. Видзöдлісны гөгöрбок: дивö аддзисны. Ыджыд-сьыс-ыджыд кыз пу быдмö, пашкырсьыс-пашкыр. А эмбу-рыс пу вылас — помтöм-дортöм да донасьыс-дона, мыйыс сöмын абу: низь ку и тулан ку, мичмөдөм дөра и серөдлөм ки чышкөд. Дивуйтчöны том молодеच्याс, гөгöрбок видзöдалö-ны. Кутчысисны ки на ки, гаровтчисны пу гөгöр — оз судз-сьыны.

Гөгөрвоис Степан — абу прөстöй пу тайö, комияслөн вежа пу. Воис юрас сылы, мый колö тайö юрбитанінсö пусь-пасьвöчны. Босьтіс кузь пуа чер да мөдіс кыздз путö керовны. Кераліс-кераліс, пöсьыс шорөн киссьö, вын-эбöсыс сылö-бырö. Мудзис Степан, тырмылас пö, аски бара лун. Водіс, узис, асивнас чеччис, видзөдö да шензьö: пуыд бурдöма, бөр важыс кодь.

Бара кутчысис Степан черö, кераліс да кераліс асивводз-сянь да сёр рытöдз, вын-эбöс быртöдз, сунтшиктöдз. Этшаник и коли, да эновтчыны лои. Узис Степан, асивводз чеччис, видзөдö: пуыд бара бурдöма, важсьыс на ён. Дöзмис

Степаныд, кытчөдз пö оз пөр, ог дугды кералöмысь. Кераліс да кераліс, кераліс да кераліс, рытъя шонді нин синсö ку-нис, рытъя кыя нин кусі, вой пуксис, век керасьö Степан. Öвтыштіс медбөръяысь Степан, керыштіс, пуыс чур-чермунлі, ратшуні да пöри. А сэтшöм кузь вөлöма, мый йылыс Емва мöдар берегöдзыс судзöма.

— Но, тайö кыз пу местаас пö вичко лэптам,— шуö Степан.

— Энлы пö тэрмась,— кодкö шуö.

Бергöдчас Степан, а сы водзын морт, пöрыськодъ нин, низъ ку шапкаа, кокас кучик кöм, лазъя.

— Тэ коді лоан?— юалö Степан, а коминад сійö кужö вөлöм сёрнитнытö.

— Ме — Пама, коми йöзыслөн сёлöмыс да вежöрыс,— шуö морт.— А тэ нö эськö коді, локтöм морт? Абу тай бурөн воöмыд, миянлысь вежа кыз пу пөрöдöмыд.

— Ме Степан,— шыасис локтысь мортыд,— вайи тиянлы, комияслы, выль вера, Ен вера.

— Ми, комияс, ас вераөн олам,— шуö Пама.

— А вай вермасям,— шуö Степан,— тэ кö верман — ас вераад кольчанныд, ме кö верма — менсьым босьтан-ныд.

Паличөн кыскасьны сёрнитчисны. Пуксисны воча-воча Степан да Пама, кокъяснас мыджсисны, киас сёлыштисны, паличö кутчысисны. Кыскö асланьыс Степаныд, Пама оз сетчы. Кыскасисны-кыскасисны, выныштчис Степаныд да тököтьö Паматö юр вывтійыс эз шыбит.

Тöv кыськö петіс, шувгö пармаыс.

— Но, öтикысьтö вермин, мöд ног вермасям,— сетчыны лои Памалы.



Шуисны ты гөгөр кытшовтны, коді водзджык воас. Степан том да ён, ворсігмоз котөртө, а Пама бөрө кольёма, ышкө-пошкө, лолыс тырөма, мый нө, пөрысь нин да. Бара Степаныд вермис.

А пармаыс шувгө, дзуртө, кашкө.

— Коймөдысь вермасям, — чуйдө Степан. — Би вомөн чечыштам.

Пестісны том молодеच्याс ыджыд бипур. Öддзөдчис Степаныд, би вомөныд чечыштіс. Пама эськө öддзөдчис жө да, чечыштіс да бипуръяд и веськаліс. Ньылыштіс сөмын сійөс биыд.

Ойөстіс пармаыс, упнитіс муыс, коми йөзлөн вежөрыс да сьөлөмыс сотчис.

А Степанлөн том молодеच्याсыс коми войтырсө, кодъяс локтөмаось Степанлысь да Памалысь вермасьөмсө видзөдны, мөдісны кутавны пуяс сайсьыс да зырны Емвалань, сэні сэсса юас и пыртөмаось ас вераас.

— Энө полөй, войтыр, — шыасяс сэсса Степаныд, — Ен нимсянь бласлөвита тіянөс овны да вывны няньөн-солөн, вужъясьны да рөдмыны, Ен мед видзас тіянөс биысь да ваысь.

Сідзи и овмөдчасны йөзыс. Коді сетчис Степанлы — кольччисны, коді пышійысь — пышійис, коді вийсьысь — гуаліс асьсө. Эз нин кутны йөз Төлысьлы да Шонділы юрбитны, кызлы да пу Еньяслы, а мөдісны ветлөдлыны вичкө.

— Миян сиктас сэки жө вичкосө лэптылісны? — юала ме.

— Эз. Ёна сөрөнджык. Тэнад пөльлөн пөльыд нырцикаліс, восьтөдіс.

Опөнь дед чөв олыштіс, сэсса мышкыртчис Дзоля Таня дөрө да юаліс:

— Памаыс нӧ жаль абу?

— Жаль,— шуыштіс Дзоля Таня да чышкыштіс вазьӧм синьяссӧ.

— Эн бӧрд,— малыштіс Таняӧс юрӧдыс дед,— тайӧ ӧд важӧн нин вӧлі.

## Гажа кад

Туруна да дзоридза, мазіа да чирка борті ми лэччим ю дорӧ.

— Тоня, вай тазтӧ лэччӧдышта,— корис Ыджыд Таня.

— Мый, бара бабыд кӧлуйтӧ эз сет пславныгтӧ?— юала ме.

— Сетас, виччысь,— дӧзмӧмӧн шуӧ Ыджыд Таня.— Асывбыд тӧрыгтя съодасьӧм платтьӧнас мырддясим. Эз и сет. Оз пӧ тэнад мын. Мися, Дзоля Танялӧн мынӧ, а менам оз... А тэ со весиг гырысь кӧлуй босьтӧмыд. Вай ме лэччӧдышта.

— На,— мыччи ме сылы таз. А ме босьті сылысь мича бубенчика кӧвъя пемыдгӧрд доръяса сумкасӧ. Миян сиктын некодлӧн татшӧмыс абу. И меным нимкодъ татшӧм сумканас муныштныс, а Ыджыд Таня нимкодъпырысь лэччӧдӧ таз. Ӑд сылӧн вежыс петӧ миян вылӧ, мый ми гырысьяс моз мӧдам псласьны, пожъясьны, ӧшлысьны, косьтысьны. И мыйла бабыс Ыджыд Танясӧ век дзоля туйӧ пунктӧ? Нинӧм оз сет вӧчны. Дерт, миянлы тшӧтш отсасяс, но сійӧ нин абу аслад.

Крут чойті лэччигмоз корсялыштім оз тусь, сэсса воськовтім лыа вылӧ. Коктӧ сотысь шонді рӧма пӧсь лыасӧ быгтьӧ вольсыштӧмаӧсь сьӧрта-діа костӧ.

Медводз кӧтӧдӧм тазйӧ кӧлуй. Сэссия пӧрччысим да бузгысим ваӧ. Миян пиысь некод эз куж варчыны, да сы вӧсна резсим-дурим дзик берег дорас. Регыд Дзоля Таня да Ивук мӧдӧсны кынмыны: вом доръясыс лӧзӧдӧсны, ловгӧныс сувтӧс, пиньясыс мӧдӧсны зяткакывны. Ковмис вӧтлыны найӧс лыа вылӧ. Меддыр ме купайтчи. Ёна жӧ васӧ радейта. Кӧть чери моз ог и петав. Но ӧтнамлы гажтӧм. Гоз-мӧдысь ваӧ уськӧдчылӧм бӧрын и кынӧмным мӧдӧс сумапны. Нурьясыштӧм босытлӧм сӧянӧн.

Кор ми босытчим пеласьны, Ивук босытӧс вугыр шать да мӧдӧс пыжъяслань. Сэни вӧли джуджыдджык. Посни арпиян ыджыд чукӧрӧн матыстчывлӧсны дзик кок дорӧдзыс. Но детинкалысь табсӧ эз дӧбӧд. Син мудзтӧдзыс сйӧ видзӧдӧс визувнас нуысь таб вылӧ, катӧдыштлас, да бара.

Сэни жӧ ноксис аслас пыжӧн Иван дядь, миян батылӧн зэв бур ёрт, кодӧ лесникалӧс да олӧс сиктсынь ылын, кордонын. А сиктӧ волӧгъясас пыравлывлӧс миян ордӧ.

Дзоля Таняыс миян зэв ышмысь. Пелалӧс став кӧлуйсӧ, сэссия шыблалӧс дзик ва дорас, пожъявны пӧ мӧда. Матыстчыс ва дорас, и ваас уськӧдчывны-бузгысьлыны окота лоис. Тазъяс кыкнан кинас кутчысьӧмӧн кыз тай нюжӧдчас ваас. Меным тшӧтш завидь лои. Путкыльтӧ, мый тазйын вӧли, да сӧдз жӧ мӧдӧ бузгӧдчыны. Сэссия ме ассым тазйӧс сетӧ Бӧдджыд Танялы, мед тшӧтш ворсыштас. Ачым сувтӧс лыа вылӧ, на вылӧ видзӧда, серала.

Мыччысис «Заря» теплоход. Жаль лои, мыйла, мися, и тазсӧ сетӧ, ӧнӧ эськӧ кутшӧм мичаа лыбӧдлӧс гынас. Но мед нин. Танясыс тай со кутшӧм лӧсыда гӧвкӧдлӧс ва вылас. Друг син улӧ уси Дзоля Танялӧн кӧлуйыс да куимтор сӧмын берегас кольӧма, мукӧдыс ставыс кывтӧны. Чукӧстӧ Танясыс,

да мөдiм кутавны да лэптавыны. Чойыслысь шөвк платтьöсö медылö нуöма. Öдва ме судзöдi. Бур, мый лыадор да ляпкыд. А сэссия ышмим юрлöс кышöдөн ворсны. Пожъялигас ме казяли, мый найö польдчöны, кор сынöдыс сэтчö веськалö. Дзоля Таня босьтис ме кыысь да, юрлöс кышöд вомсö тöвланьыс паськөдöмөн, мөдiс ризöдны берег дор кузяыс. Польдчас кышöдыс, Таня кышöд вомсö топöдас да ваö уськөдчас: кинас кутчы-сьöма кышöдас, а кокнас варччö. Мудзтöдз тадз ворсим зэв гажаа.

— Ивук,— горöдi ме пожъясьöм бöрын.— Ми эжа вылас көлуй косьтыны катöдам.

Лыаыс вöли сэтчöдз до-налöма шондi водзас, мый он вермы сувтнытö. Ков-мис көмасьны. Вуджим лыа, эжа вылö вольсалiм песлалöм көлуй.

— ...оня!— кыли ме ю дорсянь горöдöм. Лэптим юрнымöс, видзöдам, кодi горзö. А тайö Иван дядьлөн, буракö, пыжыс дзоньтавсьöма, эштöма да йоткыштчöма ва шөрланьыс. Сийö нöшта мыйкö горзис, шенасис кинас да петкөдлис ю катыдыс.

— Мый?— горза воча.

— И-у — а-ö-а,— сöмын кылö, көть эськö Иван дядь зэв ёна мыйкö көсийö висьтавыны.

— А,— öвтышти ме киөн.— Нинöм оз кыв. Мед сэк висьталiн, кор ме матын вöли,— броткышти ме ас кежысь.

Менам киөн öвтыштöм бöрын Иван дядь пуксис, пыжыс нетшыштчис да сетчис водзлань.

Бөр ю дорас воём мысти пыр жö бузгысим ваö. Сэтшöм гажа вöли ворсны ваас, мый ме дзикöдз вунöдли вок йылысь.

— А Ивукыд нö көни?— друг юалис Ыджыд Таня.

Ме видзöдли пыжъяслань. Ивук некөн эз тыдав.

## Ивук воши

— Ивук, Ивук,— горөді да уськөдчи пыжъяслань.

— Ивук,— корсисны тшөтш Таняяс.

Вугыр шатьсө сутшкөма лыаас. Ачыс некөн оз тыдав. Корсим быдлаысь, весиг быд пөрөдөм пыж улө видзөдлім, эз-ө дзебсьы.

— Ті котөртлө васьпьянса дорө, а ме — шадринса челядь дорө,— шуи ме.

Челядьыс чукөрөн-чукөрөн ворсісны миянсянь отарын-мөдарын. Но кывтыдладорсаяс ни катыдладорсаяс дорас Ивук эз вөв. «Көні?»— оти мөвп бергаліс юрын.

— Гашкө, гортө котөртис,— мыкталөмөн артмис менам.— Ме котөртла, виччысьлөй.

И ме котөрөн уськөдчи гортлань. Дон лыаыс сотыштіс кок пидөсьясөс, но көмкотысла бергөдчывнысө вөлі некор. Ышкиг-пошкигтырйи кайи чой йылө, быттьө сьөлөмөй мөдіс чеччыны-петны морөс пытшкысь. Котөрти төдса борті.

Керка вөлі таса. Кызди асывнас сувтөдлі тассө, сідзи и вөлі. Сідзкө, абу волөма. Но век жө пыралі керкаө, чукөсті вокөс. Керкаыс вочавидзис шуштөм чөвлунөн. Кильчө өдзөс бөр тасалөм бөрын ветлі гид дорө, гөгөрти сәті. Абу.

Тэрмасьөмөн лэччи ю дорө. Кыр йылас сувтөмөн видзөдалі лыасө. Медводз синнам корси Таняясөс. Найө вөліны кыкөнөсь. Ивук абу. Пыжъяс дорын сідзжө некод эз вөв. Сөмын повзьөдчис отка вугыр шать. Ю кывтыдладорас ворсісны васьпьянсаяс, ю катыдладорас — шадринсаяс. Көть кызди эг көйыи аддзыны төдса мыгөр — эг аддзы.

Лэччи кыр горув, довги нывкаяс дорө. Тэрмасьнысө сәсся вөлі некытчө.

— Но, мый? — ӧттшӧтш юалисны Танаяс.

— Абу, — ышловзӧмӧн вочавидзи налы.

— Колӧ мӧд пӧв пыж увсыс видзӧдлыны, гашкӧ, дзевсис миянысь, а сэсса унмовсис.

Муним пыжъяс дорӧ, бара быд пыж улысь корсим. Абу. Нывкаяс чӧв олісны. «Мый нӧ, вӧйи?» — лӧк мӧвп вирдыштис менам юрын, кодӧс, кытчӧдз верми, вӧтлі ас думысь. Кор ветлім кӧлуйсӧ эжа вылас вольсавнысӧ, мыйла ме сійӧс аскӧд эг босыт? Но кызди сідз вермис лоны, вӧлі Ивук и абу. Кӧдзыдӧн ыркнитис кыткӧ сьӧлӧм дорті, быттьӧ став пытшкӧсӧй вошлі кытчӧкӧ здук кежлӧ. «Оз, оз вермы лоны», — бара на кӧсйи ас думысь вештыны лӧк мӧвпсӧ, но сійӧ некыз эз вешйы, а мӧдарӧ, быттьӧ напарьяӧн юр вемӧс мӧдісны писькӧдны.

— Гашкӧ, вӧйи? — оръясян гӧлӧсӧн артмис менам.

Танаяс чӧв олісны.

Кызкӧ лӧк ног лажыньтчи-лӧччи лыа вылас, мурч курччи тіралысь улыс парьясӧс. «И мый ӧні лоӧ? Кызди Ивуктӧгыс? Мый мамалы висытала? И ставсыс ме мыжа, ме. Ме эг нуӧд сійӧс садикӧ, ме босыті сійӧс вадорӧ, ме вошті...»

Воді лыа вылас кымыньӧн. Ки-кокӧй лӧталӧма. Мый кӧть ӧні оз ло — ог вермы вӧрзӧдчыны. Пытшкӧсын быттьӧ ставнас кынмис, синва войт эз вӧв.

Шондіыс катовтчис рыгъявыв, мӧдіс лӧччыны сикт сайлань. Челядь чукӧрӧн-чукӧрӧн ӧта-мӧд бӧрсяыс кайисны сиктӧ. Сӧмын кык Таня да ме колим. Чӧв олім. Кызди сиктас петкӧдчам? Мый шуам? Юрӧй менам висымис, быттьӧ лӧкысь клӧнгисны сӧні мӧлӧтӧн. Пукалім, быттьӧ виччысим му бергӧдчӧмсӧ, быттьӧ ми кӧсйӧм серти ӧні Ивук сувтас миян водзӧ. Но гортӧ кайныс Ивуктӧгыс ми эгӧ вермӧ.

Кыр йывсянь кыліс төдса гөлөс:

— ...аня! А-а, а-ө!— тайо Вера баб лэччөма корсьны миянөс, горзө пемыд ньыв пуяс дорсянь, тшөктө кайны-гортө.

Ыджыд Таня өвтыштіс кинас, мед бабыс мунас. Но сійо шенасис кинас да корис кайны. Ми, быттө кынмөмаөс места вылын, эг вөрзөдчылө. Вера баб эз жө мун миянтөг, пуксис кыр йылас, мөдіс виччысьны.

— Видз вылысь нин локтөны, — видзөдліс ю катыд Дзоля Таня.

Ю чукыль сайсянь мыччысис ыджыд совхознөй пыж.

«Мый өні мамалы висьтала, мый? Мый узьсис. Эг нуод Ивукөс детсайдө. Вошти».

Вом дорысь мыйлакө сөдзтысис вир. Буракө, курччыссьөма. Озын дорө матыстчис совхознөй пыж. Ме бергөдчи мөдарө, мед дырджык не аддзывны мамаөс, мед дырджык не видзөдлыны сы синъясө, мед көть ичөтика ылыстыштны сійо здуксө, кор ковмас ставсө висьтавны.

Кыкнан Таныс сюся видзөдісны пыжлань. Виччысьтөг найо өтвылысь горөдісны:

— Ивук!— да уськөдчисны котөртны пыжлань.

Ме вынысь бергөдчи, да пыр жө синмө сатшис Ивуклөн мыгөрыс, сійо сулаліс мамакөд орччөн дзик пыж нырас да шудаа нюмъяліс. Ме сідзи сы вылө видзөдлі, мый сылөн пыр жө воши чужөм вывсьыс нюмыс.

— Ивук!— чукөсті ме вокөс да лэбовті пыж сувтанінө. Ме котөртігкості Ивукөс вуджөдісны лыа вылө.

— Ивук! Тэ ловъя?— леті ме сійөс, видлалі кисө, коксө, юрсө, а сэсся топөді ас дорө. А та бөрын мекөд мыйкө лои, ас төдлытөг гораа бөрддзи.

— Мый, мый лои?— шызисны пыжысь чеччысьяс.

Ивук мынтөдчис меысь да чуймөмөн видзөдліс чужөмө.  
А ме мөді сыркъявны, ачымөс кутны эг вермы.

— Тонюк, мый лои, дугды,— лөнһөдіс менө матыстчысь  
мама да шылькнитіс юрөд.

А ме нинөм эг вермы вочавидзны, сөмын сыркъялөмөн  
бөрді. Став лунтыръя шогыс, буракө, синванас петіс.

А Таняяслы менам бөрдөмыс сэтшөм тешкодьөн ка-  
житчөма, мый найө мөдісны гораа серавны. Эз гөгөрвоны,  
мыйла менам бөрдсьө, кор колө нимкодясьны. И сэтшөм  
меным лои өбиднө, мый менө оз гөгөрвоны:

— А ті, а ті...— лөкысь бөрдігсор чилөсті на вылө.—  
Тіян серавсьө йөз шог вылас. Ме тікөд некор сэсса ог...

— О-о!— шуис Дзоля Таня.— Ёна тай колө бөрдысь  
Помаыд.

Найө кыкнанныс пыльсмунісны.

— Нинөм абусыс бөрдө, йөйыд,— содтіс Ыджыд Таня.

— Ті, ті асьныд,— тойышті ме найөс да уськөдчи  
котөртны сиктлань.

Эжа вылө воөм бөрын сөвті ассьым көлуйөс тазйө да  
медводз кайи кыр йылас.

— Мый нө мяян Таняыс оз кай? Сибдіс али мый вадор-  
рас?— шыасис Вера баб, коді век на виччысьө вөлөм.

— Локтасны,— нурбыльті ме да тэрмасьөмөн мөді  
восьлавны гортлань.

Лунвывлань алькөс борті кайөм бөрын бергөдчылі ва-  
дорлань. Таняяс да видз вылысь локтысьяс ёна бөрө кольө-  
маөсь.

Сөмын рытнас нин, бөрдөмысь дзикөдз дугдөм бөрын,  
ужнайтігөн төдмалі, мый Ивукөс катөдлөма аслас вөр керкаө  
Иван дядь, петкөдлөма сэтчөс местаяссө, керкасө, тшамъясө,



а сэсса рыгъядор, видз вылысь лэччигкежлө, вайёдöма мамö дорö. И найö öтлаын лэчасны гортö.

Мама видис Ивукöс, мыйла сийö менсьым юасьтöг мунис Иван дядьыскöд. Но Ивук вочавидзис, мый Иван дядьыс ачыс юалис Тонялысь. Öнi вöлись гөгөрвои, мый меным горзöма да көс-йöма висьтавны сийö.

## Ивук бöрдö

Ме да Ивук узьлам пыдi вежöсын. Жырйыс ыджыд, югыд, көть и кык öшиня сöмын. Лöсьыд танi медсясö водз тулысын, кор войясыс югыдöсь. Сэки ме мукöддырйиыс, кор ставөн унмовсясны, чечча да öшинь дорын дыр лыддьыся. Майбыр, некутшöм би оз ков. А öнi со август заводитчигад оз нин тыдав. Кутшöм ыркыд да лöсьыд жар лун бöрын пырны тайö жыръяс, водны небыд сöстöм вольпасьö, шебрасьны вöсньыдик эшкынөн. Да нöшта татшöм сьökыд лун бöрын. Ивук, буракö, узьö нин. Мудзöма. Шуда. Иван дядь кордонöдз волöма. Мый нö, «Ветерока» пыжнад. Шутөвтлісны. Ме нин батьлы кымынысь шулі, мед нуödлас менö коркö сэтчö, да көсийсьö сöмын: «Нуödла, нуödла». Со мый дыра нин нуödö. Весиг Ивук нин ветліс, а ме век на эг.

Аски көть мед оз узьсьы да Ивук садикас оз сёрмы. А то бара мыйкö ськөд вермас лоны. Да и мама öнi мичаа чуксавтöгыд оз нин коль миянös. Тшötш вöлі шызьöма менам бöрдöмысь.

Виччысьтöг кылі кутшöмкö шыяс. Лов шыös кутöмөн кути кывзысьны. Шыясыс кылісны Ивук крöватсьянь.

Быттьо гусьон бөрдө ли нускө. Буракө, вөтасьо мыйкө.

— Ивук, мый лои? — гусьон юала ме.

Чөв ланьтліс, сэсся бара кыліс нускөм шы.

— Ивук, мый лои? — гораджыка нин шуи ме.

— Йөраясыс жальөсь.

— Кутшөм йөраяс?

— Кодъяслысь сюръяссө босьталөмаөсь.

— Кытысь тэ сэтшөмсө аддзылін?

— Ме эг йөраяссө, а сюръяссө аддзылі.

— Кытысь?

— Иван дядь сайниксьыс.

— Но и мый? Миян со стөнын өшалө жө, Иван дядьыд жө вайліс.

— А сэні уна. Йөраясыс жальөсь, — бара на нускыштіс Ивук.

— А мый, тэ чайтан, йөраяссө виисны? — юала Ивуклысь.

— Дөрт, кыдз нө сэсся сюрсө шөдөдан?

Ме син водзө воис миян кодь сайник, и ставыс тыр йөра сюрөн. Сьолөм вылын татшөм мөвпсьыс лои немкө.

— Ивук, а мый, сюрис сайник тырыс?

— Абу эськө да. Стөнас квайт кымын. Колө пө лакөн мавтны да карө катны вузавны.

— Ивук, эн бөрд, йөраястө эз вины, — жаль лои вокө да мөді бурөдны ме сійөс. — Миян школаын висьтавлісны, мый тайө вөрсө пемөсьясыс быд во сюръяссө шыбитөны, а сэсся на местаө выль сюръяс быдмөны. Нөшта сюръяс сертиыс позьө төдмавны, кымын арөсө йөраыс, кымын чаль сюрас, сымын и арөс. А Иван дядьыд өд лесникалө, өна вөртыс ветлөдлө. Аддзас уськөдөм сюрсө и гортас вайө. Сідзи и чукөрмис. Эн бөрд, — бурөда ме Ивукөс.

Сійö, буракö, эскис меным, ланьтіс. А ме кöсйыси аслым, мися, кор мöдысьсö Иван дядьыс волас, ме юала сылысь, збыль чукöртіс йöраясөн шыбитöм сюръяссö, али...

## Кузь лун

Асывнас чеччи водз. Вöтлі луд вылö Серöдöс, гöрда-еджыда люкасьысь мöскöс. Сэссия нуöді детсадыö Ивукöс. Муннысö колö вичко дорті. Сэтчаньö тэрмасям да öдйö мунам, а бöрсö локтігөн не тшöкыда сувтлывла вичко дорас, выль пöв видзöдала стенъяссö, öшинь серъяссö, гөгöрта нияяс дорті, кодъяс зэв ёна мичмöдöны миянлысь сиктнымöс. Опонь дед висътавлывліс, мый найöс садитлöмаöсь миян сиктын вичко восьтан лунö. Со кутшöм джуджыд да веськыд, пашкыр да ён пуяс быдмöмаöсь. Налы сё гөгөр во, тöдлісны менсьым пöльöс и пöчöс, да налысь на мам-батъсö, да уна-уна мукöд йöзöс; öд батъö висътавліс коркö, мый войнаöдз миян сиктын овлöмаöсь öнія серти кык пöв унджык йöз.

Гортö локтöм бöрын верді чипанпиянöс, мыськалі тасьті-пань. А сэссия казялі, мый меным дзик нинöм вöчнысö. Луныс тöрытьяс кодъ жö мича, шондіа. Быттьö колö вадорö лэччывны. А кодкөд? Танаяс вылö тöрыт лөгаси. А мый эськö и лөгасьныс вöлі? Найö öд абу мыжаöсь Ивук вошöмсьыс. И збыль öд, йöй моз бöрді став йöз водзвылас. Дерт, сераласны. Но первойöн на дорö мунны бурасьны эз жö вöв окота. Век жö дасьтыси вадорö лэччыны: лöді тазйö кöлуй, пункті пясляян порошок да петкөді кильчö вылö. Мöдасны Танаяс лэччыны вадорö да, гашкö, чукöстасны.

Босьті киö «Выль посёлокын» нима книга, кодös неважён библиотекаысь вайлі, да пукси кильчö сод вылö лыддьысьны. Но лыддьысьöмыс водзö оз мун. Век Танаяс керкаяслань кыйкъявсьö. Со и найö. О-о! Талун весиг Ыджыд Таня тазйён лэччö. Сетöма мыйкö бабыс пеславнысö. Корасны оз? Корасны оз? Но Ыджыд Таня да Дзоля Таня мунісны ми керка дорті да весиг эз бергöдчывны ни эз видзöдлыны ме вылö.

Сідзкö, найö тшöтш лөгасисны. И мыйла ме горзі тöрыт на вылö? Мый öні лунтырсö мöда вöчны öтнам? Дöзмöмла, мый Танаяс эз корны, эз ло окота лыддьысьны. Пукті книгасö кильчö сод вылö. Петі град йöрö. Паськыдджыка осьті парник öдзös, сэні оналіс жарысла. Лук град вылысь весалі ёг турун. Сэсья бара вöчныс лои нинöм. Муні кильчö дорö да босьті киö книга. «Кор нин рытыс воас? Али Ивукös водзджык босьтны садсьыс?»

Сэтшöм лöнь ывлаыс. Некод весиг уличті оз мун. Челядь вадорынös, гырысьяс удж вылынös, а пöрысьяс гож сайын пукалöны, бара жö оз ветлöдлыны. Сöмын чипанъяс котсышталöны да Дзоля Танаяслөн йöрас корсюрö порсьыс рукöстлывлö, гашкö, юны корö.

Бөр кильчö вылö пуксьöм бöрын менö чукöстісны:

— Тоня, лок микöд лавкаысь ворсам,— кылі да юрös лэпті ме.

Тайö вöлөм шадринса нывкаяс корöны: Валя да Люся.

Тасалі кильчö öдзös да муні на дорö.

— Ми нин талун ю дорö лэччылім, пöттöдз купайтчим. А тэ эн лэччыв?— юасисны нывкаяс.

— Эг,— нурбыльті ме.

Люсяяс керка дорö вöчим быдöнлы чом, сэсья öтвылысь

гажөдiм вузасян лавка. Лапкор чукөртiм деньга пыдди, өктiм чаг — чери, лыа — песок, сёйысь вөчалiм-пөжалiм нянь тупөсыяс, пирөгъяс, шаньгаяс. Зыкө весиг волiм. Валя шуө, лавкаас пө пирөгсө да шаньгасө оз вузавлыны. А ми Люсякөд шуам, мый мөдам вузавны, миян асланым пекарняыс, мый колө, сийө и пөжалам. Кыкнад вермим.

— Лук пыдди позьө турун,— шуи ме.

— Лук гумыйд и сiдз на шедө,— шуө Люся, съод юрсиа збой нывка,— миян асланым лукыйс этша, а со Картин баблөн быдса кык град, сылысь нетшкам.

— Оз өд позь, пиняласны,— өлөдана шуи ме.

— Мый сийө өтнасөн сы мыйта лукнас вөчас? Ачыс меным век тшөктывлө сёйны,— бара шуис Люся.— Тэ, Тоня, танi сулавлы да видзөд туй вылас, оз-ө кодкө лок, а ми Валякөд нетшкам.

Рытөдз сэсся зэв гажаа ворсiм лавкаысь. Мунiгөн ставсө ас бөрся идралiм: лук турунсө, лыа, чаг торъяс — ставсө шыбитiм помой койланiнө.

Муртса удитi Ивукөс детсадйысь босьтны, и мам локтiс удж вылысь. Бать локтiс сёрөнджык зэв скөр чужөма.

— Тоня, тэ Картин баб йөрас пыралiн лук турунсө нетшкыны?— юалис сийө.

— Пыралi, но эг нетшкы,— гусьөн моз вочавидзи ме.— Валя да Люся нетшкисны, а ме видзөдi, оз-ө кодкө лок.

— Мун петав град йөрө да кыкнан китырыд нетшкы лук гумсө,— тшөктiс сийө.

Ме петалi да кыкнан китыр лук гум вайи батылы. Сийө видзөдлiс ме вылө да чорыдакодъ шуис:

— Мун пет кильчө вылө, пуксы да ставсө тайөс сёй.

— Меным оз ков, — муртса кывмөн шусис менам.

— Мед вөлі өтитөг ставсө сөйөма, — ыдждөдіс бать гөлөссө.

Ме петі кильчө вылө. Пукті лук турунсө аскөд орччөн. Сэтшөм ыджыд чукөр! Төді кө эськө, мый аслым ставсө ковмас сөйны, нинөмысь эськө та мыйтасө эг нетшкы. Лукыйс чорыдкодь нин, да и курыд. Öти бөрся мөдөс сюялі ме вомө ковтөмторсө. Матыстчыліс Руч, исыштіс менсьым сөянөс да вешйис бокө, буракө, думыштіс, аддзөма пө мый сөйныд.

Курыдсьыс ли өбидасьыс синва тюрөбөн лэччис бан кузя. И ставыс өд Ивук вөсна. А сылы веськодь. Ризъялө-ворсө со палич вөв вылын. А меным сы вөсна курыд лук сөй. Кывзыси төрыт сылысь, эг нуөд садикө. Нуөді кө эськө, Таняяскөд эг лөгасьөй, шадринсяскөд эськө эз ковмы ворсны. И луксө эськө эз ковмы сөйны. Картин бабыс ачыс Люсялы тшөктөма нетшкыны луксө, а сэсся элясьөма бательы. Шулі өд ме налы, мися, лук пыддиыс турун позьө босьтны. Налы, гашкө, гортас нинөм оз и шулыны, а меным лоө курзьөдчыны.

Ивуклы, тыдалө, дышөдөма ворснысө. Сувтөдіс вөвсө керка стен пельөсө, матыстчис ме динө.

— Мый керан?

— Он аддзы, лук сөя.

— Та мыйта?

Ме чөв олі.

— А мыйла тэ бөрдан да сөян?

— Батьыд тшөктіс. — И ме висьталі ставсө, мый талун мекөд вөлі.

— Вай ме тэныд отсала, — босьтіс сийө лук гум да суйис вомас. Някляліс да ньылыштіс. А ме син шармөдөмөн

видзёда сы вылө, өд некор луксö оз сёйливлы. А сійö мөдöс босьтис да и коймөдöс. Ме век сы вылө дзорга-видзёда.

— А тэ ачыл мый он сёй? — шензёмөн видзөдліс ме вылө Ивук.

Ме босьтi вомö лук гум, а аслам нин серамöй мөдiс петны.

Кыкнад вөлөм гажаджык. Көть и кыкөн няклясим, чукöрыс чинiс ньöжйö.

— Тоня, мун пыр да шу батьыдлы, мый сэсся некор йöзыдлысь лук гумсö он нетшкы, — велөдö менö Ивук.

— Ме эг и нетшкы.

— Но шу, мый весиг некор он пырав йöз град йöрас.

— Ог лысьт, сійö талун зэв скөр.

— Но лок либö мекөд.

Чоя-вока пырим керкаö. Кильчö вылө коли пемыдту-рунвижөн лөстальсь лук гум.

## Зэра луньяс

Лун-мөд сулаліс кос поводдя. Таняяс быд лун лэччывлісны вадорö. Мунлісны миян керка дорті, быттьö менö оз казаявны. Дузьялöны. Оз корны. Ме ог жö вöзйысь. Да и кызди вöзйысян, шуан, ме пö тшöтш тiянкөд. А найö, гашкö, оз и мөдны сёрнитны. Шадринсаяс дорö сэсся ог жö мун. Бурджык ас кежысь ола. Ачым эськö мыжа да, прöстаысьсö Таняяс вылас горзі. Ок и гажтөм өтнадлы кузь гожся луннад!

Сэсся лун нель кузяла зэрис. Тайö луньясыс нин нöшта гажтöма колины. И колі жö Таняяс вылас ыджыдавынсьö. И мыйла? Дзик нинöмысь вөлі. Лөгасисны. Налы мый, найö

кыкөнөсь. Ме өтнам. Налы, көнкө, Опонь дед бара мыйкө тешкодьюс ли повзьөдчанаос висьтавлө-а. А меным тани лоө өтнамлы овны.

Зэра луньясад весиг петавнысө некуйтчө. Телевизор, книга, горт гөгөр идрасьом. И ставыс. Чиган өшинь вылын жө пукалө, оз жө петсы зэригад. А Ручос некутшөм зэр оз кут, быд лун батькод удж вылө ветлөдлө. Сэссия эськө вөчали жө кабалаысь аканьяс. Öтисө нимти Аринаөн, мөдсө Маринаөн. Налы быдсяма пөлөс платтьөяссө рисуйталі да вундалі. Сэтшөм на мичаось артмисны. Пызан вылө быд аканьлы чом вөчали: сунис тюрик — улөс, истөг куд — телевизор, истөг кудьясысь жө вөчали кресляяс, ичөтик кабала кудьяс — пызан да крөвать. Аканьясөс вөччөда да удж вылө нуөдла, лавкаө, пывсянө, өта-мөд ордас гөститны.

Но өтнадлы и тадз ворснысө дышөдө.

Көть эськө Ивукос детсадыө он нуөд, но өд бара ськөд мыйкө лоө. Пола нин кольөднысө.

Мамалы ог жө висьтав, мый Таньяс мекөд оз ворсны. Шуас, ачыл пө мыжа.

Кор гажтөм лоө ворсны либө телевизор видзөдны да дышөдас лыддысьны, ме пукся өшиньдорса лабичө да видзөда ывла вылө. Ывла вылын гажтөм, быттьө арын. Оз ризьявны челядь, оз ветлөдлыны асланыс төждьясөн-могьясөн гырысьяс. Ме видзөда, кызди гөптө содө ва, зэр улын лөсталө турун да кыз пулөн корьяс, кызди букыштчөма енэжыс, быттьө мыйыськө лөгасьөма йөзыс вылө. Дзик менам өшиньлы воча, мачасян луд сайын, зэрсыйс көтасьөмла нөшта өна сьодасьөм вичко. Ме видзөда сы вылө да мөвпала, кызди войтырыс олөмаөсь тани важөн.

Коркө, Коми муө Степан локтөдз на, комияс эскөны вөлөм



Шонділы, Тöлысьлы, Тöвлы, Войпöльлы. Степан вайлöма  
вель Ен вера. Лöсьöдлöма коми шыпасъяс, вуджöдöма коми  
кыв вьлö бур сьыланъяс.

## Зарни Ань

*(Опонь дедлөн висът)*

Кор локтысь морт Степан, вель вера вайысь, вермис Па-  
маос, вöлі пуяс сайын морт, коді көсьис отсавны Памалы, но  
эз вермы. Тайö вöлі Памалөн пиыс, том да мича Патре.  
Уськөдчыліс нин сійö мездыны айсö, но сетöм кывйыс вöлі  
донаджык. А Степан дорö петгöдз Пама шуис пиыслы:

— Патре, вермас кө менö Степаныд, дорйыны эн уськөдчы,  
сылы, буракö, öні кодзулыс югъялö. Менам олöма нин ассьым  
нэм. А тэд тшöкта видзны комияслысь меддонаторсö,  
медыджыд Енсö — Зарни Аньöс. Синсьыд ёнджыка видз,  
мед Степан киö оз веськав. Көсьысян-ö?

— Көсьыся, айö,— шуис Патре.

Ёвкнитіс Патрелөн сьөлöмыс, кор аддзис, мый лои  
батьыскöд, йöзвиясыс рудзмуніны, да сійөн, буракö, эз веськав  
Степанлы сьён öдйöдöм шыыс.

Торйöдчис Патре аслас ёртыскöд йöз дорысь, пуысь пуö  
дзедьсясьöмөн, мед не шедны Степанкöд локтысь том моло-  
дечьяслы, лэччисны найö ю дорö, тэрмасьöмөн лэдзисны пыж  
да йоткысисны зібйөн. Вуджисны Виска ді вьлö.

— Виччысьлы, ме регыд,— чöвтіс Патре ёртыслы да  
воши пемыдас.

Кок улө өдва сюралысь ордымөд кайис сійө ді шөрас, сөмын сылы да батыслы төдса пу дорө, перйис горсйысь Зарни Аньсө, мичаа төбис кос рузумөн.

— Но мый, кодарлань? — юалис сылысь ёртыс, кор сійө бөр воис пыж дорө.

— Урал излань ковмас сетчыны. Катам Эжваті, вуджам Печора ю вылө.

— Сідзкө, мөдим.

— Кежалам сиктө. Босьтам Гараньёс аскөд. Ог вермы ме сійөс татчө кольны. Муса сійө меным. Гөгөрвоан?

Бөрсө сувтісны сиктсьыс улөджык, бадь кустьясө сайөдчөмөн. Гараньла муніс Патрелөн ёртыс. Аслыс сылы сиктас кайнысө эз позь, сы ордын вөлі Зарни Ань.

Сиктын оллялөм да горзөм шыыс мөдіс лөньны. Патрелөн сьөлөм вылас вөлі шог. Лоө шыш моз мунны ас чужанінысь, ас йөз дорысь. Кытчө? Мый сійөс виччысьө водзын? Гашкө, вермас сійө Эжва катыдса сиктьясысь чукөртны мужикуловсө да бөр вөтлыны Степанөс? Но медводз колө меститны-дзевны Зарни Аньөс. Батыслы кывсө сетөмыс меддона.

Кыліс бадь кустьясын шарөдчөм. Патре коскө ошөдөм пуртөсысь перйис пурт. «Степанлөн кө йөзыс, ковмас тышкасьны тані бөрья здукөдз, а Зарни Аньөс вөйтны», — вирдыштіс сылөн юрас. Но локтөны вөлөм ас йөз, ёртыс да Гарань.

Патре топөдыштіліс полөмысла тіралысь Гараньёс морөс бердас да юалис:

— Эн сетчы Степаныслы, эн пыртчы выль вераас?

— Эг. Ме дзевси гөбөч пельөсө. Эз аддзыны менө. Пемыдыс отсалис.

— Ӧдва и сюри,— сёрниӧ сюртчис Патрелӧн ёртыс.— Дзебсьӧма да нинӧмысь оз пет. Весиг меным оз эскы.

— Мунам миянкӧд. Вьль местаӧ овмӧдчам. Ме ордын Зарни Ань. Сийӧ ваяс миянлы шуд,— шӧпкӧдис том морт аслас мусалы.

— Тэкӧд кӧть ме кытчӧ муна, кӧть му помӧдзис,— вашкӧдис том ныв.

Топыда кӧрталіс лаз вӧньсӧ Патре, лайкнитчыліс чужан мулы, нель копыр чӧвтіс: асыввылӧ, лунвылӧ, рытиввылӧ да войвылӧ, Эжвалы копыр, Емвалы копыр. Ичӧтик сепысӧ (мешӧкӧ) пуктіс содз тыр чужан му, пуксисны ставӧн пыжӧ да йӧткыштчисны зібйӧн ас берегсянь...

Ылӧ ковмис мунны чужанінсьыс Патрелы да нуны аскӧдыс комияслысь медыджыд Енсӧ — Зарни Аньӧс.

— Дедӧ, а кӧні ӧні Зарни Аньыс?— юала ме.

— Тайӧс некод оз тӧд. Кытчӧ муніс Патре, кытчӧ дзебис дона Енсӧ. Коми йӧзыд ӧд сэки унаӧн пышйисны Печора вылӧ, Сибирӧ, Алтайӧ. Ӧтияс шуӧны — кӧнкӧ пӧ Об ю кывтчӧсын Зарни Аньыс (сэні комияс жӧ олӧны), мӧдъяс шуӧны — Алтайӧ пӧ нуӧмаӧсь, коймӧдъяс шуӧны — Уралас пӧ из горсийӧ дзебӧмны.

— Дедӧ, тэ миянлы тайӧс мойдін али збыль вӧвлӧмтор висьталін?— юалӧ Дзоля Таня.

Опӧнь дед читкыртліс пыдӧ вӧйӧм кельыдлӧз ичӧтик синьяссӧ, малыштіс дзор тошсӧ да вочавидзис:

— А збыль пӧ тайӧ вӧлӧма. Збыль. И ӧні на кӧнкӧ эм Зарни Аньыс, сӧмын некод оз тӧд кӧні. Ёна пыдӧ дзебӧма Патре коми йӧзлысь медся пыдди пуктана Енсӧ.

— Дедӧ, а кодлы шедӧ Зарни Аньыс?— юалӧ Ыджыд Таня.

- Коді медуджач, сылы.
- А мый сэки лоо?
- Вых олём пуксяс, шуда олём.

Некыз оз вун менам тайо висьтыс, кодос Опонь дед тулыснас висьтавліс коркө, татшөм жө зэра лунө. И менам эм көсйөм, кодос ме некодлы-некодлы на эг висьтавхы. Быдма да мөда корсьны Зарни Аньос, медым бөр Коми муө вайны. А некодлы та йылысь ог висьтав сы вөсна, мый оз эскыны меным, а гашкө, и серавны на мөдасны. А ме аслым шуи нин: велөдчыны мөда бура-бура, уна лыддысьны, мед унджык төдны, а сэссия школа бөрын велөдча университетын и лоа археологөн, мөда туявны важ йөзлысь олём. И адза Зарни Аньос.

А талун Вера баб ме дорө воліс. Зэрыс кобыштіс, да ме петі кильчө вылө. Сиктыс мичаа мыссьөма уна луна зэрнад, быттьө выль пөв вежөдөма, туруныс тайо лунъясас быдса весьт быдмөма. Пукала сод вылын, радейта тадзсө пукавнысө: ставыс тыдалө, йөз ветлөны, посни челядь гөп дорын резсьөны. Со и Вера баб кытчөкө ветлөма, локтө. Ме дорө кежис. Киас ичөтик сямөд чуман.

— Вөр дорө кайлі, видзөдлі, эм абу чөдйыс. Эмышт тай. Позьө вотчыны ветлыны. Петкөд мун тасьті, кондышта тіяны. Бөрти йөлөн сөянныд. Мамыд уджалө да оз жө удит кайлыныс-а.

Ме петкөді ичөтик лөз дорьяса тасьті.

— Зэв ичөтикос петкөдөмыд да,— броткыштіс сійөгырысь лөз вотөссө кондігмоз.— Чөсмась.

— Аттө.

— Тоня, мыйкө тай дугдин ми ордө воливлынытө? —  
сюся видзөдліс сійө ме вылө.

Ме кылі, кызди менам став вирөй ылькнитіс чужөмө да  
мөдіс сотчыны-потны. Юрөс өшөді, нинөм ог шу. Да и  
мый на шуан. Мый горзі Таняяс вылө да найө лөгасисны, а  
бурасян туйсө ог адзөй. Яндзим өд висьтавысө, көть и  
ачым мыжа.

Дзирьяті нин петө вөлі Вера баб, бергөдчис мелань:

— Асыв кежлө дасьтысь. Оз кө мөд зэрны, кайлам мекөд  
вөрө чөд вотны. Мед тэныд оз ло гажтөм, Таняясөс тшөтш  
босьтам.

Рытывбыд ме кыпьялі нимкодьла. Аски Вера баб катөдлас  
вөрө, өкта чөд да вая гортө. И Таняяскөд бурасям.

# СЭЙТЫ ДОРЫН

*висьт*

Дима котөртис сикт кузя. Пеля шапкаыс юр чук йылас, курткаыс кизявтөм. Со и сикт пом. Дзик медбөръя керкаас оліс Коля, Дималөн ёртыс. Керка дорас гораа увтөмөн котөртысь детинкаос чолөмаліс Лапъяпель, но мыйөн сөмын төдіс Димаос, мөдіс ниртчыны кок бердас да легөдны бөжнас.

Детинка кайис кильчө вылө, роскөн пурс-парсвөчис лымысь гын сапөгсө да пырис керкаө. Гортас Коля вөлі өтнасөн. «Вот и бур»,— мөвпыштіс Дима.

— Кывзы, мый тэд висьтала. Кывлі сёрни бательысь Митрей Колякөд. Локтан шойччан лунө сёрнитчисны ветлыны Сейтыө. Видзөдлам пө, пөдө оз черыс.

— Кольөм во өд, буракө, ветлісны жө?

— Ветлісны. Батьө быдса мешөк чери вайліс. Вөзйысьлам тшөтш, мед миянөс босьтласны.

— Да,— гажтөминика шуис Коля.— Регыд вуграсьнытө гожомнад сэтчө нинөмла лоө мунныс.

— Мыйла нинөмла? Сэн медбура босьтө да.

— Кыясны тэнад батьыд кодьяс. Поснинас нуасны, мешөкъясөн.

— Сэтшөм кокниа кө сюрис, тэ эськө эн ну? Батьө висьталө, сөмын пө гумлав сакнад.

— Кывзы, Дима, а уна юкмөс кө вөчан, гашкө, и оз пөд чериыс?

— Уна юкмөс? Код сійөс вөчас?

Колялөн чужөмыс зумышмис, ачыс чөв ланьтіс. Мыйкө мөвпаліс. Турунвижов синъясыс сылөн видзөдісны пызан помө. Руд чукыля юрсиыс вевтгыштөма джуджыд кымөссө.

— Ылалін?— серөктіс Дима да юрнас бөрвылө гогнитөмөн вештіс веськыд съөд юрси пратьяссө синъяс весьтсьыс.

— А кывзы, Дима, а ми кө асьным чукөртчам, мунам Сейтыас да юкмөсьяс вөчалам? Мед чериыс оз пөд? И тэнад батысь да Митрей Коляысь водзджык. А? Мед мунасны, а некутшөм чери оз нин пөд.

— Да, тэныд лөсьыд шунытө. А менө батыө тасмаалас,— нориника шуыштіс Дима.

— Мыйысь? Бур вөчөмсьыс али мый? Асыв жө водзаводз мунам. Ме чайта, рытөдзыс бөр воам.

— А школаад.

— Эк эськө, водзджык кө! Мед колян шойччан лунө позис ветлыны.

— Öні кылі сёрнисө да. Митрей Коля вайис миянлы турун тракторнас, öні пукалөны папкөд да варовитөны. Митрей Коляыс и висьталіс, коркө пө во квайт сайын дыр абу казялөмаось чериыслысь пөдөмсө да муртса абу дзыкөдз бырөма Сейтысьыс. Куим во мысти вөлись чериассьөма тыыс.

— Вай ветлам, мездем черисө!— шызис Коля.— Аски жө. А öти лунсьыд школаад нинөм оз шуны.

— Дерт, тэныд оз шуны, бура велөдчан да. А меным...

— Но и трус тэ, быдторйысь полан!

— Ме пола? Мунам либө. Абу на польсь рөдысь.

— Мед важон тадз. А они котортлы, Ольошто чукостлы, мед волас. Сёрнитчам, мый босьтны да кымын часын асывнас петны.

## Туйын

Мөд лун асылө детинкаяс, лызяось сьорсьон-бөрсьон пырисны Кывтыдпомса вөрө. Мышканыс быдөнлөн мышноп. Коля пельпом весьтын чурвидзө батыслөн ружьейс. Лапьяпель зэв радпырысь котөртис медводзын.

Март помнад лунъясыд кузьось нин. Көть петисны гортсьыныс водз, но вөрас пыригөн нин вөлі югыд.

Сейтыөдз, кытчө мөдөдчисны детинкаяс, вөлі километра дас нель. Восьлалисны чожа. Медводзын мунис Коля, сийө бура төдис туйсө. Сылөн батыс тшөкыда ветлывліс кыйсьыны да корьяскө босьтлывліс тшөтш и писө. Дас куим арөса Коля эз лёка лыйсьы. Көть талун ружьесө и босьтис юасьтөг, но эскис, мый кор төдмалас батыс, кытчө да мыйла мунисны детинкаяс — ёнасө оз вид. Мукөдьясыс ветлывлісны жө Сейты дорөдз, но сөмын гожөмнас, вуграсьны. И некод сэтысь эз волы тыртөм ноийөн.

Челядь шырсьисны вөр кыскалан туйті. Мунисны чөла, быдөн ас думсө думайтіг. Буракө, водз на, варовитныс да ышмыныс эз на вөв окота.

Регыд мысти кежисны кер петкөдлан важ туйө. Лымыйс пуксьөма нин, чорыдкодь, и муннысө эз вөв сьөкыд. Асывья кымөрьясыс разалисны, мыччысис тувсовья шонді. Сы югөр



улын вöрыс бытгьö нюмъёвтис, мичмöдчыштис, лыбöдчыштис.  
Челядълöн чужöмъясыс тшöтш кыпыдмисны.

— Дима,— кылис Öльöшлөн ёсь гөлöсыс,— а кöинъяскöд  
кö вочаасям, мый мöдам вöчны?

— Мый ме вöча? Со тай Колялөн ружье эм. Лыяс.

— А вот тэ кö öтнад вочаасян?

— Пуö кая.

— Татшöм ыджыд нопнад. Увлань кыскас. Либö  
кутшöмкö увйö крукасяс, и водзö ни бөрö сэсся. Сэки тэнö  
кöиныд и — тшап! Кхе-хе!— серöктис Öльöш.

— Мышноптö öд позьö на шыбитны,— зэв збыльысь  
шуис Дима, буракö, эз гөгөрво Öльöшлысь шмонитöмсö.

— Кывзы, Дима, а тэ збыль вылö некор на эн вочаасьлыв  
кöиныскöд?

— Эг. А мый, тэ аддзысьлин? Гашкö, здорovайтчин и?

— Вочаасьли, дерт. Ме весиг кыйлывлі кöинтö,— некыдз  
эз вермы öвсьыны Öльöш.— Муна ме вöли тайö вөр петкöдан  
туйтыс...

— Кытчö?

— Но, пувла кайлі кольöм ар. Видзöда, воча пон локтö.  
Оз и пов, весьтас ме вылö. Мися, мый тайö понйыс öтнас  
ветлö вөр туйöдыс. Матысмис. Видзöдлі да, сьölöмö кок-  
лябөрö лэччис: бöжсö понйыд увлань лэдзöма. Ёна повзи, а  
сийö вомсö паськöдис и мелань. Ме сöмын вевъялі кырым  
керны да восьса вомас пыдöджык киöс йöткыны. Пиньнас  
эськö сойöс дойдис жö, но ачыс пöдi. Вот.

— Хы-хы, эн сөр!— серöктыштис Дима.— Кöинтö куш  
кинад он на кый. Сийö водзджык тэнö пöдтас.

— Он эскы? Но кыдз кöсьян.

— Эз нинöм кывсьыв да.

— Ме өд сійөн ошйысьны ог мөд. Туй бокас шыбиті да и коли. Ме өд сэки ог на төд вөлі, мый кӱин виӱмсьыс премия сетӱны. Полі на штрапысь.

— Премия?

— А мый нӱ? Со кӱть Колялысь юав, сылӱн батыс вӱралысь, тӱдӱ.

— А ме нӱшта на и ошкӱд вочаасьлі,— бара босытчис висытавны Ӗльӱш.

— Да эн сӱр сӱсся, тырмас. Ошкыдкӱд кӱ вочаасян, гачад на лӱдзыштан,— ӱлӱдіс Дима.

— Он эскы? Ме тӱкӱтӱ сійӱс эг кый...

Ӗльӱшӱс челядь радейтисны. Кор сійӱ заводитліс мыйкӱ лӱсьӱдлыны, руд синъясыс сылӱн югзыывлісны, гӱгрӱс чужӱмыс банйивліс, а чужӱм вӱраснас кужис петкӱдлыны код йылысь висытавліс. Сійӱ кужис сӱрны быдсямасӱ да лӱсьӱдліс кӱ вӱвлытӱмторъяссӱ, то олӱмас ӱртъяссӱ нинӱмӱн эз ылӱдыв. Та вӱсна сійӱс пыдди пуктылісны.

Детинкаяс сӱрнитисны-сералісны, ылӱдлісны асьныс асьнысӱ, но сӱлӱм выланыс эз вӱв лӱсьыд. Ӗд велӱдчан лун, а найӱ шышъяс моз вӱрӱ кайӱны. «Но и мед,— ӱвтыштіс кинас Коля, быттӱ вӱтліс сӱлӱм йирысь думъяссӱ.— Ӗти луннад ӱна огӱ кольӱй. Бӱр вӱтӱдам. Рытнас юалам гортса уджъяс, вӱчам. Нинӱм»,— такӱдіс ачыс асьсӱ.

Сиктыс, кӱні олісны детинкаяс, сулаліс Эжва ю бокин, джуджыд керӱсын. Петан керӱсас, видзӱдлан, и сӱлӱмыд ыркмуно! Мӱдлапӱлыс тыдалӱ уна верст сайӱ: видзьяс, вӱрдінъяс, веретяяс, сӱнъяс, а шуйгавылас ю дор моз пуксьӱм сиктыясыс, веськыдвылас ю дор сӱрт, вӱрӱн тырӱм тод. И лолыд тырӱ радлунӱн.

А школаыс, кытён велөдчөны детинкаяс, мөд сиктын, сизим верст сайын. Быд лун найо ветлөны школао лызьөн. Со и талун лөсьөдчисны школао моз вылө, сөмын петісны водэджык часөн-джынійөн, мед мукөд велөдчысьясыс эз казявны налысь вөрө кежөмсө.

Зэв нин гусьөн лөсьөдчис Дима. Медясө дзебясис аслас чойысь, Зинаысь. Од кытчө оз лөсьөдчыв мунны, чойыс — бөрсяныыс. Кыйөдчас да вөтчас. Быд зон ворсөмө пырас. Төрыт рытнас эськө казяліс жө нопьяс сөвтчөмсө, но Дима, кыз аслыс кажитчис, зэв мудера пөрьяліс Зинаос, батьөкөд пө шойччан лунө кайла Сөйтыө чери кыйны. Эскис тай быттьө-а. Эз сэсса кыйөдчы. А талун узьө на коли. А то эськө бара вөтчис.

Вөрыс вежсис. Пашкыр лапья коз пуясос вежисны ловпуяс. Ордымыс муніс увтасінтіджык. Арнас татчө детинкаяс воывлөны уль путника. Ёна петлывлө. Сэсса туйыс кайис пожөма ягө. Зоньяс лызь бедьяс вылө мыджсьөмөн сувтышталісны, шойччыштісны, дзоргисны-видзөдісны джуджыд пожөмьяс вылө.

Друг Лапьяпель чошкөдіс пельяссө, а сэсса мөдіс косявныувтны. Здук мысти уськөдчис сэтчань, кысянь дзик на өні локтісны детинкаяс, да вошис чукыль сайө. Коля лэдзис пельпом сайсьыс ружьесө. Но пон дугдіс увтнысө да регыд пуяс сайсянь бөр воис бөжсө легөдіг. Детинкаяс шемөсмөмөн видзөдлісны өта-мөд вылас. Но нинөм чуймөданаыс эз ло. Пуяс сайысь мыччысис Зина.

— О-о! — сөмын и вермис шуны вокыс. — Он жө нин тэысь мынлы.

Зина чөла матыстчис. Тэрыба мунөмсьыс чужөмыс банйөма, вокыс кодь жө съөд юрсиыс петыштөма шапка увсьыс

да мича чикыльбөн водёма пöсйлөм кымöсас. Портфельыс мышкас. Зина юалана видзöдiс то вокыс вылö, то Коля вылö. Буракö, виччысис, мый шуасны. Но детинкаяс чöв олисны. Медбöрын чöв-лөнсьö торкис Дима, лёкысь равöстiс:

— Код тэнö татчö корис?

— Тэ!— вочавидзис Зина.

— Ме?!— чабыртiс Дима кулакъяссö.— Ме кори?!

Татшöм лöсьöдлөмсö нин Дима терпитныс эз вермы. Да и збыль, гашкö, ёргьясыс думыштасны сы йылысь татшöмтор. Детинка дась вöли уськöдчыны чойыс вылö, но Коля сийöс öлöдiс.

— Но, мый сэсся, локтiс нин да. Мöдiм,— кывкöрталiс сийö.

Но Дима век жö петкöдлiс чойыслы кулаксьö.

Мöдiсны водзö. Медбöрын мунiс Зина.

Сийö вöли рад, мый ставыс татшöм кокниа ладмис: детинкаяс босьтiсны сийöс аскöдыс. А муртса öд эз ылав, кор тöрыт Дима шуис, мый шойччан лунö мунасны. Талун асыв сийö садъмис, кор Дима вöли петö нин гортсьыс.

— Мам, кытчö Димаыд мунiс?

— Школаö кө-а, кытчö сэсся. Водзджык пö талун колö.

«Ылöдлiс. Сейты дорö мунöны»,— визьнитiс сы юрын. Тэрмасьöмөн пасьтасис, портфельсьö мыш саяс лэптiс, весиг сейтöг петiс гортсьыс. Лызиясис да котөрөн уськöдчис вötöдны зонкаясöс. Кор Зина воис сикт помö, детинкаяс вöлины ылынöсь нин, дзик вөр дорас, здук мысти найö вошины пуяс сайö.

Коля мунiс медводзын. Вомгорулас мургис-сьылис. Асывсянныс кө сийöс йирисны думьяс школа йылысь, то Зина воём бöрын став йывсьыс вунöдiс. Коля эськö некодлы

эз висътав, сійӧ и ачыс аслыс на эз лысьт кайтыштны, мый сылы век гажаджык да кыпыдджык, кор матын Зина. Та вӧсна пыр лоӧ ӧлӧдны воксӧ, Димасӧ, кодӧ яндысис чойсьыс да дась вӧлӧ быдлаысь вӧтлыны сійӧс.

## Сейты дорын

Коля зэв зӱля зымӧдӱс пешаӧн йисӧ. Йи торъясыс шондӱ югӧр улас уна рӧмӧн резсисны ӧтарӧ-мӧдарӧ. Уджалис ӧти свитер кежсьыс, курткасӧ важӧн нин пӧрчис да шыбитӱс лым вылӧ. Свитер соснас тшӧкыда чышкышталӱс кымӧссьыс пӧсьсӧ.

Тайӧ юкмӧсыс Колялӧн коймӧд. Дима да Ӗльӧш бо-кынджыкӧсь. Шуисны вӧчавны юкмӧсьяссӧ визьӧн быд вит метр ылнаӧ. Коля шӧрас, ӧтар-мӧдарас ӧртъясыс. Ыджыда восьлалӧмӧн мерайтӱсны юкмӧс костсӧ. И куимнанныслӧн нин коймӧд юкмӧс. Коля здук кежлӧ сувтыштлӱс, чышкыштӱс пӧсьсӧ, видзӧдлӱс вӧрдорса яра ломзъысь бипурлань, кӧнӧ пусис Зина, да мый вынсьыс зутшнитӱс вӧснялӧм нин йиас. Пешаыс писькӧдӱс йисӧ да суныштӱс ваас, муртса аскӧдыс эз кыскы Коляӧс. Мӧдысь, коймӧдысь. Пешанас жӧ лӧптышталӱс йи торъяссӧ да сӧниксӧ йи вылас. Лӧнис, мӧдӱс виччысьны черияслысь локтӧмсӧ. Мыччысис ӧти ныр, мӧд... Коля нюмдӱс.

— Э-эй! — шенасис бипур дорын Зина. — Пажун!

Коля босьтӱс пешасӧ, ӧвтыштӱс детинкаяслы: мӧдӱм пӧ, да веськӧдчис бипурлань.

Кутшӧм чӧскыдӧн кажитчис юкваыс! А ӧд чери вӧснаыс весиг венӧ волӱсны. Дима, кыдз аддзис медводдза черияссӧ

юкмөссъыс, пыр и босьтчис сакавны. А Зина мөдiс горзыны, оз пö позь, эз öд найö чери кыйны локны. Бара ковмис чоя-вока коласö пырны Колялы. Öтвылысь сёрнитчисны юква вылö век жö босьтны черисö. И весиг гортö нуыштöм вылö.

Пажнайтöм бöрын нöшта на кык юкмөсөн морт вылö кералисны. Весиг Зина ки вежлөмөн тшöтш отсасис. То Колялы зутшйöдлыштас, то вокыслы.

Ивлаыс заводитiс рөмдыны. Колö петны туйö. Пемдытöдзыс воодчыны гортö. Дерт, вöчöма лои этша, мый нö дас вит юкмөсыд та ыджда тыад. Окота эськö вöли паськөдчыштны на, но колö лэччыны гортö, аски сэсся школаö нин котöртасны.

Коля босьтiс асьыс пешасö, матыстчис Дима юкмөслань, кöни зэв зiля уджалiсны чоя-вока. Колялысь удж помалөмсö аддзöм бöрын, Дима мөдiс тэрмасьны. Став выннас сетiс пешанас йиö, пешаыс кокниа пырис, друг пырөмсьыс Дима заводитiс усьны увлань юрөн, но кутчысис да нетшыштчис бөрвыв. Сэки жö вильдiс йизьöм гын сапöгыс да зонка тöдлытöг бузгысис коскөдзыс ваö. Кылис Зиналөн ёна повзяна горөдöм, а Колялөн крепыд кыыс кватитiс Димаöс шошаöдыс. Кинас отсасигтыр Дима петiс йи вылö. Коскөдзыс вöли сюлю кодь ва. Котөрөн на дiнö воис Öльöш.

— Гын сапöгсьыд васö кисьт,— тшöктiс сийö, а ачыс пöрчис курткасö да чөвтiс йи вылас, мед сэтчö позис сувтны Дималы.

Дима пöрччылис кöмсö, кисьтiс васö, выльысь нямöдасис да бөр гын сапөгасис.

— Но колö жö! Мунсис миян,— шогалис Дима.

— Котөрөн! Ковмас выльысь дасьтыны бипур!— тшöктiс Коля, и ставөн уськөдчисны кусöм нин бипур дорö.

Коля да Ӧльӧш вайисны кызіник кос конда, выльысь биасисны. Дималысь гын сапӧгсӧ весалисны лемасьӧм йисыы да лӧсьӧдісны косьтыны, ачыс Дима бипур дорас, бергалӧмӧн косьтысис.

Регыдӧн гортӧ мунӧм йылысь нинӧм вӧлі и думайтны: сувтас кӧ Дима йи вылас — ва кӧмыс пыр жӧ йизяс.

Ӧдйӧ пемдіс. Рытланьыс мӧдіс кӧдздӧдны. Челядь гажтӧммисны. Весиг Лапъяпель лунтыр ризъялӧм бӧрын чӧла куйліс бипур дорын.

— Ты саяс керка эм, вӧр чом, позьӧ сэтчӧ мунны, сэн узыны,— вӧзйис Коля.

— Гортӧ мунамӧй, косьмас да,— нора шуыштис Зина.

— Эн няргы, тәнӧ татчӧ некод эз кор,— скӧрыськодъ вомалис нывкаӧс вокыс.

Зина ланьтис, эз кӧсйы вензыны.

Чӧв олыштисны. Весиг Ӧльӧш раммӧма, оз чилкъяв асья мозыс. Коля кежаліс матысса пу дорӧ, кытчӧ ӧшӧдліс ружьесӧ, зарадитис да лыйис вывлань. Сэссия бара сувтис пельын чуналана чӧв-лӧнь.

— Со нӧ кодкӧ локтӧ ты мӧдарсянныс,— медводз казяліс Ӧльӧш.— Ага, Зин, сюрин,— повзьӧдіс сійӧ,— ачыс Вӧрсаыс локтӧ.

— Ланьт!— чирьштис сійӧс Зина.

— Збыль ӧд кодкӧ локтӧ миянлань. Лызя и.

— Сейты вывса Иваныс!— вашнитис Ӧльӧш.

— Коді?— юалис нывка.

— Ачыс кӧзяиныс.

Зиналӧн ыркмуніс сьӧлӧмыс, но сійӧ эз петкӧдлы полӧмсӧ. Лапъяпель жӧ локтысьсӧ мӧдіс эргыны. Детинкаяс да нывка чӧла виччысисны локтысьсӧ.

— Чолөм!— шыасис воысь морт.

— Видза оланныд!— шызисны челядь, кор төдісны воысьсө. Тайё, вөлөмкө, Сергей, татчөс егер. Сійө неважөн на армияысь локтіс да регыдөн и пуксис егерас.

— Мый нө тані вөчанныд? Купайтчыны али мый локтінныд?— шмонитыштіс сійө косьтысьысь Димаөс аддзөм бөрын.— Али чери кыянныд?

— Ог,— өтгшөтш вочавидзисны челядь.— Ми локтім вөчавны юкмөсьяс, мед чериыс оз пөд,— стөчмөдіс Коля.

— Асьныд локтінныд? Некод тшөктытөг?

— Асьным... Нөшта гусьөн на бать-мамысь... Весиг школаө эг ветлөй,— эскөдіс Öльөш, но Сергей видзөдіс сы былө кызкө эскытөма.

— Збыль но, ветлы да видзөдлы, кымын юкмөс вөчим,— индіс кинас Öльөш.— Чериыс збыль вөлөм пөдө, но ми эг кыйсьөй.

Сергей чөв олыштіс, буракө, мөвпаліс, мый вөчны, сэсса шыасис:

— Öні, вой улас, да нөшта и ва көм-паськөма на ёртныд, гортаныд эн нин мунөй. Локтө вуджамө тысө, сәні вөр чомьяс узям. Гынкөмыд войбыднас косьмас,— синсө чөвтліс сійө көмтөм Дима былө.

## Вөр чомйын

Чомйыс ты вывсянь эз тыдав, вөлі неуна пыдынджык, да и нөптолын кодь. Сергейлөн пачсө ломтылөма вөлөм, керкаас шоныд. Сійө өзтіс пөнар. Челядь пуксялісны пызан



гөгөр, азыма панялісны юква да юисны пось чай. Водны лосьодчисны наръяс вылө. Дималысь гынкөмсө пуктісны косьтыны пач вылө. Тайё вөр керкаас эз вөв гор, а кирпича пач.

— А кытысь тані кирпича пачыс? — шензъыштіс Зина.

— Тайё ас вөчөм кирпич, — висьталіс Сергей.

— А коді вөчис?

— Он төд али мый? Ачыс Сёйты Иваныс. И керкаыс сылөн. И пачыс. Гөгөрвоин? — бергөдчыліс сыланьё Өльөш.

— Эн повзёдчы, кутшөмкө Сёйты Иванос отарө гаралан, — дөзмис Зина.

— Юав Сергейлысь. Збыль өд?

— Сідзи, — лабутнөя вочавидзис Сергей. — Меным дедө на висьтавлывліс.

— Висьтав мянлы, — корны мөдіс Өльөш.

— Водалөй либө да висьтала, — көсйысис Сергей. — Вой улө вот лоө казътылөма мортсө...

— Аски ковмас зэв водз чеччыны да мунны, мед урок вылө ог сёрмөй, — кайтіс Зина водны лосьодчигас.

Сергей мыйкө мөвпалігтыр пукаліс пызан сайын да Зиналысь кывъяссө кылөм бөрын лэптіс юрсө.

— Кывзө, зонъяс! Кольччылөй аски нөшта өти лун кежлө. Кымын юкмөс вермам, вөчам лунтырнас, рытланьыс лэччам отлаын.

— Школаын видасны, — гарыштіс Зина.

— А школаад ме аскомысь вола да висьтала, мый ті тані отсасинныд. Ме чайта, ошкасны на, а оз пинявны. А Зина, югдөм бөрас лэччы гортө, висьтав, көнөсь ті вөлінныд, мый вөчинныд, мед гортсаясид оз шогсьыны.

— Ме ӱтнам ог лӱчы. Сӱмын ставӱн ӱтлаын мунам.

— Зонъяс кӱ кольччыласны, тӱныд колӱ лӱчыны. ӱд со талун нин тӱнӱс воштӱсны. Корсысыӱны нин, колӱкӱӱ,— кывкӱрталӱ Сергей.

— Зина,— кызкӱ торъя небыда шыасис Коля нывка дӱнӱ,— лӱчы тӱ гортӱ асывнас, а ми кольччылам. Но? Пырав ӱльӱшъясӱ, ми ордӱ, висътав, мый ми дзоньвидзаӱс, рытнас воам.

— Но,— кӱсыйысис Зина.

Дима чуймӱмӱн видзӱдлӱс чойыс вылӱ. ӱнӱ на ӱд зӱв збоя ӱткажитчис! Сылӱн чойыс, да та ӱдъя вежис кывсӱ! Тайӱ мыйкӱ вӱлӱ выльтор. Да и водзджык на Дима казявлӱс, мый Коля тшӱктас, Зина пырысь-пыр жӱ вӱчӱ. А вокыслысь нинӱм оз кывзысь.

— А ме тӱнӱ асывнас кольӱдышта,— содтӱс Сергей.

— Лапъяпелькӱд лӱччам,— дзикӱдз сетчис Зина.

Водалӱм бӱрын да бисӱ кусӱдӱм бӱрын нин ӱльӱш казытыштӱс:

— Сергей, тӱ ӱд кӱсыйн Сӱй Иван йывсыд висътавны.

— Но, кывзӱй инӱ. Коркӱ зӱв важӱн овлӱма миян сиктын том зон Иван. Зӱв бур кыйсысь вӱлӱма, тыртӱм киӱн гортас абу воывлӱма. Йӱзыс вӱлӱм шуӱны: ачыс пӱ звер-пӱткаыс сылы киас локтӱ. Сӱтшӱм удал вӱлӱма. И вӱлӱма сылӱн сьӱлӱм косытысь ныв Дуня. ӱна ӱта-мӱдсӱ радейтлӱмаӱс. Но верӱс сайӱ Дуняӱс оз сетны. Батьыс сылӱн, кока лавка Пантиль, озыр жӱник корсяс.

— Мыйла кока лавка?— чуймӱмӱн юалӱс Зина.

— А сӱдз вӱлӱм нимтӱны. Пантильыс вузасьлӱма посни помӱн. Емдӱнӱ ярманга вылӱ ветлас, ваяс мыйсьюрӱ посни пом и ветлӱдлӱ сиктысь сиктӱ, вузасьӱ. Сӱйӱн и кока лавкаӱн

нимтöмаöсь... Нывсö мырдöн карö верöс сайö сетас, том купеч сайö. Ок и бöрдöма Дуняыд кöлысь дырйиыс, а батыслы абу лысьтöма паныд мунны. А Иван некутшöм ныв вылö сэсся абу видзöдлöма. Кайöма вөрö, лэптöма керка дзик тайö местаас, кöни ми узям тавой, да тані и олöма нэмсö.

— А мыйла нö Сей Иванөн шулöмаöсь, Сейты дорас овлöма да сийөн? — бара юасьö Зина.

— Абу дзик сідз. Лэптас Иваныд керка и мөвпыштас роч пач тэчны. Мөдас сей корсьны. Öшинь улас сей гу кодъяс, оз сюр сейыд, бокысьджык öтиларысь-мөдларысь видлас — некөн нинöм абу. А кодъя кö пö ыджыд гу, коркö öд воас сейыд. И мөдас кодйыны, и кодъяс пö куим тöлысь, куим вежон да куим лун. Зэв нин ыджыд гу кодъяс, зэв джуджыда муас пырас, а сейöдз оз воодчы.

Но, ковмас пö энотчыны пач тэчöмсьыс. Асыв пö из корсяла да гор тэча. Ужнайтас да водас узыны. И вöтасьö. Вöтас Дуняыс уськөдчас. Быттьö веж луд, гөгөр мича дзоридзьяс быдмöны. Шондіа. Дуня пукалö веж видз вылын, а Иван куйлö сы дорын юрсö нывлы водзас пунктöмөн. И сэтшöм быттьö мудз. А Дуня сылы и шуö: «Эн шогсьы, Иван, оз вош тэнад уджыд, сюрас сейыд, весьт нöшта кодйы и воас. Сöмын öти лунөн босьт, мөд луннас сёр нин лоö».

Садьмас Иван, чуймас: мый тайö, вöт али вемöс. Сэтшöм öд быттьö матысь Дунясö аддзыліс, и сьölöмсö топöдис гажтöмысла да шогысла. Казьтыштас сылысь кывъяссö, петас Иван, лэччас гу пыдöсас, весьт кодъяс и збыль воас сейыд. Лунтыр шойччытөг кыскалас Иван сийöс керка дорөдзыс. Ачыс шензьö, мыйла нö пö öти лунөн тшөктіс босьтны сейсö? Мудзтöдз катлас, босьтас, уна-ö колö. Бара узяс. Асывнас садьмас, петас ывлаö, видзөдö: сей гу местаас ты лоöма. Ставыс

тырöма сöдз ваён, матö керка дорöдзыс воö, гыалыштö тöврусыйс ваыс. И сэтшöм сöстöм ва. Любö Иванлы, быттьö Дуняыс сы дорö сöстöм ванас воис. Кытысь письтöма-туöма? Ачыс нин сэсса Иваныс черисö рöдмöдöма тыас.

— А сэсса? — водзö юасьö Зина.

— А мый сэсса, тани и олöма. Тани и гуыс, керкасянныс неылын. Пачыс тайö сылөн тэчлöмыс на, а керкасö выльысь лэптылöмаoсь. Вот тадз, Зинук, талун тэ Сёй Иван ордын гöститан.

— А оз повзöдчы сийö?

— А мыйла нö повзöдчас бур мортыс? Да нöшта сэки, кор тэ нинöм лөксö эн вöч ни вөр-валы, ни йöзыслы.

— А Дуняыскöд сідзи эз и аддзысьлыны? — абу на бурмöма сьölöмыс Зиналөн.

— Мый ог тöд — сийöс ог тöд. Ассьыс, колökö, юав.

— Кодлысь ассьыссö? — чуймис нывка.

— Сёй Иваныслысь.

— Эн повзöдчы, — чилöстис Зина да топöдчыштис вокыс дорö.

Зонъяс серöктисны.

— Узьöй сэсса, — шуис Сергей.

Но челядь дыркодь на эз унмовсьны, мөвпалісны, коді мый.

Мöд луннас детинкаяс Сергейкöд бара кералісны юкмöсьяс. Рытнас воисны гортаныс мудзöсь, но шудаoсь: и вöчöм уджсьыс и вайыштöм черисьыс. Сергей эз лэдз тыртöм кинас, лэчöдыштöй пö, уна-ö верманныд. Честнöя пö нажöвитінныд. Медмича, медгырысьсö лэпталісны. И таысь челядьлы любö лоис. Но кöнкö сьölöманыс оліс и польштöм. Мый аски

шуасны школаас. Ӧд кык лун эз волыны, көть эськө Сергей и кӧсйысис пыравны да висьтавыны директорлы, кӧнӧ найӧ вӧліны да мый вӧчисны.

## Школаын

Классын вӧлі шума да гажа, кытчӧдз эз пыр Лидия Семёновна. Челядь ӧта-мӧдсӧ тойлалігтыр уськӧдчисны партаяс сайӧ.

— Пуксьӧй, но эн ставныд, — шыасис сійӧ. — Кодъяс кык лунсӧ школаӧ эн волӧй, сулалӧй.

Коля, Дима да Ӧльӧш эз пуксьыны.

Лидия Семёновна сулаліс детинкаяслы паныд вӧсньыдик, веськыд, быгтьӧ зор ньылыштӧма, мугов векньыдик чужӧмас вир пас абу, сьӧд синьясыс кӧдзыдӧсь, сідз нин вӧсньыдик вом дорыс нӧшта на топыд. Сійӧ сулаліс ставнас зэвтчӧмӧн, сӧмын юрнас ичӧтика дзӧрӧдіс.

Димаӧс йирмӧг босьтіс, а Ӧльӧшлӧн чужӧмыс кумач кодь гӧрд лои. Ӧтнас Коля сулаліс, быгтьӧ нинӧм абу лоӧма.

— Но, — восьтыштліс топыд вомсӧ Лидия Семёновна, — кӧн нӧ лытайтінныд кык лунсӧ? Али ӧтпырйӧ висьминныд? Дима, дневникад «два», а лысьтан шландайтны? Тэн колӧ ныр вылад усьтӧдз лыддысьсны. Висьталанныд он, кӧнӧ вӧлінныд?

Ӧльӧш эськӧ вомсӧ восьтліс нин, но Коля букышӧн синсӧ чӧвтліс сы вылӧ, да мӧдыс ланьтіс.

Бур ногӧн кӧ юаліс Лидия Семёновнаыс, дерт, детинкаяс висьталісны, кӧнӧ вӧлісны. Но татшӧм горзӧм бӧрын со эз тай.

— Пуксьöй! Урок бöрын мекöд мунанный директор дорö, сэн мöдам сёрнитны.— Сэссия сідзи кöдзыда да скөр чужöмөн и нуöдiс уроксö.

Урок бöрын челядь кайисны мöд судтаö директор кабинетö. Директорыс ичöтик тушаа да вöснъыдик, быттьö нывка, виччысьö нин вöли детинкаясöс.

— Со кабала, со ручкаяс, пуксьöй да гижöй, көн-мый ветлінный кык лунсö, мыйла энö волöй школаö? А сэссия, буракö, бать-мамтö ковмас корлыны. Тöдöны оз найö, кöни вöлінный?

— Да,— öдва кывмөн шуыштiс Дима.

— Но и мый, ошкöны тiянöс школаö вольтöмсьыд?

— Оз,— сідз жö муртса кывмөн вочавидзис сiйö.

Челядь пуксисны орччөн пызан сайö.

— Мый гижам?— шöпкöдiс Öльöш, варовлуныс, тыдалö, бөр воöма сылы вомкötшас.— Ме гижа, мый пинь висис, тэ,— индiс сiйö Коля вылö,— гиж, мый юрыд висис, а тэ, Дима, мый кынöмыд.

— Да ланьт, бызгун,— скöрыськодь öлöдiс сiйöс Коля.— Кыдз вöли, сідзи и гижам.

— Нолы, кыдз тэнад?— здук мысти нюжöдiс сьылисö Колялань Дима. Колялөн еджыд лист вылö вöли пасiйöма: «Кык лун ме, Дима да Öльöш вöчалiм юкмöсьяс Сёйтыын, медым эз пöдны черияс».

— Ме тадз жö гижа,— аслас лист дорö копытчис Дима.

— Ноко, кыдзи?— видзöдлiс жö Öльöш.— А Зинасö абу гижöмыд да.

— Оз ков сiйöс. Эз кö казавны, мед сідз олас,— вомалiс Коля.

Директор дорысь ёртъяс петісны зэв лөньось: кодлы любө видөмыд. Сувтисны өшинь дорө.

— А Сергейыд абу бур морт вөлөма. Көсйис и несйис,— гажтөмпырысь шуис Дима.— Сы вөсна өд кольччим мөд луннас.

Коля нинөм эз вочавидз. Сійө чайтис тадз жө, но сьөлөмыс эз на эскы лёкыслы.

Мөд урок бөрас детинкаясөс бара корисны директор дорө. Кабинетас пырөм бөрын, ёртъяс казялісны Сергейөс. Сылөн чужөмыс вөлі шызьөма, бандзибъясыс банйыштөмаөсь, тыдалө, детинкаяс пыртөдз вензьөма директоркөд, но синъясыс вөліны гажаөсь да вильышсь.

— Но мый, ёртъяс, пуркөшитісны тіянөс? Прөститөй, сөрми. Виччыси бухгалтерөс. Премия тіян вайи, сө шайтөн морт вылө. Босьтөй со, кырымасьөй татчө да.

Зонкаяс ловзисны, нюммунісны.

— Атгьө тіян бур уджысь!— кыпыда сөрнитіс Сергей.— А тулыснас ми бара на өтлаын уджалыштам. Ме сус пуяс вая. Быдтам сус вөр. Отсаянныд?

— Отсаям!— көсйысисны челядь.

— Челядьө,— бур ногөн нин шыасис директор,— буртор вөчөмныд, но оз ков велөдчөмтө эновтны, оз позь велөдчытөгыд.

— Ми ог сэсся,— став пыддиыс көсйысис Öльөш.

— Зинаыд нө көні, сылы өд тшөтш премияыс,— төдчөдіс Сергей.

— Ме ыста сійөс,— уськөдчис өдзөсө Коля.

# ВАРЫШПИ

*висьт*

Петя лосьөдіс ситеч торйысь парус да ладмөдіс пуысь вөчөм пыжө. Маша, ичөт чойыс, гажтөмтчис мам-батьсьыс, кодьяс талун, шойччан лунө, мунисны кытшовтны пес чипасьяс. Сійө босьтөма акань, тубралөма рузумөн да, өшиньө дзоргиг, качайтө, өввө сьылө.

— Петя, Петя, мамыд локтө,— радпырысь горөдіс сійө да содтіс:— Көч гөснеч вайө.

Петя видзөдліс өшиньө. Дзирьяөд пырис мамыс, чышгьянтөм, небыд төв вөрөдіс сылысь руд юрсисө. Киас вөлі тубрас, кодөс сійө кутіс зэв видзчысьөмөн.

— Видзөдлөй, мый ме вайи,— пырөмөн тшөтш шуис мамыс.

Челядь уськөдчисны көтшасө. Мамыс видзчысьөмөн мездіс чышгьянысь лэбачпиөс.

— Мама, кытысь нө кутін?— детинкалөн пелькиник киясыс то тадз, то этадз мөдлісны босьтны сійөс мам кийсь.— Кутшөм тайө лэбач?— юасис Петя.

А Маша кекөначасис да чеччаліс:

— Ура! Мамук! Ми асьным быдтам ичөтиксө.

— Энлөй, энлөй, дзикөдз повзьөдінныд коньөрөс, со кызди



тіралө... Эн вөрзбөдө кинаныд. Лэчча ме вөрысь, кок улө видзөда, а тайө ичөтикыс туй вылас. Муртса эг тальччы. Гашкө, усьөма позсьыс, либө төв уськөдөма. Ме чайта, варышпи тайө.

Челядь шензигтыр видзөдісны лэбач вылө. А сійө педзис кузеник кокъяс вылас, өдйө лолаліс.

— А батьө нө кор воас? — вөлисти слөймисны юавны челядь.

— Киссьөм чипас кольччис тэчны, сэсса көсйис Марья ичиньыдлысь пессө видзөдлыны. Воас.

Мамыс муніс картаө куканьясөс дөзьөритны, челядь ко-лины өтнаныс. Нөшта здук лөня видзөдісны лэбач вылө, а сэсса кыкнанныс матыстчисны сы дорө. Варышпи мөдліс уськөдчыны боклань, но Петя тэрыба кватитіс сійөс. Чоя-вока каньөс моз раз-мөд малыштісны юрсянныс векныдик сьылі кузяыс.

— Эн пов, эн пов, — шуалісны найө.

— Петя, вай сылы чом вөчам, — зіля шыясис Маша.

— Лэбачьясыс оз чомйын овны, а позйын, — велөдіс Петя ичөтджык чойсө, коді ветлөдліс на садйө, көть и медбөрья во. А детинка асьсө ыджыдө, дерт, пунктіс, коймөд классө нин вуджис да.

— Сідзкө, поз вөчам, — Маша котөрөн пырис пыді вежөсө.

А Петялы колө вөлі гөгөрбок видзөдлыны лэбачөс. Вєськыд кинас кутіс варышсө морөсөдыс, и ки пыдөснас кыліс, кыдзи тіпкіс сьлөн сьөлөмыс. А сэсса мөдіс небыдика новлөдлыны чуньнас юрсянныс сера сьылі кузяыс, видліс паськөдны ичөтик вынтөм бордьяссө. Петя матысянь аддзывліс сөмын пышкайясөс, и өні шензьөмөн видзөдіс, мый тайө лэбачлөн пышкай дорысь кокъясыс кызджыкөсь, сьөд

нырыс өшөдчыштөма увлань, боқыс да сьылыыс гөрдов да рудов чутьяса.

Варышпи корсюрө чатөртлывліс-гонькнитлывліс юрсө да восьтлывліс вомсө, тыдалө, корис сөйны.

Маша петкөдіс моздорас куд, ситеч торьяс, вата да мөдіс вөчны поз.

— Энлы тэ познад,— өлөдіс Петя.— Со сөйны корө.

— Час, ме нянь да шьд вая,— бара мөдіс петны Маша.

— Сөяс тэнсьыд шьдтө, дерт нин. Найө медсясө шьрьясөс радейтөны.

— А кысь ми шьрсө босьтам? Гашкө, миян гөбөчад эмось да?— юалө Маша.

— Миянтө абуось. Мый вылө нө Мур каньным.

— А кодлөн эмось?

— Лок Марья ичинь ордө ветлам. Сылөн каньыс абу, карад быд во төвйө да. Сылөн вермас шьрыд лоны,— нуөдчыны мөдіс Петя.

— А кыз нө ми найөс кутам?— серөктіс Маша.

— А ог и ми кутө, а миян Мурным.

Челядь петісны ывлаө каньла. Но корсьны сійөс эз и ковмы. Мур нюжөдчөма веськыда кильчө вылө, шонді югөр улө, сөмын дышеника восьтлывлө то өти синсө, то мөдсө.

Марья ичинь паныдасис челядьлы дзирья дорын, мөдөдчөма пошта вылө. Сійө кывзіс челядьөс да сьөлөмсяньыс серөктіс. Но керкаө пырны лэдзис, мед пө инө Мурыд кань дуксө вөчө гөбөчас, а то шьрьяс пө матө воштісны. А бөр кө пө мунанныд, кильчөсө тасалөй.

Петя зэв зіля кутіс суйны каньөс гөбөч өдзөс сайө, но Мурылы тайө эз кажитчы: нявзіс да сарпасис. Медбөрын

кыдзкө чоя-вока вермисны жө йөткыштны сийөс өдзөс саяс. Но кыйсьөм йылысь, буракө, эз думайт, авзис, вөзйисис бөр петны. Петя каличалис өдзөссө да пуксис лабичө. Маша ладмөдчис сыкөд орччөн. Вочасөн кань ланьтис. Пуксис чөвлөнһ.

— Петя, Мурыд, буракө, лэччис гөбөчад, гашкө, кыйсьө нин,— вашкөдіс детинкалы чойыс.

— Дерт, кыйсьө, көнкө. Найө өд шыр дуктө кылөны.

— А кутас кө шыртө да сөяс? Варышыд бара тшыг кольө.

— Оз сөй. Век тай гортө вайө петкөдлыны. Мед кодкө ошкыштас.

Челядь пукалыштисны недыр и, шөпкөдчыштөм бөрын, востыштисны өдзөссө, көсийсны видзөдлыны, гашкө пө, каньыд пиняс нин кутө шыртө да оз вермы нявөстнысө. Но востөм бөрас дзик шай-паймунисны... Каньыд абу и пыралөма гөбөчас, век өдзөс саяс пукалөма.

— Полө йөз гөбөчад,— гөгөрвоис Петя.— Ковмас мян тшөтш пырны.

— Ме ог, тэ өтнад пырав,— бөрыньтчис Маша,— Гашкө, сәні бубыляяс олөны.

— Кутшөм бубыляяс? Наөн өд сөмын челядьөс повзьөдлөны! Лок,— бара корис Петя.

— Ме ог.

— Лок, мяся, а то полысь көчөн нимтыны понда.

— Тэ ачылд полан, сийөн өтнадөн он и пыр,— водзсасис нывка.

Дерт, Петялы шуштөм жө вөлі пырны өтнаслы йөз гөбөчө, но ичөтджык чойыслы тайөс нинөмысь эз көсийы петкөдлыны.

— Тэ сөмын ас йывсьыд думайтан, а варышпи йывсьыд он. Тшыглы кө кулас? Гашкө, и шыр кутігас отсасьны ковмас.

Маша полөмпырысь воськовтіс Петя бөрся. Но кор лэччис содыяс кузя да синьясыс велалыштісны пемыдас, то аддзис, мый гажтөмыс тані нинөм абу: ичөтик өшиньяссө номыйыс тупкөма марляөн, но югыдыс сы пыр усьө. Стен дор мозыс путкыльтөма некымын пельса, тэчөма тыртөм кудьяс, неылын тыдаліс картофель чукөр. Вөлі ыркыд. Челядь пуксисны куд вылө. Кань исасигтыр муніс ылыс пельсө.

— Вот аддзан, корсьысьө нин, регыд кутас, — шөпкөдө Маша.

Но Мур, гөбөчсө кытшовтөм бөрын, бөр воис челядь дінө да водіс кок уланыс. Маша кинас йөткаліс каньөс, шөпкис:

— Мун, корсь өти шырөс, тэ дышөдчөм ради варышпиыс кулас.

— Эн вөрөд сійөс, лөня пукав, мед Мурыд шырсө кылас.

Пукалісны дыр. Маша вөлі өти платтьө кежысь да мөдіс кынмыны. А каньлы веськодь, куткыртчөмөн вугралө, сөмын, кор челядь вөрзыласны, дышпырысь восьтлас виж синсө.

— Петя, ме кынма, вай петам татысь, — корис Маша.

— Петам. Мам вөлі шуө, мян пө Мур морт кодь жө төлка, а некутшөм төлк абу вөлөма.

— А гашкө, шырыс тані абу да, — кань вөсна өбиднө лои Машалы.

— Гашкө, и абу, — кывйө сетчис Петя.

Челядь радейтісны ассьыныс каньсө да дзык төлктөмө эз жө көсийыны пуктыны сійөс.

Шонді нөрөвтчис рытлань. Гөбөч бөрын ывла вылыс вөлі югыд да шоньд, но челядь вөліны шөгось. Мурөс лэдзисны

Марья ичинь йӱрас, оз кӧ пӧ кывзысь, мед ачыс туйсӧ гортӧ корсяс. Тасалисны кильчӧ ӱдзӧс и петисны йӱрысь. Друг кыліс шутӱвтӧм. Тайӧ вӧлӧма Коля, суседныс. Сійӧ велӧдчис ӱти классын Петякӧд.

— Кытчӧ мӧдінныд? — юалис сійӧ.

Петя да Маша висьталісны ассьыныс шогсӧ Колялы.

— Аддзӧмныд мыйысь шогсьыны. Буйӧс кута да мунам муяс вылӧ шыртӧ кыйны. Сэсь кӧть пуд шыр кый, позьӧ сӧ варышӧс быдтыны.

Коля петкӧдіс гез пом, домис понсӧ, и ставӧн мӧдӧдчисны сикт сайӧ кыйсьыны. Буй усьласис ӱтарӧ-мӧдарӧ. То ӱтилаын бергалас, челядь мӧдасны сӱтысь корсьны шыр поз, а пон нин мӧдлаӧ уськӧдчӧ; то мӧдлас картофель поз костын сарпасьны, челядь котӧртасны сӱтчӧ, а сэн нинӧм абу.

Тадзи воисны вӧр дорӧдз. Котралісны пон бӧрся козьяс да пожӧмъяс дінті, пыравлісны кустьяс улӧ.

Буй котравныс мудзис, дышмис, некымынысь нин пондыліс мездӧдчыны кӧртӧдысь, но кор гӧгӧрвоис, мый оз мын, пуксис туй бокӧ. Мудзӧм челядь пуксялісны сы дорӧ.

Шыр кыйӧм бара помасис.

— Кутшӧм тайӧ тӱнад пон. Весиг шыртӧ эз вермы корсьны, — увтыртана шуис Петя.

— Но и мый, эз кӧ. Шыръясыс, гашкӧ, сӧмын войнас петӧны.

— Некутшӧм кыйсьысь пон таысь оз артмы, — бара шусис Петялӧн.

— Буйыс ӱд том на. Вот быдмас и лоас бур вӧралысь понйӧн.

— Кыськӧ нин, лосьӧма, — венӧ пырис Петя.

— А тиян... тиян варышыд быдмас да мӧдас чипанъясӧс

сиктысь новлыны, — аслас пон вöсна лөгасьöмла крапнитіс-шуис Коля.

Тайö кывъясыс вöліны сэтшöм видзчысьтöмөн, мый Петя эз куж пыр жö вочавидзны.

— Оз, ми бур варышöс быдтам, — ёсь гөлөсөн чилөстіс Маша.

— Ха-ха, бур варыш быдтысьяс, — дэльöдана серöктіс Коля. — Шышöс быдтанныд! Мөдiм, Буи, гортö. Мед, колөкө, вейбыд шырсö куталöны, — и детинка понйыскöд мөдöдчисны сиктлань.

Чоя-вока колины кыкөн. Петя пукаліс юрсö öшöдöмөн. Öбидаясла тіралісны вом доръясыс. Ставыс артмис мөдарö, эз сідз, кызди колö... Варыш коли тшыг. Мурсö колісны Марья ичинь керка дорö. Адзис-ö Мурыс гортö туйсö? Колякөд зыкө воисны. А збыль öд овлö, мый ыджыд варышгьяс чипаньяссö гусявлöны. И налөн кутас новлыны?..

— А ті нö мый танөсь? — друг кылісны челядь батыыслысь гөлөссö.

— Батьö, батьö! — уськөдчисны челядь сы дінö.

Вöрысь лэчигөн нывка да зонка öта-мөдсö торкаліг висьтавлісны батыыслы ассыныс кыйсьöмсö. Сöмын Колякөд вензьöм йылысь чөв олісны. Батыыс пөттöдзис сераліс да шмонитіс:

— Но, öні, көнкө, Марья ичинь гөбөчсьыд став шыръясыс юртөг-садьтөг пышйисны. — А сэсся сьөлөм сетіс: — Эн майшасьöй, вердам варышпитö.

Гортас воём бöрын челядь корсялісны нидзувьяс, сэсся пешкыльтісны кырсь да öктісны пучöйясöс. Варыш лои пөт. А батыыс көрталіс сылы öти кокас кыз сунис да домис лабич дорö.

— Батьё, мыйла нө варышсө домин? — юалө Маша, буракө, жаль лоёма лэбачыс.

— Мед оз ветлөдлы кытсюрө да быдлаті оз лякөсьт.

— А сэсса нө мый, дом йылын и мөдас овны? — оз миритчы нывка.

— Оз жө өд. Аски асыв петкөдө сайникө да пуксьөдө курөг позйө. Сэні и лоө оланіныс. И каньыд сэсь оз судзөд.

— Коласъясыс паськыдөсь, да петас, — суйсис сёрниө Петя.

— А ті нин асьныд мөвпыштөй, мый позяс вөчны, мед оз пет.

— А костьяссө кө ньөрйөн кыны? — юалана синъясөн видзөдліс детинка батыс вылө.

— Позьё. Лоө нин тиян асыв уджыд, — серөктыштіс батыс.

Та вылө и сувтісны.

Водөм водзвылын нин петісны ая-пиа кильчө вылө лолалыштны сөстөм сынөднас. Мур тшөтш вөлі тані, куткыр-видзис-пукаліс кильчө сод вылын. Сэки сөмын Петя збой-мөдчис юавны:

— Батьё, а сэсса варышпиыд быдмас да, гашкө, чипанъястө сиктсьыд новлыны мөдас?

Батыс дыркөд чөв оліс. Петялы нин кажитчис, мый сійө эз кыв юалөмсө.

— Вот мый, Петя, — медбөрын шыасис жө сэсса. — Быд ловъя лов чужөма му вылас овны. А варышпиыс өні ичөтик, жебиник. Ми кө огө отсалөй, кулас. А быдмыштас, ёнмыштас и — лэдзам. Верман кө мортыд, быд ловъя ловлы колө отсыштны...

Колякөд зыксөмсянь вөлись личаліс Петялөн сьөлөмыс. Сійө ыджыда ышловзис.

# Юриндалысь

Гӧгыля-вугыля, <i>повесьт-мойд</i> . . . . .	3
Векныдык ордым, <i>повесьт</i> . . . . .	53
Ме да Ивук вокӧй, <i>повесьт</i> . . . . .	113
Сейты дорын, <i>висьт</i> . . . . .	158
Варышпи, <i>висьт</i> . . . . .	176